

# BAPAKULAMI NA NTANGU YA NSUKA



Mbote, dibuundu. Bikwa beto kuzonza na Mfumu ya beto ntangu yayi.

<sup>2</sup> Nzambi ya nene, Kiyidiki ya mazulu mpe ya ntoto, Yandi yina na Bunzambi salaka ti beto kukembila Nge, na ntangu yayi na suka yayi. Mpe bikwa ti beto, Mfumu, na kati ya bantima ya beto kubika nyonso ya beto na luzolo ya Nge ya Buzambi mpe kubika Mpeve-Santu kusala na kati ya beto, samu na kupesa yina Nge ke zola ti beto kuzaba. Nsatu ya beto kele kuvwanda Baklisto ya kulutula mbote mpe bimonikisi ya Nge ya kulutula mbote. Pesa beto yawu na suka yayi, mutindu beto ke na kuvingila na Nge, na Nkumbu ya Yesu Klisto. Amen.

<sup>3</sup> Beno lenda vwanda. [Muntu mosi me tuba, “Ba katula bitende ya bisambu?”—Mu.] Yinga. Beto kele na kyese mingi na kuvwanda dyaka awa na suka yayi, na—na kusalu ya Ntinu ya nene. Mpe beto ke na kiadi, beto, dyaka, samu ti beto ke na bisika mingi ve samu na bantu, kasi beto kele kaka . . . Beto ke meka mpe beto ke sala nyonso beto lenda sala, samu na mambu yayi.

<sup>4</sup> Ntangu yayi, bantu mingi ke na bamuswale mpe balombilu na zulu awa samu ba sambila yawu. Mpe mu ke tula yawu kaka na lweka; ya kele samu na kubika yawu ve, kasi mu ke sambila samu na yawu na manima . . . mutindu . . . mpe na nkokila yayi, mu ke sala yawu na suka yayi, mpe dyaka kuna na nkokila yayi, ntangu, kuna mu ke sambila mpe mu ke vingila Mpeve ya Nzambi samu na kubeluka ya nzutu. Ya kele na ntangu yina mu zola kusambila samu na bamuswale mpe bima.

<sup>5</sup> Mpe samu na balombilu yina kele ya mfunu mingi, Billy me pesa munu yawu, nyonso, ya yawu. Ya kele na kutala bankama tatu, mpe mu, vwandaka me basika kaka na bivinga ya kusolola kuna. Beno me mona, mu ke baka yawu kaka na nswalu, mpe nyonso, yina mu lenda baka. Mpe mu ke baka yawu kaka na nswalu landila lenda ya munu. Mu lenda ve kubaka yawu nyonso. Mu ke baka, mu ke kuzwa mosi, mu ke tuba, “Mfumu, ya ke vwanda *yayi*, mpe ya ke vwanda *yayi*?” Kaka mutindu yina, samu ti ya kele, nyonso, bansatu, balombilu ya kieleka; kima mosi, na ntembe ve, ti beto fwana zonza kintwadi samu na yina me tala yawu. Mpe munu . . . Kana ti, beno zaba, bambala mingi Mpeve-Santu lendaka tuba mosi ya yawu yina mu tangaka, yina kangamaka na ntima ya munu; mu ke vutuka dyaka na yawu, mpe mu ke sosa kuna tii mu ke kuzwa yawu. Kana ve, mu ke baka yawu kaka mutindu yina.

<sup>6</sup> Ntangu yayi, beto zola mpe kutuba, na suka yayi, mpe kupesa mbote na bayina kele kuna na bitini yankaka ya yinsi. Beto zola kupesa mbote na bantu yina ke na kulandaka na suka yayi na nzila ya allo-allo yayi, na Mbanza New York; na Beaumont, na Texas; na Prescott, na Arizona; na Tucson, na Arizona; na San Jose, na Californie; na Connecticut; na Gainesville, na Georgie; mpe na New Albany, na Indiana; bisika nyonso na yinsi. Beto me pesa beno mbote na Nkumbu ya Mfumu Yesu.

<sup>7</sup> Na suka yayi, na Indiana, ya kele suka mosi ya mbote. Beto kuzwaka mvula mazono na mpimpa yawu yina me sala ti ntangu kuvwanda mbote. Mpe beto kele . . . Tabernacle kele ya kufuluka na bantu, mpe muntu nyonso ke na kuingilaka, na ntima-kusuka, samu na lesu ya lukolo ya Lumingu. Mpe mu ke na kivuvu ti balusakumunu ya kulutula ya Nzambi ke vwanda na zulu ya beno kuna.

<sup>8</sup> Mpe beto ke na kubanzaka, kana beto kuzwa ntangu, kuzwa mutindu samu na kuzwa, kisika beto lenda vwanda beto nyonso kintwadi, mu banza na nsi ya tenta ya nene, kisika mu me twadisama ya kieleka samu na kulonga Bambungu yayi Sambwadi ya Nsuka ya Biblia.

<sup>9</sup> Na yawu ntangu yayi, samu ti beto kubaka ntangu mingi ve na zulu ya lesu ya nene yayi na suka yayi . . . Mu vwandaka sosa Mfumu, vwandaka banza, “Yinki mu lenda tuba?” na kuzabaka ti yayi lendaka vwanda lukutakanu ya beto ya nsuka yina beto lenda kuzwa. Kwizulu ya Mfumu me kuma pene-pene mingi!

<sup>10</sup> Mu me mona ti, na manima ya kuzabisa na ntwala yina salamaka na Californie, ya kele na bayinzo kuna, mpe bisika, ke na kudyamaka ba-centimetre makumi sambwadi na sambanu na ngunga mosi, bayinti ke na kupasukaka mpe ke na kuzengana. Mpe bawu kuzaba ve yinki ke na kusalaka yawu. Beto me kuma na nsuka. Bayinzo ya nkama ya mafunda ya ba-dollar, ke na kudyamaka. Mu ke na bayintu ya nene ya zulunale, bafoto, yina mu banza mu ke nata na nkokila yayi, na yina mu zola kuzonza kima na zulu ya yawu na nkokila yayi.

<sup>11</sup> Mpe, kuna, na nkokila yayi beto ke sambila samu na bambevo. Beno kwisa na manima ya midi yayi, na ngunga ya tanu, na ngunga ya sambanu, to na ngunga nyonso yina ya lendaka vwanda. Beto ke banda na ngunga ya mbote, mu banza, samu bantu kwenda na ngunga ya mbote, mpe beno kwisa baka bakalati ya beno ya bisambu. Mpe beto ke sambila samu na bambevo na nkokila yayi, kana Mfumu kuzola.

<sup>12</sup> Ntangu yayi, na manima ya kusambila mpe kubanza, “Yinki mu fwana sala?” na kuzabaka ti kilumbu mosi mu fwana pesa mvutu samu na yina mu ke tuba awa . . . Mpe mu me baka lukanu, to Mpeve-Santu me twadisa munu na kuzonza na suka yayi samu na profesi, na mutindu ya kupesa beto malongi. Beno me mona?

Ya kele kima yina beto. . . Kana ba me pesa beto malongi ve, mpe ti kima kusalama kaka mutindu yina, beto fwana zaba yina me tala yawu. Mpeve—Santu me pesa beto yawu, samu na kukebisa bantu na bima yina ke na kwisa. Beno zaba, Biblia ke tuba, ti, “Nzambi ke sala kima ve kana ntete Yandi kutalisa yawu na bisadi ya Yandi, baprofete.” Mpe—mpe mutindu Yesu kukebisaka bantu, na yina zolaka salama; mutindu baprofete kukebisaka bantu, na yina zolaka salama. Mpe ya me tala beto ntangu yayi, na ngunga ya nene yina beto ke na kuzingaka, samu na kumona nsungi yina beto ke na kuzinga, mpe yinki ke salam-. . . mpe yinki ke salama na nsungi yayi. Na yawu mosi ya malongi ya ngitukulu yayi yina mu banza ti beto me tangaka bambala mingi, ya me kwisa na ntima ya munu samu—samu na kuzonzila bantu samu na yawu na suka yayi.

<sup>13</sup> Ntangu yayi beto baka Babiblia ya beto na Matthieu na kikapu ya 24, mpe kutanga kitini ya Ndinga [Mpangi Branham me yidika ndinga ya yandi—Mu.] (Beno lemvokila munu.) Ya kele mutindu ya—ya kuzwa ngindu ya beto samu na dilongi ya beto mpe lesu ya beto.

<sup>14</sup> Ntangu yayi, beno bambuka moyo ti beto ke longisa yayi mutindu lesu ya Biblia, na malembe. Beno baka bilapi mpe bapapié ya beno. Ya kele na Masonuku mingi awa yina mu sonikaka, yina—yina beno lenda kusonika. Na yawu beno kwenda longuka yawu na yinzo, samu ti yayi kele kaka mutindu kalasi ya lukolo ya Lumingu, ti beto lendaka zaba, mpe kuvwanda na bukebi mpe ya kuyilama samu na bangunga yina beto ke na kuzingaka.

<sup>15</sup> Na Buku ya Santu Matthieu, [Mpangi Branham me yidika ndinga ya yandi—Mu.] (Beno lemvokila munu.) na nzila ya 24, to, kapu 24, mu zola tuba, beto banda na nzila ya 15, mu zola kutanga kitini ya Ndinga ya Yandi.

*Mpe ntangu beno ke mona busafu ya kimwangisi, yina profete Daniel zonzilaka, ya kutelama na kati ya kisika ya santu, (muntu yina ke na kutanga, ti yandi kubakula yawu.)*

*Kuna bantu yina kele na Judée fwana kukima na zulu ya myongo:*

*Ti yandi yina kele na kibandu ya yinzo—kibandu ya yinzo kukulumuka ve samu na kubaka kima yina kele na kati ya yinzo ya yandi:*

*To yandi yina kele na bilanga kuvutuka ve samu na kubaka bilele ya yandi.*

*Mpe kyadi na bakento yina ke vwanda na bivumu, mpe na bayina ke nwikisa bana mabene na bilumbu yina!*

*Kasi beno sambila samu ti kukima ya beno kuvwanda ve na hiver, to na kilumbu ya saba:*

*Samu ti kuna ya ke vwanda na bampasi ya kulutila, bampasi ya mutindu yina me salamaka ntete ve katuka mbandukulu ya yinza tii ntangu yayi, ve, yawu ke salama dyaka ve.*

*Mpe kana bilumbu yango vwandaka ve ya kukuluka, ya zolaka vwanda ve na muntu yina zolaka zinga dyaka: kasi bilumbu yango ke vwanda nkufi samu na bantu yina solamaka.*

*Na yina kana muntu tuba na beno, Beno tala, Klisto kele awa, to kuna; beno kwikila yawu ve.*

*Samu ti ya ke telama Baklisto ya luvunu, mpe bapofete ya luvunu, mpe bawu ke sala bidimbu ya ngitukulu mpe bimangu ya nene; mpe kana ya lendaka salama, bawu ke vuna mpe, bantu yina solamaka.*

*Beno kuwa mbote, samu ti mu me tuba na beno yawu na ntuala yawu kusalama.*

*Na yina kana ba me tuba na beno, Ti, yandi kele na ntoto ya kuyuma; beno kwenda kuna ve: ti, yandi me bumbama na kati ya kivinga; beno kwikila yawu ve.*

*Ya kieleka, mutindu nsemo ya nzasi ke semaka katuka sika ke basikaka mwini tii sika yawu ke lalaka; mutindu yina mpe ke vwanda nkwezulu ya Mwana ya muntu.*

*Samu ti sika yina ke vwanda mvumbi, kuna ke vukana bangononi. . .*

<sup>16</sup> Ntangu yayi, mutindu dilongi, mu ke zola kubaka na nzila ya 24, mpe kutelama na nzila yayi samu na lesa ya beto ya lukolo ya Lumingu na suka yayi. Mpe beno kuwa mbote na yina mu ke tangulula yawu, dyaka.

*Samu ti ya ke telama Baklisto ya luvunu, mpe bapofete ya luvunu, mpe bawu ke sala bidimbu ya ngitukulu mpe bimangu ya nene; mpe kana ya lendaka salama, bawu ke vuna mpe, bantu yina solamaka.*

<sup>17</sup> Ntangu yayi mutindu dilongi na suka yayi, to mutindu yintu ya dilongi, na kisika ya yawu, mu zola kubaka: *Bapakulamami Na Ntangu Ya Nsuka*. Ya kele dilongi yina mu zola kuzonzila, to yintu ya dilongi: *Bapakulamami Na Ntangu Ya Nsuka*.

<sup>18</sup> Mu ke kwikila ti beto ke na kuzingaka na ntangu ya nsuka. Mu banza na kutala ti muntu nyonso yina. . . Muntu yina ke tangaka Masonuku, to dyaka mukwikidi, zaba ti beto kele ntangu yayi na nsuka ya disolo ya yinza. Ya ke vwanda ya mpamba na kusonika yawu, samu ti ya ke vwanda na muntu ve samu na kutanga yawu. Ya kele na nsuka ya ntangu. Kaka yinki ntangu, mu zaba ve. Kieleka wapi yinda ya ke vwanda, ata Bawanzio ya Mazulu zaba minuti to ngunga yango ve. Kasi Mfumu Yesu tubaka na beto, ti, ntangu bima yayi yina beto ke na kumonaka ntangu yayi ke banda na kusalama, na yawu

beto telemisa bayintu ya beto samu ti mpulusu ya beto ke na kubelama. Ntangu yayi, yinki zola kutuba “kubelama”, mu zaba ve. Ya lendaka kutuba . . .

<sup>19</sup> Mutindu bantu ya mayele vwandaka tuba kilumbu yina, na television, bawu vwandaka zonzila kupasuka na kati ya ntoto ya mafunda mingi ya ba kilometre yina ke dyama. Ba yufulaka yandi kyuvu, “Ya lendaka dyama kuna?” Ya kele Los Angeles, na Côte Ouest. Mpe mingi ya beno monaka mutindu ba landaka yawu na radar, mpe ya lutaka na . . . yawu pasukaka na nsi ya San Jose, yawu kwendaka tii na Alaska, ya me luta na Bitumbu ya ba-Aleutien, na kutala bankama tatu ya bakilometele na simu ya mubu, mpe me vutuka na San Diego, ya me baluka na manima ya Los Angeles, mpe me mata kuna, me sala posi ya nene.

<sup>20</sup> Mpe bakuningana nyonso yayi yina beto vwandaka kuzwa vwandaka samu na kusalu ya volkan na dibulu yayi ya nene ya kukangama, mutindu, na kati kuna. Mu zaba ve nkumbu yina ba—ba vwandaka bokila yawu. Na yina, ntangu ya ke ningana, ya ke pesa bakuningana yayi beto vwandaka kuzwa bamvula nyonso na Côte Ouest. Ntangu yayi ya me pasuka bisika nyonso. Mpe bantu ya mayele vwandaka tuba, mosi . . .

Muntu mosi tubaka na yankaka, “Ya lendaka kubwa?”

Yandi tubaka, “Ve ti ya ‘lenda,’ kasi ya ke kubwa.”

Yandi tubaka, “Kasi na nsungi ya beto ve, mu banza?”

Yandi tubaka, “Na baminuti tanu yina ke na kulanda, to na bamvula tanu yina ke na kwisa. Kieleka beto zaba ntangu ve.”

<sup>21</sup> Sabala yayi, ba me tinda munu bayintu ya nene ya zulunale mosi, ya bayinzo ya nene ya mafunda nkama mosi ya ba-dollar yina ke na kuningana mpe ke na kupasuka, bantu ke na kukwendaka. Mpe ba zaba ve mutindu ya kukanga yawu. Mutindu kele ve samu na kukanga yawu. Beno me mona, Nzambi lenda sala nyonso yina Yandi zola, mpe ya kele na muntu ve yina lenda tuba na Yandi mutindu ya kusala yawu.

<sup>22</sup> Beno ke tungaka bayinzo, beno lenda tula bima landila mayele ya bantu, mpe Nzambi kele Kiyidiki ya mayele ya yinza ve. Wapi mutindu beno ke sala na kukanga Yandi? Yandi lenda manisa na ntoto na suka yayi na nzila ya makasa kana Yandi zola. Beno me mona, Yandi lendaka bokila na luzingu makasa, mpe bawu ke fuluka makumi sambanu na tanu ya ba kilometre na ndambu ya ngunga, beno me mona, ya kele ve . . . mpe kudya mbala mosi bantu na zulu ya ntoto. Yandi kele Nzambi. Kieleka Yandi ke salaka mutindu Yandi zola. Yandi kele mfumu, na Yandi mosi.

<sup>23</sup> Ntangu yayi, na kumonaka bimbangi nyonso yayi ya kutula kintwadi, ti ngunga yina beto ke na kuzingaka ntangu yayi, mu banza ti ya kele kima ya mbote na kuvutukila bima yayi mpe kulakisa yawu, na yina Bidimbu me zibuka, mpe kutala kieleka

ya bima yayi, na yina Nzambi me vwanda ya kusungama mingi samu na beto, na lemvo ya Yandi, samu na kulakisa beto bima yayi.

<sup>24</sup> Mu zola ti beno kutala awa na Matthieu 24, Yesu bakaka mpova ya “Baklisto,” B-a-k-l-i-s-t-o, “Baklisto.” Klisto ve, kasi “Baklisto,” mingi, mosi ve. “Baklisto.” Na yawu, mpova *Klisto* zola kutuba “Mupakulami.” Mpe kuna kana ya kele ya “mupakulami,” ya ke vwanda kaka na mosi ve, kasi mingi ya bapakulami, “bapakulami.” Beno me mona?

<sup>25</sup> Kana ve, kana Yandi zolaka kufungula yawu mwa mbote samu ti beto kubakula yawu, Yandi zolaka tuba, “Na bilumbu ya nsuka bantu ya luvunu ke telema, bapakulami.” Ntangu yayi, ya ke monana mutindu ti ya lendaka salama ve, beno me mona, bampova ya “yina ba me pakula.” Kasi beno tala kaka bampova yina ke na kulanda, “mpe baprofete ya luvunu,” b-a-p-r-o-f-e-t-e, mingi.

<sup>26</sup> Ntangu yayi, *mupakulami*, kele, “muntu yina kele na nsangu.” Mpe mutindu kaka nsangu lendaka pesama ya kele na nzila ya muntu yina *ba me pakula*, mpe yina fwana vwanda profete, mupakulami, “milongisi ya luvunu ke telema, yina ba me pakula.” Profete ke longisaka yina kele nsangu ya yandi. Milongisi yina ba me pakula, kasi bantu yina ba me pakula na malongi ya luvunu. Bantu yina ba me pakula, “Baklisto,” mingi; “baprofete,” mingi. Mpe kana ya kele na kima mutindu Klisto, mosi, kuna bayayi zolaka vwanda “bapakulami,” ti profesi ya bawu ya yina bawu ke longisa ke vwanda ya kuswaswana, samu ti ba kele bapakulami, yina ba me pakula.

<sup>27</sup> Ntangu yayi, ya kele leso ya lukolo ya Lumingu, beto zola ku—kumeka na kunata yayi na kuteza ya kieleka, na nzila ya Masonuku, ve na nzila ya yina muntu yankaka tubaka na yina me tala yawu, kasi kaka na kutangaka Masonuku.

Beno lendaka tuba, “Wapi mutindu yayi lendaka vwanda? Ti bapakulami. . . ? Ba vwandaka banani?”

“Baklisto,” B-a-k-l-i-s-t-o. “Baklisto yina ba me pakula, mpe baprofete ya luvunu.” Bantu yina ba me pakula, kasi baprofete ya luvunu!

Yesu tubaka, ti, “Mvula ke nokaka samu na bantu ya mbote mpe bantu ya yimbi.”

<sup>28</sup> Ntangu yayi, muntu lendaka tuba na munu, “Nge ke kwikila ti kupakulama yango na bantu yina zola kutuba ti ya kele kupakulama ya Mpeve-Santu?” Yinga, tata, Mpeve-Santu ya Nzambi ya kieleka na zulu ya muntu, mpe kasi ba kele bantu ya luvunu.

<sup>29</sup> Ntangu yayi beno kuwa mbote mpe beno mona yina Yandi tubaka. “Mpe bawu ke lakisa bidimbu ya ngitukulu mpe bimangu ya nene, na kisika ti ya lendaka vuna bantu ya

Kusolama kana ya lendaka salama.” Mpe ba me pakulama na Mpeve-Santu ya kieleka. Mu zaba ti yayi ke wakana kieleka mutindu buzoba, kasi beto ke baka ntangu mpe ke tendula yawu na nzila ya Ndinga, ti yayi kele kieleka MUTINDU ME TUBA MFUMU, Kieleka.

<sup>30</sup> Ntangu yayi beto baka Babiblia ya beto, mwa minuti, na Matthieu na kapu 5, mpe kubanda na nzila ya 45, mpe kumona ntangu yayi na yina beto ke tanga samu na mwa bantangu fyoti na Masonuku yayi. Mpe kuna, na manima beto kukuma awa, mbote, beto ke pesa beno . . . Na yawu beno, kana beto kondwa na kutanga bawu nyonso, kuna beno baka Biblia ya beno; mpe—mpe dyaka beno lenda tanga yawu na manima beto ke katuka awa mpe beno ke kwenda na yinzo, mpe—mpe beno tanga yina Biblia me tuba na yina me tala yawu.

<sup>31</sup> Ntangu yayi samu na kubaka ntangu ya beto, samu na kuzwa mama ya dyambu, samu ti mu ke na kusalaka luzabusu awa yina kele ya ngitukulu. Wapi mutindu Mpeve-Santu lendaka pakula mulongisi ya luvunu? Kasi ya kele yina Yesu tubaka ti zolaka salama.

Ntangu yayi, Matthieu, na kapu 5, na nzila ya 45, beto tanga ntangu yayi. Bikwa beto kubaka, kubanda mwa na manima ya yawu, na 44.

*Kasi mu ke na kutuba na beno, Beno zola bambeni ya beno, beno sakumuna bayina ke singaka beno, beno sala mambote na bayina ke yinaka beno, . . . beno sambila samu na bawu yina ke nyokolaka beno mpe ke talisaka beno mpasi.*

*Na yina, beno ke vwanda bana ya Tata ya beno yina kele na mazulu: ya kieleka yandi ke basisaka ntangu samu na bantu ya yimpi mpe . . . ya mbote, mpe ke nokisaka mvula samu na bantu ya mbote mpe . . . bantu ya yimbi. (Mvula ke nokaka na zulu ya bantu ya yimbi mutindu mosi na bantu ya mbote.)*

<sup>32</sup> Ntangu yayi samu na kulandila yayi, na profesu yankaka yina ke pesa ngolo na yayi, beto baluka ntangu yayi na Hebreux kapu 6, samu na nzila yina ke landa na zulu ya yayi, kisika Paul wandaka vutukila na dibanza kima mutindu mosi yina Yesu tubaka. Paul, kele yina ke na kuzonzaka awa. Na yina beno ke na kusosaka yawu . . . Mpe beno yina kele kuna na nsinga, beno tula pene-pene ya beno Babiblia ya beno na kitini ya papié, mpe beno sosa yayi ntangu yayi. Hebreux, na kapu 6, Paul na kusonikaka na Ba-hebreux, wandaka lakisa bawu binsinsya mpe bifwanukusu, yandi nataka bawu katuka Judaisme na Kimuklisto, na kulakisaka bawu ti bima nyonso yina wandaka kaka bifwani ya bima yina ke na kwisa. Paul kele yina ke na kuzonzaka awa, na Hebreux 6.

*Na yina, beto tatamana ve na bandongosolo ya ntete yina beto kuzwaka na yina me tadila Klisto (K-l-i-s-t-o, mosi), ti beto landa na yina kele ya kulunga. Beto vutukila dyaka ve ndongosolo ya ntete yayi ya kubalula ntima . . . bisalu ya yimbi yina ke nataka na lufwa, mpe ya lukwikilu na Nzambi.*

*Ya . . . malongi yina me tadila bambotika, mpe kutetika bantu maboko, mvumbukulu ya bantu ya kufwa mpe lusambusu ya nsuka.*

*Mpe ya kele mutindu yina beto fwana kusala kana Nzambi me pesa muswa.*

*Samu ti ya lendaka salama ve ti bayina wandaka mbala mosi na nsi ya nsemo, mpe bayina mekaka dikabu ya mazulu, mpe bayina wandaka me belama na Mpeve-Santu,*

- <sup>33</sup> mu zola kubenda mabanza ya beno kaka mwa minuti. Beno me bakula? Ya kele “dikabu”; kasi ve “makabu, bayina me belama na makabu ya mazulu”; kasi, “dikabu ya mazulu,” mosi; “Klisto,” mosi; “dikabu,” mosi.

*. . . dikabu ya mazulu, mpe . . . bayina wandaka me belama na Mpeve-Santu,*

*Mpe bayina mekaka . . . ndinga ya Nzambi, . . . (mekaka yinki?) . . . ndinga ya Nzambi, mpe lulendo ya yinza yina ke na kwisa,*

*Mpe bayina me kubwa, ke vutukila dyaka bawu mosi na kusoba; samu ti bawu ke na kukomaka dyaka na kulunsi Mwana ya Nzambi, mpe ke pesaka nzila ti ba finga yandi.*

*Ya kieleka, (beno kuwa) ntoto . . . kuzwaka maza ya mvula yina ke kubwaka konso ntangu, samu na kubasisa bayinti yina kele mfunu na bisadi-bilanga, ntoto ke kuzwaka balusakumunu ya Nzambi:*

*Kasi kana yawu ke na kubasisa matiti ya bansende . . . banselokoto ba ke losa yawu, mpe ba ke singa yawu; mpe na nsuka kuyoka yawu.*

- <sup>34</sup> Ntangu yayi beno fwanikisa dyaka yawu na Matthieu 5:24. Beno tala, Yesu tubaka mvula mpe mwini ke kwizaka na zulu ya ntoto, ti Nzambi ke tindaka yawu samu na kusala madya mpe bima samu na bantu ya ntoto. Mpe ba ke fidisaka mvula samu na madya, matiti. Kasi matiti ya yimbi, bayinti ya yimbi, mutindu ya kele na kati ya bilanga, ba ke kuzwa kima mutindu mosi. Mvula mosi yina ke menisa blé kele mvula mosi yina ke menisa matiti ya yimbi.

- <sup>35</sup> Wapi mutindu ya leso mu kuzwaka na zulu ya yawu kilumbu mosi, ntangu mu kutanaka mbala ntete bantu ya Pentecôte! Mpe ya wandaka leso ya nene samu na munu. Mu monaka babakala



zole, mosi. . . Ata mbala mosi ve ti mu kuwaka ntete kuzonza na bandinga ya malu-malu. Mosi vwandaka zonza na bandinga ya malu-malu, yankaka yina vwandaka bangula yawu, mpe balweka nyonso zole. Mpe ya vwandaka kieleka, ya vwandaka tuba ti, “Ya kele na mingi na kati awa yina fwana kuviluka na nkokila yayi. Ya kele na bakento mpe na babakala, bawu nyonso zole.” Mpe bantu vwandaka telama mpe vwandaka kwenda na autel.

Mu vwandaka banza, “Mutindu ya kele mbote mingi!”

<sup>36</sup> Mpe na manima na mwa dikabu ya Mpeve-Santu, mu sololaka na babakala yango, kaka, beno zaba mutindu, na nzila ya kuswasikisa mabanza, kaka mwa mutindu samu na kuzaba. Mpe mosi ya bawu vwandaka Muklisto ya kieleka, mpe yandi vwandaka kisadi ya kieleka ya Klisto, mpe yankaka yina vwandaka muntu ya luvunu. Mpe mosi ya bawu, yandi yina vwandaka muntu ya luvunu, vwandaka zinga na kento ya bansuki ya ndombi, mpe vwandaka basika na mosi ya bansuki ya mbwaki mpe vwandaka na bana na yandi. Mbote, ya vwandaka kaka kuna na vision; ba lendaka kumanga yawu ve. Mpe mu zonzaka na yandi na yina me tala yawu. Yandi me tala munu mpe me kwenda na kulandaka yinzo.

<sup>37</sup> Kuna mu vwandaka ya kuyituka, tsyelika. Mu vwandaka banza ti mu kwizaka na kati-kati ya bambazi, kuna mu vwandaka banza kana ti mu vwandaka ve na kati-kati ya badyabulu. Wapi mutindu yayi lendaka vwanda? Mu vwandaka bakula yawu ve. Mpe bamvula mingi mu vwandaka banza dyaka ve na yawu, tii kilumbu mosi kisika. . .

George Smith, mwana-bakala yina ke tambulaka na mwana ya munu ya kento, beto kwendaka mazono, kuna na masini ya ntama ya kunika bambuma kisika mu ke kwendaka na kusambila.

<sup>38</sup> Mpe na manima ya kuvwanda kuna mwa bilumbu, Mpeve-Santu vutulaka Masonuku yayi na munu: “Samu ti mvula ke kwizaka konso ntangu na zulu ya ntoto samu na kubasisa matiti, kasi matiti ya bansende mpe bayinti ya bansende ke zingaka na nzila ya mvula yango mosi, mpe nsuka ya yawu kele kuzika na tiya.” Bawu ke zingaka na nzila ya mutindu mosi ya mukelo ya luzingu ya Nzambi. Kuna mu bakulaka, ti, “Na nzila,” Yesu tubaka, “na nzila ya bisalu ya bawu ti ba ke zaba bawu.”

<sup>39</sup> Ntangu yayi, na yawu, mvula ke kubwaka na zulu ya bayinti mpe bimenina ya ntoto, ya kele mutindu mvula ya Kimpeve yina ke pesaka Luzingu ya Seko, yina ke kubwaka na zulu ya Dibuundu, samu ti beto ke bokilaka yawu mvula ya ntete mpe mvula ya nsuka. Mpe ya kele mvula, yina ke mwangisa Mpeve ya Nzambi, na zulu ya Dibuundu ya Yandi.

<sup>40</sup> Beno tala, ya kele kieleka kima ya ngitukulu awa. Beno me mona? Ntangu ba ke tulaka bankuna yango na ntoto, ata wapi

mutindu bawu me kuma kuna, ba vwandaka matiti ya bansende na kubanda. Kasi kuna blé yina ba me tula na ntoto, mpe matiti, ba vwandaka matiti na kubanda. Mpe konso dititi ke basisa dyaka, yawu mosi, yina ke lakisa ti ya vwandaka na mbandukulu ya ntete.

<sup>41</sup> “Mpe bawu ke vuna bantu ya Kusolama kana ya lendaka salama,” samu ti bawu ke na kuzwa mvula mosi, lusakumunu mosi, ke na kulakisa bidimbu mosi, bimangu mosi. Beno me mona? “Bawu ke vuna, to ke vuna bantu ya Kusolama kana ya lendaka salama.” Ntangu yayi, dititi ya bansende lendaka sala ve ti yawu kuvwanda dititi ya bansende, mpe mutindu mosi lendaka sala blé na kuvwanda blé; ya kele yina Kiyidiki ya mosi na mosi kanaka na mbandukulu. Beno tala bantu ya Kusolama. Mvula mosi!

<sup>42</sup> Mwini ke basikaka na suka mpe ke fukaka ntoto nyonso, mutindu yawu ke salaka na kilumbu yina beto ke na kuzinga na ntoto yayi. Mpe mwini, mwini mosi yina ke basikaka na Este kele mwini mosi yina ke lalaka na Weste. Mpe mwini yango ba me fidisa yawu samu na kuyelisa mbuma na zulu ya ntoto, na yina ba salaka banzutu ya beto.

<sup>43</sup> Beto ke na kuzingaka na nzila ya bima ya kufwa. Yina kele kaka mutindu beto lenda zinga. Mpe kana kima fwana kufwa konso kilumbu samu beto zinga, na kinsuni, na yina ya kele kieleka ve ti kana ya beno— ya beno nzutu fwana kuzinga na nzila ya bima ya kufwa, samu na luzingu ya nsuni, na yina beno fwana kuzwa Kima ke kufwa, na kimpeve, samu na kuvulusa luzingu ya beno ya kimpeve. Mpe Nzambi, kumaka kima, nsuni, mpe kufwaka samu ti beto kuzinga. Ya kele na dibuundu ve, kima yankaka ve na yinza yina lenda vulusa beno kana Nzambi. Ya kele kaka na kima yina bawu ke zingaka.

<sup>44</sup> Ntangu yayi beno landa nzila ya Masonuku. Yesu kele Ndinga. “Na mbandukulu vwandaka Ndinga. Mpe Ndinga kumaka muntu mpe vwandaka na kati-kati ya beto. Na mbandukulu vwandaka Ndinga, mpe Ndinga vwandaka na Nzambi. Mpe Ndinga kumaka muntu, mpe Yandi zingaka, vwandaka na kati-kati ya beto.” “Mpe muntu ke zinga ve na nzila ya dimpa kaka,” na nzutu, “kasi na nzila ya konso Ndinga yina ke basika na yinwa ya Nzambi.” Na yina, beno me mona, beto ke zinga na nzila ya Ndinga, mpe yina kele Nzambi.

<sup>45</sup> Ntangu yayi mwini ke kotaka mpe ke yelisaka mbuma. Ntangu yayi, ya lenda ve kuyelisa yawu nyonso na mbala mosi. Na kukwendaka na ntuala, na kuyela, yawu konso ntangu ke na kuyela tii yawu ke yela blé ya muvimba.

<sup>46</sup> Mutindu mosi ya kele, bubu yayi, na Dibuundu. Yawu kubandaka na kubanda ya yawu, na nsungi ya mudidi, kisika yawu vwandaka na nsi ya ntoto. Yawu me kula mpe ntangu yayi

me yela. Mpe beto lenda mona yawu, tsyelika, mutindu ti Nzambi na nzila ya yinza konso ntangu . . .

<sup>47</sup> Beno lenda ve kutula mubulu na yinza. Ya kele yina kele dyambu bubu yayi. Beto ke na pasula ba-bombe, mpe kuna na kati ya mubu, ke pasula yawu mpe ke mwangisa yawu nyonso na ba bombe atomique. Beno ke na kukatulaka kaka nyonso ya bitini ya ntoto yayi ntangu nyonso, na kulosaka yawu na kati. Beno ke zenga bayinti; bamvula ya ngolo ke nata beno. Beno ke yidika nzadi; yawu ke fuluka.

<sup>48</sup> Beno fwana kuzwa mutindu ya Nzambi ya kusala bima mpe beno vwanda na kati ya yawu. Na nzila ya mabuundu mpe ba-organisation beto me kotisa bantu; beno tala yinki beto me kuzwa! Beno vwanda na kati ya nzila yina Nzambi me pesa.

<sup>49</sup> Kasi, beno me mona, “Yandi ke nokisaka mvula,” samu na kuvutuka na dilongi ya beto, “samu na bantu ya kudedama mpe bantu ya kudedama ve.” Yesu ke tuba na beno awa ntangu yayi, na Matthieu 24, ya ke vwanda kidimbu na ntangu ya nsuka.

<sup>50</sup> Ntangu yayi, kana kidimbu yayi ke zabakana kaka na ntangu ya nsuka, kuna ya fwana vwanda na manima ya kufungula ya Bidimbu yango. Beno me mona? Ya kele kidimbu ya nsuka. Yina ke vwanda, ntangu bima yayi ke salama, ya ke vwanda na ntangu ya nsuka. Mpe ya ke vwanda kidimbu, kuna, samu ti bantu ya Kusolama kuvwanda na kati ya vwanzi ve na bima yayi. Beno me mona? Kuna, ya fwana kumonana, kuzabakana.

Beno tala, bawu nyonso zole blé na dititi ya yimbi ke zingaka na nzila ya Kupakulama mosi ya Mazulu. Bawu nyonso zole ke yangalalaka samu na Yawu.

<sup>51</sup> Mu me bambuka moyo na yayi, landila yayi yina salamaka kuna kilumbu yina na Green’s Mill. Mu—mu monaka lumoni yayi kukwiza. Mpe ya vwandaka na ntoto nene, mpe ya vwandaka nyonso ya kupasuka. Mpe kuna me basika Kikuni, na ntete. Mu zola kulakisa beno yawu mbote. Beno tala mbote yina me basika ntete, na manima yinki me landa yawu. Mpe na yina Muntu yayi ya kulwata bilele ya mpembe kumaka na nsuka ya ntoto, na kukunaka nkuna, kuna na manima ya Yandi vwandaka kwiza muntu, ya kulwata bilele ya ndombi, na kutala vwandaka kwiza kieleka na malembe, vwandaka kuna matiti ya yimbi na nswalu, na manima ya Yandi. Mpe na yina ya vwandaka salama, kuna mu monaka bankuna nyonso zole kumena. Mpe na yina ba vwandaka mena, mosi vwandaka blé mpe yankaka yina vwandaka dititi ya yimbi.

<sup>52</sup> Mpe kuna me kwiza kuyuma, mpe kuna, ya vwandaka mutindu ti, bawu nyonso zole vwandaka na bayintu na nsi vwandaka dila samu na mvula. Na manima kuna me kwiza dituti ya nene na zulu ya ntoto, mpe ya me noka. Mpe blé me telama mpe me tuba, “Nkembo na Mfumu! Nkembo na Mfumu!” Mpe dititi ya yimbi me telama mpe me looka, “Nkembo na Mfumu!

Nkembo na Mfumu!” Bandandu mosi. Bawu nyonso zole vwanda beba, bawu nyonso zole vwanda kufwa. Mpe kuna blé vwandaka me basika mpe vwandaka na mpwila ya masa. Mpe samu ba vwandaka na kati ya bilanga mosi, na disamba mosi, na kisika mosi, na yisi ya maza mosi, kuna me mena blé mpe kuna me mena dititi ya yimbi na nzila ya kima kaka mosi. Beno tala, mutindu mosi ya masa ya kupakulama me basisa blé, me basisa dititi ya yimbi.

<sup>53</sup> Mutindu mosi ya Mpeve-Santu yina ke pakulaka Dibuundu, yina ke pesaka bawu nsatu ya kuvulusa mioyo, yina ke pesaka bawu ngolo ya kusala bimangu, Yawu ke kubwaka samu na bantu ya kudedama ve mutindu mosi samu na bantu ya kudedama. Mpeve kaka mosi! Ntangu yayi, beno lenda sala mutindu yankaka ve samu na kubakula Matthieu 24:24. Yandi tubaka, “Ti Baklisto ya luvunu ke telama,” ya luvunu, bapakulami. Bapakulami na Kima ya kieleka, kasi kuvwanda bapofete ya luvunu ya Yawu, milongisi ya luvunu ya Yawu.

<sup>54</sup> Yinki lenda sala muntu kuzola kuvwanda mulongisi ya luvunu ya kima yina ke Kieleka? Awa beto ke kuma na kidimbu ya niama na baminuti fyoti, mpe beno ke mona ti ya kele denomination. Beno me mona? Milongisi ya luvunu; bapakulami ya luvunu. Baklisto ya kupakulama, kasi milongisi ya luvunu. Ya kele kaka mutindu yina beno lenda mona yawu.

<sup>55</sup> Kaka mutindu awa mwa bilumbu me luta, mu me bulaka disolo yayi ntete. Mu lenda bula disolo yango samu ti bisika nyonso na yinsi ba ke na kulanda beto na nsinga. Kilumbu mosi mu vwandaka zonza na nkundi mosi ya munu, na kisika mosi yina ke na kulanda na nsinga na suka yayi, na Arizona. Mpe yandi vwandaka na bilanga ya bayinti ya bambuma. Mpe yandi vwandaka na yinti kuna yina vwandaka yinti ya malala yina vwandaka buta malalanzi, mpe malala ya ngayi, bamandaline, ba-tangelo. Mpe mu me zimbana lutangu ya mitindu ya bambuma yina vwandaka na yinti yango na yawu mosi. Mpe mu tubaka na muntu yina, mu tubaka, “Wapi mutindu ya kele? Wapi mutindu ya yinti ya kele yayi?”

Yandi tubaka, “Yinti, yawu mosi, kele yinti ya malala.”

Mu tubaka, “Wapi mutindu ti yawu kele na malalanzi? Samu na yinki ya kele na malala ya ngayi?”

Yandi tubaka, “Ba me bwela bawu na yawu.”

<sup>56</sup> Mu tubaka, “Mu me mona. Mbote, ntangu yayi,” mu tubaka, “ntangu yayi, na mvula ke landa ntangu yinti yango ke pesa bambuma yankaka,” na kutala bawu nyonso ke yelaka na kutala na ntangu mosi, mu tubaka, “kuna yawu ke buta nyonso malala. Kana yawu kele yinti ya malala ya kukondwa bambuma, yawu ke buta malala ya kukondwa bambuma, mutindu yina ve, tata?”

Yandi tubaka, “Ve, tata. Konso kintala ke buta mutindu ya yawu.”

Mu tubaka, “Nge zola tuba ti kintala ya malala ya ngayi yayi ke buta malala ya ngayi na yinti yayi ya malala?”

Yandi tubaka, “Yinga, tata.”

“Yinti ya malalanzi ke buta malalanzi na yinti yayi ya malala?”

Yandi tubaka, “Yinga, tata. Ya kele luzingu ya kintala yina kele ya kubwela na yawu.”

Mu tubaka, “Nkembo na Nzambi!”

Yandi tubaka, “Yinki nge zola tuba?”

Mu tubaka, “Kyuvu dyaka mosi. Ntangu yayi, yinti ya malala yango yawu lenda buta dyaka malala?”

<sup>57</sup> Yandi tubaka, “Ntangu yawu ke basisa divala yankaka.” Ntangu *yawu* ke basisa kintala yankaka, ve na ntangu ba ke bwela mosi na yawu. Kasi, bawu nyonso kele bayinti ya bambuma, mpe bawu nyonso ke zingaka na luzingu ya yinti ya bambuma yina kele na kati ya yinti ya bambuma.

<sup>58</sup> Mu tubaka, “Beno bawu yayi! Methodiste ke basisa ba-Methodiste, konso ntangu. Baptiste ke basisa ba-Baptiste, konso ntangu. Catholique ke basisa Catholique, konso ntangu. Kasi Dibuundu ya Nzambi ya moyo ke basisa Klisto katuka musisa, Ndinga konso ntangu, kana ya basisa ntete kintala yankaka ya yawu Mosi.”

<sup>59</sup> Ntangu yayi, beno lenda bwela yawu na kati kuna, beno me mona. Konso malalanzi, malala ya ngayi, ba-tangelo, bamandaline, ata wapi yinti ya bambuma bawu kele, mosi na mosi ya bawu lenda zinga na yinti yina; kasi ke pesaka kimbangi ya luvunu ya yinti, na kuzingaka na nzila ya yinti. Beno me mona yawu? Bawu ke na kuzingaka mpe ke na kumenaka na luzingu ya kieleka yina kele na kati ya yinti yina.

<sup>60</sup> Ntangu yayi, beno tala Matthieu 24:24, ke na kuzingaka na nzila ya Luzingu mosi, kasi bawu kele ya tsyelika ve, na mbandukulu. Bawu ke na pesaka kimbangi ya luvunu ya Yinti yango! Ya kele yinti ya malala, ya kele dyaka yinti ya bambuma. Mpe ba ke tuba, “Dibuundu yayi, denomination yayi ke na kupesaka kimbangi ya Klisto.” Mpe bawu ke na mbotika ya luvunu, kimbangi ya luvunu ya Ndinga, na kumekaka na kutuba ti ngolo ya Nzambi vwandaka kaka samu na bilandi?

<sup>61</sup> Yesu, Yandi mosi, tubaka, “Beno kwenda na yinza nyonso mpe beno longa Nsangu ya mbote na konso divala yina ke . . . yinti ke buta ata mbala mosi ve, konso divala yina ke vwanda na yinti. Mpe bidimbu yayi ke vwanda na mavala ya kieleka.” Wapi kisika? Ntangu nyonso yina yawu kele Yinti, ntangu nyonso yina Yawu ke basisa mavala, tii na nsuka ya yinza. “Na Nkumbu ya Munu bawu ke basisa bampeve ya yimbi; ke zonza na bandinga ya malu-malu; ke simba banyoka; ke kunwa manganga ya yimbi yina ke kufwaka; ke tetika maboko na bambevo mpe bawu ke

beluka.” Beno me mona ngunga yina beto ke na kuzinga? Beno me mona yina Yesu tubaka?

Beno bambuka moyo, yayi vwandaka na ntangu ya nsuka, ve na ntangu ya ntama ya Wesley mpe na ntangu ya ntama kuna ve. Ntangu yayi, na ntangu ya nsuka, yayi zolaka salama.

<sup>62</sup> Ntangu yayi beno tala mbote Masonuku; bika ti Yawu kupesa kimbangi. Yesu tubaka, “Beno ke longokaka Masonuku, samu ti beno ke banza, to beno ke kwikila, ti Yawu ke pesa beno Luzingu ya Seko, mpe Yawu kele Yina ke pesa kimbangi ya Munu.” Na mutindu yankaka, kana yinti yayi me butaka ntete ve kintala. . . . “Mu kele Yinti, ya Vinu; beno kele mavala. Yandi yina ke kwikila na Munu, bisalu yina Mu ke salaka yandi mpe ke sala yawu,” Santu Jean 14:12.

Ntangu yayi, “Yandi yina ke vwanda ya kukangama na Munu, yandi yina . . . yandi yina vwandaka na musisa ya Munu na mbandukulu.”

<sup>63</sup> Ya kele samu na yina Yesu vwandaka nyonso zole Nsimbulu mpe Dikanda ya David. Yandi vwandaka ntete David, na kati ya David, mpe na manima ya David, nyonso zole Nsimbulu mpe Dikanda ya David; Mbwetete ya Suka, Rose ya Saron, Felele ya Lubwaku, Alfa mpe Omega; Tata, Mwana, mpe Mpeve-Santu. “Na kati ya Yandi ke zinga muvimba ya Buzambi kati na nzutu.” Nyonso zole Nsimbulu mpe Dikanda ya David!

<sup>64</sup> “Yandi yina kele Luzingu ya kusolama, Luzingu yina ba kubikaka, ya kele na kati ya Munu,” mpe Yandi kele Ndinga, “katuka mbandukulu; ntangu yandi ke kwiza, yandi ke buta bambuma ya Munu.” Santu Jean 14:12.

Kasi bayankaka ke zinga na nzila ya kima mosi, na kubokilaka bawu mosi Baklisto mpe mikwikidi. “Bawu nyonso ve yina ke tubaka, ‘Mfumu, Mfumu,’ ti ke kota.”

Ntangu yayi, yayi ke salama mpe ke monana na bilumbu ya nsuka, “ntangu mansweki ya Nzambi ke salama,” na yina beto ke kuma na yawu mwa ntangu na ntuala.

<sup>65</sup> Bayinti yayi, vinu ya tsyelika mpe vinu ya luvunu! Beno me kuwaka munu kulonga na yawu tuka, katuka bamvula me luta, mutindu bawu me kula kintwadi. Mu nataka yawu na kati ya mosi na mosi mpe lakisaka ti, katuka Cain na Abel, bavinu nyonso zole yina kubwabanaka na autel; bawu nyonso zole misambidi, bawu nyonso zole ya kupakulama, bawu nyonso zole vwandaka na nsatu ya luzingu, mpe vwandaka kembila Nzambi mosi. Mpe mosi ba losaka mpe yankaka ba ndimaka.

<sup>66</sup> Mpe mutindu kaka ti yina ba ndimaka lendaka na kusala kima ya mutindu yankaka na mpangi ya yandi: ya vwandaka ti ba monikisaka yawu na yandi. Samu ti Biblia ke tuba, “Na nzila ya lukwikilu. . . .” Hébreux, kapu ya 11, “Na nzila ya lukwikilu Abel pesaka na Nzambi munkayulu ya kulutila mbote na yina ya

Caïn, samu na yina Nzambi pesaka kimbangi ti yandi vwandaka ya kudedama.”

Yesu, tubaka ti, ya vwandaka luzayikisu ya kimpeve ya Yina Yandi vwandaka! “Yinki bantu ke na kutuba ti Mu kele Munu Mwana ya muntu?”

Yandi tubaka, Pierre tubaka, “Nge kele Klisto, Mwana ya Nzambi ya moyo.”

<sup>67</sup> “Kyese na nge, Simon—Simon, mwana ya Jonas; nzutu mpe menga ve me monikisa nge yayi. Tata ya Munu yina kele na Mazulu me monikisa nge yawu. Na zulu ya ditadi yayi Mu ke tunga Dibundu ya Munu,” (yinki?) luzayikisu ya Ndinga. Beno tala Vinu ya kieleka dyaka. “Abel, na nzila ya lukwikilu!”

Beno ke tuba, “Ya vwandaka ve luzayikisu.”

<sup>68</sup> Yinki kele lukwikilu? Lukwikilu kele kima yina ba me monikisa na beno; ya kele ntete ve, kasi beno ke kwikila ti ya ke salama. Lukwikilu kele luzayikisu ya luzolo ya Nzambi. Na yawu, na nzila ya luzayikisu!

<sup>69</sup> Mpe bubu yayi mabuundu ke na kukwikilaka dyaka ve na luzayikisu ya kimpeve. Bawu ke kwikila na malongi ya kinkulu ya kuyidika mosi. “Na nzila ya luzayikisu Abel pesaka na Nzambi munkayulu ya kulutula mbote na yina ya Caïn, samu na yina Nzambi pesaka kimbangi ti yandi vwandaka ya kusungama.” Amen. Mu banza ti beno me mona yawu. Beno me mona kisika beto ke na kuzingaka? Beno me mona ngunga?

Mu vwandaka solula na tata mosi ntama mingi ve, Muklisto ya mayela mingi mpe bakala ya mbote. Yandi tubaka, “Tata Branham, beto me manga baluzayikisu nyonso.”

Mu tubaka, “Kuna beno fwana manga Yesu Klisto, samu ti Yandi kele luzayikisu ya Nzambi, Nzambi ya kumonana na nzutu ya muntu.” Kana beno mona yawu ve, beno me zimbana.

<sup>70</sup> Yesu tubaka, “Kana ve ti beno kukwikila ti Mu kele Yandi, beno ke kufwa na disumu ya beno.” Yandi kele luzayikisu ya Nzambi, Mpeve ya Nzambi yina me monana na nzutu ya muntu. Kana beno lenda ve na kukwikila yawu, beno me zimbana. Kana beno tula Yandi muntu ya tatu, muntu ya zole, to muntu nyonso yankaka na balweka ya Nzambi, beno me zimbana. “Kana ve ti beno kukwikila ti Mu kele Yandi, beno ke kufwa na masumu ya beno.” Luzayikisu!

<sup>71</sup> Ya kele ngitukulu ve ti bawu lendaka ve na kumona Yandi. “Muntu ve lenda kwiza na Munu kana ve ti Tata ya Munu kubokila yandi. Mpe nyonso yina Tata pesaka Munu,” na kati ya misisa, “ke kwiza na Munu.” Beno me mona? Beno me tala yawu? Oh, mutindu beto zola Yandi, ke kembila Yandi, ke pesa Yandi lukumu; na kumona mbuma ya Kimpeve na bilumbu ya nsuka, mpe Yinti ya Kento ya makwela kumena na ntwala ya ntangu!

<sup>72</sup> Vinu ya kieleka mpe vinu ya luvunu, bawu nyonso zole kuzwaka kupakulama mosi. Maza vwandaka kubwa na zulu ya bawu zole. Ya kele ngitukulu ve ti Yandi kebisaka beto ti, “Yawu ke vuna bantu ya kieleka ya Kusolama kana ya lendaka salama.”

Beno tala, bawu ke talana mutindu mosi. Bawu kele ya kupakulama mutindu mosi. Kasi beno tala, “Na nzila ya mbuma ya bawu . . .” Wapi mutindu beno ke zaba yawu?

<sup>73</sup> Wapi mutindu beno ke zabaka ti ya kele ve dilala? Samu ti ya ke na kubutaka dilalanzi. Kintala yango kele nyonso mbote, yawu ke na kuzingaka na kati ya yinti, kasi yawu ke na kubutaka dilalanzi. Yawu kele ve mutindu yina ya ntete.

<sup>74</sup> Mpe kana dibuundu ke tuba ti bawu “ke kwikila Yesu Klisto mutindu mosi mazono, bubu yayi, mpe ntangu nyonso,” mpe kumanga Ngolo ya Yandi, kumanga bisalu ya Yandi, kumanga Ndinga ya Yandi; kana—kana . . . Dibundu yina ke kwikalaka na Yesu Klisto, ke sala bisalu ya Yesu Klisto, yawu ke kuzwa Luzingu ya Yesu Klisto. Mpe kana ya kele ve, ata ti kana Luzingu kutulama na yawu, kana ya kele ve yina ba kubikaka, katuka bansimbulu, yawu ke buta dilalanzi konso ntangu, to kima ya mutindu yankaka. Kasi kana yawu kele Luzingu yina ba kubikaka, na kati ya bansimbulu, yawu ke buta Yesu Klisto mutindu mosi, mazono, mpe ntangu nyonso, kana ya kele Ndinga yina ke na kumata na nzila ya Nsimbulu. Na yina, Yandi kele Nsimbulu, kubanda ya ntangu.

<sup>75</sup> Beno tala, kasi ya kele yina bawu ke basisa yina ke monikisa na beno luswaswanu. “Na nzila ya bambuma ya bawu,” Yesu tubaka, “beno ke zaba bawu.” “Ba ke bukaka ve bambuma ya vinu na yinti ya bansende,” ata ti yinti ya bansende kele tsyelika na vinu. Ya lendaka vwanda, kasi mbuma ke monikisa yawu.

<sup>76</sup> Yinki kele mbuma? Ndinga, ya ns- . . . mbuma ya nsungi. Yina kele yina yawu kele, dilongi ya bawu. Dilongi ya yinki? Dilongi ya nsungi, ya ntangu yina ya kele. Malongi ya muntu, malongi ya denomination, kasi, to Ndinga ya Nzambi samu na nsungi yango?

<sup>77</sup> Ntangu yayi, ntangu ke na kukwenda na nswalu mingi, ti beto lenda baka ntangu mingi na zulu ya yawu. Kasi mu kele na kivuvu ti beno bayina kele ya kuvwanda awa, mpe mu ke na kivuvu ti beno bisika nyonso na yinsi, lenda mona yina mu ke na kumeka na kutuba, samu ti beto ke na ntangu mingi ve samu na kuvwandila yawu.

<sup>78</sup> Kasi beno lenda mona ti Kupakulama ke kubwa na zulu ya muntu ya yimbi ve, milongisi ya luvunu, mpe ke nata bawu kieleka na kusala yina Nzambi tubaka na bawu na kusala ve; kasi bawu ke sala yawu, na mutindu nyonso. Samu na yinki? Bawu lenda ve kugangisa nzila na yawu. Wapi mutindu yinti ya bansende lendaka vwanda kima yankaka kasi yinti ya bansende? Ata lutangu ya mvula ya mbote yina ke mwangana na zulu ya yawu, yawu ke vwanda kaka yinti ya bansende. Ya kele samu



na yina Yesu tubaka, “Ti bawu ke vwanda ya kubelama mingi ti yawu ke vuna bantu ya kieleka ya Kusolama,” bayina kele na kati ya bansimbulu, “kana ya lendaka salama,” kasi ya lenda salama ve. Blé lenda sala kima ve kasi kubuta blé; ya kele nyonso yina yawu lendaka kubuta.

<sup>79</sup> Beno tala. Beno bambuka moyo ti, Nzambi kele ve mfumu ya ba-organisation. Dyabulu kele mfumu ya ba-organisation. Mu me lakisaka yawu na nzila ya Ndinga, bambala mingi, bambala na bambala; mu zola kukota na yawu ve na suka yayi. Beto zaba ti ata mbala mosi ve ti Nzambi kubongisaka bantu kintwadi mutindu yina, ti salaka organisation. Bankama ya bamvula na manima ya lufwa ya kilandi ya nsuka, ti bawu salaka organisation ya ntete. Yawu ke lakisaka kubwa konso ntangu. Kana ya kele yawu ve, samu na yinki beto kele kintwadi ve na luzolo bubu yayi, ba-Methodiste, ba-Baptiste, ba-Presbyterien, ba-Catholique mpe bayankaka? Samu na yinki bisalu ya Nzambi kele na beto ve, kuna, mabuundu nyonso na kima mosi, Ndinga? Bima yango kele yina ke kabulaka bantu, bampangi . . . Beto kele ntama mingi na Nzambi kulutula yina beto vwandaka ntete, mabuundu, mu zola kuzonza.

<sup>80</sup> Ntangu yayi, ba tubaka na beto ti, “Bima nyonso ya ntama kusalamaka mutindu bifwanusu, samu na kupesa beto malongi, na kundimisa beto, na kusemba beto.” Ti bima nyonso ya ntama ya Ngwisani ya Ntama kusalamaka, kuzonzamaka, samu na kumona yinki ke vwanda na Ngwisani ya Malu-malu, na kilumbu ya beto.

<sup>81</sup> Kaka mutindu kana ata mbala mosi ve ti beno me monaka diboko ya beno, mpe ti beno kutelemisa meso mpe ti beno kumona kivudi na kibaka, mutindu diboko ya munu lendaka vwanda na ntwala ya mwinda. Kana ya kele na misapi tanu awa na kivudi (ntangu negatif), mpe ti beno kunata diboko ya beno na ntwala ya beno (yina kele positif), na ntwala—na ntwala ya negatif, ya fwana sala misapi tanu.

<sup>82</sup> Mutindu Biblia ke tuba na beto, ti, “Ngwisani ya Ntama vwandaka kinsinsya, kifwanukusu ya bima ya mona, to ya bima yina ke na kwisa; ve bima ya tsyelika yina kele, kasi ya kele kivudi, kifwanukusu ya bima yina ke na kwisa.”

<sup>83</sup> Bika beto vutuka mpe kumona kana bima yayi vwandaka ntete na mosi ya bansungi yankaka. Beno zola? [Dibuundu me tuba, “Amen.”—Mu.] Na yawu beto ke zaba, kulakisa yayi, na mutindu nyonso, na nzila ya Ndinga; na nzila ya dibanza ya muntu mosi ve, na nzonzolo mosi ve.

<sup>84</sup> Mu ke kipe ve nani yandi kele; kana ya vwanda muntu nyonso yankaka, munu mosi to muntu nyonso yankaka, “Kana yandi ke zonga ve landila musiku mpe bapofete, kuna Nsemo kele ve na kati ya yandi.” Beno me mona? Ya kele yina Biblia ke tuba.

“Bika ti konso ndinga ya muntu kuvwanda luvunu, mpe ya Munu kuvwanda kieleka,” ata ya nani ya lendaka vwanda.

Ntangu yayi beto vutuka mpe beno tala kana yayi kusalamaka ntete, samu na kulakisa beto kifwanukusu.

<sup>85</sup> Beto lenda vutuka ntangu yayi na Buku ya Exode, mpe kuna kuzonzila na muntu ya nkumbu ya Moïse, yandi yina vwandaka profete ya kupakulama yina Nzambi tindaka, na Ndinga ya Nzambi mpe luzolo ya Nzambi samu na nsungi ya yandi. Mutindu Ndinga ya Nzambi ke tambulaka na kukwendaka na ntwala, Yandi tubaka, “Yandi ke salaka kima ve kana ti Yandi kulakisa Yawu ntete na bapofete ya Yandi.” Na manima Yandi salaka yawu. Uh-huh.

Ntangu yayi, Yandi lenda ve kuvuna. Yandi lenda ve kuvuna mpe kuvwanda Nzambi. Ve, tata. Yandi fwana vwanda kaka kieleka. Ya kele ve na luvunu na kati ya Yandi. Yandi kele. . .

<sup>86</sup> Mpe Yandi lenda ve kusoba Yawu. Kana Yandi lendaka sala yawu, kuna Yandi kele ve Nzambi; Yandi me sala kifu. Yandi fwana vwanda ya kukondwa nsuka. Mpe ya kukondwa nsuka lendaka sala ve kifu. Beno me mona? Na yawu yina nyonso Nzambi ke tuba, yina kele ya kieleka ya Seko. Beno me mona? Mpe Yandi silaka yawu. Na yawu, beno tala mbote, ya kele na kisika mosi ve na kati ya Biblia yina yawu kondwaka na kulanda na kukwenda kaka na ntwala na yawu.

<sup>87</sup> Ntangu yayi, Nzambi silaka Abraham ti nkuna ya yandi ke vwanda nzenza na—na yinsi ya nzenza bamvula nkama yiya, mpe na manima Yandi ke basisa bawu na diboko ya nene mpe ya ngolo, ke lakisa bidimbu ya Yandi mpe bimangu na kati-kati ya bantu yina bawu vwandaka zinga. Ntangu ya nsilulu vwandaka me belama. Bantu vwandaka me zimbana yawu. Ba vwandaka na ba-Pharisien mpe ba-Sadducéen, mpe nyonso yina, ba-denomination. Kasi, na mbala mosi, kuna me kwisa Nzambi, me katuka mpe me kwenda na lweka, na ngaanda, ntama na nyonso ya bawu.

<sup>88</sup> Ata mbala mosi ve ti Nzambi, na kilumbu mosi to na ntangu mosi, bokilaka ntete profete na denomination. Ve, tata. Yandi ke vwanda ya kutengama mingi, yandi lendaka ve kusala yawu; yandi zolaka vwanda na denomination yango.

<sup>89</sup> Moïse, muntu yina Nzambi tindaka, na Ndinga ya Nzambi, mpe na nzila ya yandi na kunataka Israël na yinsi ya nsilulu, yandi kangamaka kieleka na misiku ya Nzambi, yandi kutanaka na profete yankaka, mupakulami yankaka yina vwandaka na kupakulama ya kieleka ya Mpeve-Santu mosi yina vwandaka na zulu ya Moïse. Ya ke kieleka. Yandi vwandaka profete. Mpeve-Santu vwandaka na zulu ya muntu yayi. Nkumbu ya yandi vwandaka Balaam. Beto nyonso zaba yandi. Mbote, mambu ya kieleka, mutindu mosi, mambu—mambu yina muntu yayi tubaka, kele dyaka na kusalamaka, na kutala ya me luta

mafunda zole na bankama nana ya bamvula. “Nge kele mutindu mpakasa, O Israël. Muntu nyonso yina ke sakumuna nge ke vwanda ya kusakumuka. Muntu nyonso yina ke singa nge ke vwanda ya kusingama. Ngolo ya nge, lulendo ya nge, mutindu batenta ya nge kele ya kulunga, O Jacob!” Beno me mona, yandi lendaka ve na kukangisa nzila na yandi mosi. Yandi kwisaka kuna na dibanza na kati ya ntima ya yandi ya kusinga bantu.

<sup>90</sup> Oh, beno milongisi ya luvunu yina me kuwa babande yayi bamvula nyonso yayi, mpe me mona Nzambi kusiamisa kieleka yina Yandi tubaka, mpe beno ke kangama na ndongokolo ya beno mpe beno zaba ti ya kele Kieleka; mpe samu na baluswaswanu ya ba denomination ya beno, beno ke sala ntembe na yawu mpe ke tuba na bantu ya beno ti ya kele kieleka ve. Mawa na beno! Ntangu ya beno me belama.

<sup>91</sup> Balaam, vwandaka ya kupakulama na Mpeve mosi yina vwandaka na zulu ya Moïse. Luswaswanu vwandaka yinki? Ndongosolo ya Moïse vwandaka ya kulunga. Biblia ke tuba awa na Pierre ya Zole, ti ya vwandaka “malongi ya Balaam” yina Israël kuzwaka, ya kele yina Nzambi lemvokilaka ata mbala mosi ve. Disumu ya kulemvokila ve! Ata mosi ve ya bawu vulukaka, ata ti bawu kubasikaka na yisi ya balusakumunu ya Nzambi, mpe monaka diboko ya Nzambi kusala na nzila ya profete yayi ya nene, mpe monaka yawu kusiamisama kieleka na Nzambi. Mpe, samu ti, profete yankaka me kwiza na ndongosolo, ya mutindu yankaka, mpe me telemina Moïse, mpe me meka na kulakisa na bantu ti Moïse vwandaka na kifu. Mpe Dathan, Koré, mpe mingi ya bawu, ndimaka na yandi mpe tubaka na bana ya Israël na kusala kindumba, na kulanda organisation ya yandi, ti, “Beto nyonso kele mutindu mosi.”

“Ata ti beto kele ba-Methodiste, ba-Baptiste, ba-Presbyterien, to ba-Pentecotiste, mpe yinki dyaka, beto nyonso kele mutindu mosi.”

<sup>92</sup> Beto kele ve mutindu mosi! Beno kele bantu ya kukabwana, ya santu samu na Mfumu, ya kupesama samu na Ndinga mpe Mpeve ya Nzambi, samu na kubuta mbuma ya nsilulu ya Yandi ya kilumbu yayi. Mpe beno kele ve mosi ya bawu! Mu zaba ti ya ke pesa mingi boma, kasi ya kele kaka Kieleka. Ya kupesama samu na kisalu na bilumbu ya nsuka yayi! “Beno basika na kati-kati yawu.”

<sup>93</sup> Ntangu yayi, “ndongosolo ya Balaam,” profesi ya Balaam ve. Ya vwandaka nyonso tsyelika. Ya vwandaka Nzambi. Bantu yikwa ke kwikila yawu? [Dibuundu me tuba, “Amen.”—Mu.] Profesi ya Balaam vwandaka kieleka ya kulunga, samu ti yandi lendaka kuzonza kima yankaka ve. Kupakulama ya Nzambi zolaka zonza kima yankaka ve, mpe Nzambi siamisaka yawu na kulakisa ti yawu vwandaka Kieleka. Kasi ya vwandaka “ndongosolo ya Balaam.”

Ntangu yayi beno fwanikisa yawu na Matthieu 24:24. Bapakulami, kasi ndongosolo ya bawu kele ya luvunu. Babutatu Nzambi, mpe bima nyonso ya mutindu yina; luvunu, mbeni ya Klisto!

<sup>94</sup> Mu banza ti ya me nyongisa beno ve. Mpe beno zenga ve, beno zenga ve ba-allo-allo. Mpe beno telama ve mpe beno kubasika ve. Beno vwanda kaka swi, mpe beto mona kana Mpeve-Santu ke lakisa yawu na beto ve, mpe kupesa beto kimbang'i ya yawu. Beno ke tuba, "Kasi yina . . ." Ata nyonso yina beno ke kwikilaka, beno vwanda kaka swi mpe beno kuwa. Mpe beno lombamba Nzambi na kufungula ntima ya beno, kuna beno ke zaba kana beno kele matiti ya bansende, to yinti ya bansende, to wapi kisika beno kele. Beno me mona?

<sup>95</sup> Ntangu yayi, mpe Judas, "ba kubikaka yandi samu na kuzwa lufundusu," yandi vwandaka kuna ntete Yesu. Mpe Yesu tubaka na yandi, "Nge kele yandi yina. Nyonso yina nge ke sala, mpe nyonso yina nge fwana sala, kwenda sala yawu na nswalu." Yandi na kuzabaka yina yandi vwandaka sala, kasi, samu na bapalata makumi tatu ya mbongo, mpe samu na lukumu, yandi tekaka Mfumu Yesu Klisto. Mosi ya bilandi ya Yandi, kibumbi-mbongo ya dibuundu, Yesu bokilaka yandi "nkundi" ya Yandi. Beno me mona? Biblia ke tuba ti, "Yandi butamaka mwana ya nzimbusulu," mutindu kaka mosi Yesu kubutukaka Mwana ya Nzambi. "Ke vuna bantu ya kieleka ya Kusolama kana ya lendaka salama."

<sup>96</sup> Beno tala mbote na yina beto ke na kulanda ndongokolo ya beto. Beto ke baka mwa minuti yankaka, na Buku ya Rois. Ya vwandaka na—na profete mosi, mpe nkumbu ya yandi vwandaka Michée. Yandi vwandaka mwana ya bakala ya Jimla, mpe yandi vwandaka profete. Yandi vwandaka yawu.

<sup>97</sup> Mpe ya vwandaka na profete yankaka, mfumu ya organisation ya baprofete, bapakulami. Biblia ke tuba ti bawu vwandaka "baprofete," kaka mutindu mosi Yandi tubaka ti Balaam vwandaka profete, bapakulami.

Mpe ya vwandaka na mosi ya bawu na nkumbu ya Michée, yina vwandaka ya kupakulama na Nzambi mpe yina Nzambi tindaka, na Ndinga ya Nzambi.

<sup>98</sup> Ya vwandaka na mosi, Sédécias, yina vwandaka banza ti Nzambi tindaka yandi. Yandi vwandaka mupakulami ya Nzambi, kasi ndongosolo ya yandi vwandaka ya mutindu yankaka na Ndinga ya Nzambi. "Ke telama, Baklisto ya luvunu, bawu ke sala bidimbu ya nene, samu na kuvuna bantu ya Kusolama kana ya lendaka salama."

<sup>99</sup> Beno tala, bawu nyonso zole, bawu nyonso zole vwandaka ya kupakulama. Ntangu yayi, wapi mutindu beno zolaka tuba ti yandi yayi vwandaka ya kieleka, mpe ti yandi yayi ya luvunu? Beno tala mbote yina Ndinga silaka samu na Achab. Profete

yina vwandaka na ntwala ya yandi, ya vwandaka Élie, mosi ya bapofete ya nene ya nsungi, yandi vwandaka profete yina ba siamisaka. Profete yango yina ba singisaka tubaka, ti, “Samu Achab me sala dyambu ya yimbi yayi, na yawu bayimbwa ke kunwa menga ya yandi; na kukatula luzingu ya Naboth. Mpe ti bayimbwa ke kudya Jézabel, mpe. . . nzutu ya yandi ke vwanda mutindu matiti ya kubola na bilanga.” Ntangu yayi, wapi mutindu beno lendaka sakumuna yina Nzambi me singa? To wapi mutindu beno lendaka singa, mutindu Balaam tubaka, yina Nzambi me sakumuna? Beno me mona?

<sup>100</sup> Kasi bapofete yayi vwandaka bantu ya tsyelika. Ba vwandaka na kutala kukondwa ntembe bantu ya mbote, bantu ya luzitu. Samu ti, samu na kuvwanda profete na Israël, nge fwana vwanda ya kuzitisa, to dyaka na kuvwanda muntu ya Israël. Ba zolaka losa nge matadi, kana ve. Ba vwandaka bantu ya luzitu. Ba vwandaka bantu ya mayele mingi. Ba vwandaka bantu yina tangaka. Ba vwandaka nsodolo ya Achab, ya yinsi. (Nge me mona yawu, Mpangi-kento Wright?) Nsodolo ya yinsi, ba vwandaka ya kulunga na . . .

Mpe ntangu yayi, ntangu Michée monaka vision ya yandi, yandi zabaka na kati ya ntima ya yandi yinki Ndinga vwandaka tuba, kasi yandi vwandaka zola kumona yina Mpeve yina vwandaka na kati ya yandi zolaka tuba.

<sup>101</sup> Na yina ba tubaka na yandi, ba tubaka, “Nge tuba kima mutindu mosi na yina bapofete yankaka yayi me tuba. Mpe na yina nge ke sala yawu, kuna, nge ke vwanda, beto ke ndima nge na kimvuka, kukondwa ntembe, dyaka. Beno me mona? Beto ke sala nge mosi ya beto. Beto ke vutula nge na kati ya denomination ya beto. Nge kele. . . Beto zaba ti nge kele profete, kasi nge konso ntangu ke tubaka mambu ya yimbi. Nge konso ntangu ke tubaka mambu ya yimbi na Achab. Ntangu yayi, Sédécias, mfumu, pape, to. . .” ata nyonso yina ya vwandaka. “Ntangu yayi yandi vwandaka me sakumuna Achab, mpe vwandaka me tuba, ‘Kwenda sala yawu.’ Ntangu yayi tuba kima mutindu mosi, Jimla. Na kutala, nge kele kaka muntu ya mputu. Nge kele na ata dibuundu ve, ata fyoti, ve. Mpe bantu yayi kele na mafuku ya mbongo. Yinsi nyonso kele ya bawu. Ntangu yayi tuba mutindu mosi bawu me sala, mona yina nge ke sala, nge—nge ke kudya bimvwama ya yinsi.” Yandi vwandaka tuba na muntu ya kulunga ve awa!

Yinki kana ba tubaka, “Michée, nge lenda tala foti na Sédécias?”

“Ve.”

“Nge me simbaka yandi ntete na disumu?”

“Ve.”

“Nge me kuwaka yandi ntete kufinga muntu?”

“Ve.”

“Nge me simbaka yandi ntete ya kulawuka na malafu?”

“Ve.”

“Nge lenda sala ntembe na ndongosolo ya yandi?”

“Ve.”

“Nge ke kwikila ti diplome ya doctorat ya yandi kele ya luvunu?”

“Ve.”

“Nge ke kwikila ti doctorat ya yandi—ya yandi ya philosophie kele ya mbote?”

“Kieleka. Landila kimvuka ya bakuluntu, mu banza ti ya kele nyonso . . . kimvuka, mu banza ti ya kele nyonso ya kulunga.”

“Kasi, na yina, samu na yinki nge lenda ve kuvukana na yandi?”

“Samu yandi kele na ngaanda ya Ndinga!”

<sup>102</sup> Mbote, beto ke luta na kuteza ya yawu, kuna, mutindu Élie profete kuzwaka ntete yayi. Mpe kana beno kele mwana ya Nzambi, beno ke vwanda na profete ya Biblia yayi. Ya kele Ndinga. Beno tala ngunga, nsungi.

Mbote, yinki kana Sédécias tubaka, “Oh, mu zaba ti profete tubaka yawu, kasi ya kele samu na nsungi yina ke kwisa. Ya kele samu na ntangu ya ntama katuka ntangu yayi?”

Yandi tubaka, “Beno vingila tii mu ke kuzwa vision ya Nzambi, mpe kuna mu ke tubila nge.”

Yandi me tuba, “Na yawu nge ke tuba kima mutindu mosi?”

Yandi tubaka, “Mu ke tuba kaka yina Nzambi ke tuba; kima yankaka ve, kima dyaka ve. Mu lenda bwela mpova mosi na Yawu ve, to kukatula Ndinga mosi na Yawu ve.”

Na yawu na mpimpa yina, Mfumu kwizaka na yandi na vision. Yandi basikaka na suka yina vwandaka landa, yandi tubaka . . .

Beno tala baprofete zole!

<sup>103</sup> Muntu ya nene na yinsi, na kutala na meso landila lutangu ya basoda mpe na yinsi, vwandaka Sédécias. Yandi vwandaka mfumu profete, nzila ya ntinu. Yandi vwandaka mfumu ya baprofete nyonso yankaka, na nzila ya organisation. Ba soolaka yandi, na organisation ya yandi, mfumu ya bawu nyonso; kukondwa ntembe muntu ya kulutila mayele, yina tangaka mingi, yina vwandaka ya kulunga samu na kisalu yango. Mpe yandi vwandaka ya kupakulama na Mpeve-Santu, samu ti ba vwandaka bokila yandi “profete.” Kieleka, kaka profete ya mpamba ve, yandi vwandaka profete Hébreux. Ntangu yayi beno tala yandi mbote.

104 Sédécias tubaka, “Mfumu me zonza na munu, ‘Sadila Munu bibongo zole ya kisengo,’ kidimbu.” Profete bambala mingi ke pesaka bidimbu. “Yandi tubaka, ‘Sala bibongo yango na kisengo.’ Mpeve-Santu tubaka na munu, ‘Baka yayi,’ Kupakulama yina sakumunaka munu.” Beno banza yawu ve mutindu munkayulu, kasi samu na kukuma kisika. “Mpeve-Santu yina zonzaka na nzila ya munu na bandinga ya malumu, Yandi yina siamisaka munu, Yandi tubaka, ‘Baka bibongo yayi, mpe, na nzila ya yayi, zonza na ntinu ti yandi ke tula Syrie na ngaanda ya yinsi. Mpe ti Mu ke vtula yandi yinsi yina kele tsyelika ya Israël, dibuundu.”

105 Mpangi ya bakala, yina kele kieleka misiku, kaka na kutala mutindu Balaam vwandaka na zulu awa. Balaam vwandaka kaka mutindu ya misiku na kuzonza mutindu vwandaka Moise. Moise. . . Lutangu ya tsyelika ya Nzambi kele sambwadi. Mpe Balaam tubaka, “Tungila munu ba-autel sambwadi; minkayulu sambwadi ya bunkete, bangombe ya babakala, mpe bankombo ya babakala sambwadi.” Yina ke zonzila na kwizulu ya Mwana ya Nzambi. Landila misiku, yandi vwandaka tsyelika ya kulunga mutindu bawu nyonso.

106 Mpe awa kele Sédécias, kaka mutindu ya kulunga landila misiku, “Samu ti yinsi yayi kele ya beto. O, ba-Syrien mpe ba-Philistin kele na kufulusaka kuna mavumu ya bawu, ya bana ya bawu mpe nyonso yina, bambeni ya beto, na madya yina bana ya beto lenda ve kuzwa! Na yina ti, Nzambi pesaka beto yinsi yayi!”

107 Mpangi ya bakala, yina kele mutindu ya kuzonza ya mbote. Mu banza ti yandi lendaka na kuzonza yawu na ngolo na ntwala ya Israël, mpe ti bawu lendaka na kuboka na ngolo nyonso ba lendaka. Ntangu yayi, mu ke na kuzonzilaka yina me tala bubu yayi ntangu yayi. Mu banza ti beno ke na kulandaka munu. Makelele nyonso yina, muvusu nyonso yina!

108 Beno me bambuka moyo na David Lumingu me luta? Beno me mona? Beno kuna na yinsi ya radio, to yinsi yina ke na kulanda na allo-allo yayi; beno kuzwaka ve Nsangu ya Lumingu me luta, tsyelika beno kuzwa yawu. *Kumeka na Kusadila Nzambi Kisalu Kukondwa Ba Tumisa Nge Na Kusala Yawu*, ata mutindu tsyelika, mbote, tsyelika na Nzambi ya kele ya kundima ve. Beno me mona?

Ntangu yayi, awa vwandaka Sédécias, yina vwandaka banza ti yandi vwandaka ya kulunga.

Michée tubaka, “Bika munu kuyufula Nzambi.” Na yawu yandi kuvutukaka na suka yina vwandaka landa na MUTINDU ME TUBA MFUMU. Yandi fwanikisaka vision ya yandi na Ndinga.

Ntangu yayi kana yandi tubaka na Sédécias, “Nge zaba yina profete ya Biblia awa tubaka yina ti zolaka salama na muntu yayi?”

<sup>109</sup> “Kasi na ntangu yayi ve, samu ti muntu yayi kele muntu ya luzitu. Yandi ke na kumeka.” Beno kondwa yayi ve. “Yandi ke na kumekaka na kuvutula na dibundu bima yina kele ya dibuundu. Yandi ke na kumekaka na kuvutula yina ya yandi,” bima ya Kimpeve ve; kana ya vwandaka mutindu yina, yandi zolaka ningisa yinsi nyonso mutindu Élie salaka. Kasi, vwanda meka na kupesa bawu bima ya ntoto, “Beto kele na bimvwama. Beto kele organisation ya nene. Beto kele na kati ya yawu. Beto nyonso, beno bantu nyonso, beno bantu ya Misyoni, beno fwana kuvukana beno nyonso na beto.” Uh-huh.

<sup>110</sup> Beto ke kuma kuna na mwa ntangu fyoti. “Bawu nyonso kele bampangi ya babakala mpe bampangi ya bakento, na kutala.” Ya kele yawu ve! Ata mbala mosi ti ya vwandaka mpe ata mbala mosi ti ya kele, na Dibundu ya kieleka ya Nzambi. Ya lenda vwanda ve!

<sup>111</sup> Beno tala, yandi monaka vision. Mpe na yawu yandi tubaka, “Nzambi me zonza na munu.” Ntangu yayi, beno tala, muntu yayi vwandaka muntu ya kieleka. Yandi tubaka, “Yandi tubaka, ‘Sala bibongo yayi, mpe mata kuna na ntwala ya ntinu mpe beno kwenda na ntwala na lweka ya weste,’” to na nzila nyonso ya ntoto katuka kisika bawu vwandaka. “‘Beno kwenda na ntwala, mpe ya ke vwanda MUTINDU ME TUBA MFUMU, ti yandi ke nunga mpe ke vutuka, nungunu samu na dibuundu.’ Beto ke bingisa bawu!” Yina kele kieleka ya kubelama, mutindu yina ve? Yinki vwandaka dyambu?

Awa ke na kwisa Michée. Ba me tuba, “Ntangu yayi pesa profesu ya nge.”

“Beno mata! Kasi mu me mona Israël mutindu mameme, ya kumwangana, ya kukondwa muvungi.” Fiou! Kieleka mosi na yankaka.

<sup>112</sup> Ntangu yayi, beno kele dibuundu. Ntangu yayi nani kele ya kulunga? Bawu nyonso zole, baprofete. Na nzila kaka mosi beno lenda tala luswaswanu na kati ya bawu, ya kele, beno fwanikisa yawu na nzila ya Ndinga.

Ba tubaka, “Wapi kisika nge me kuzwa yayi?”

Yandi tubaka, “Mu monaka Nzambi ya kuvwanda na zulu ya Kiti ya kimfumu.” Yandi tubaka, “Mu monaka kimvuka nyonso pene-pene ya Yandi.”

<sup>113</sup> Ntangu yayi beno bambuka moyo ti, Sédécias tubaka kaka ti yandi kumonaka Nzambi, mpe, na Mpeve mosi. “Mu monaka Nzambi. Yandi tubaka na munu na kusala bibongo ya—ya kisengo. Na kukwenda kuna mpe na kutula na ngaanda bayinsi yayi awa, samu ti yayi kele ya beno. Bayankaka kele na muswa



ve na yawu.” Ba zolaka kuzwa yawu kana bawu kangamaka na Nzambi. Ba zolaka kuzwa yawu, kasi ba kwendaka ntama na Nzambi.

<sup>114</sup> Ya kele mutindu organisation kele, dibuundu. Yandi kele na muswa na bima yayi, kasi ba me yiba beno yawu, samu ti beno me kwenda ntama na Ndinga ya Nzambi mpe Mpeve ya Nzambi, kupakulama, samu na kusiamisa Ndinga ya nsungi. Beno kondwa ve na kuzwa Nsangu yayi.

<sup>115</sup> Beno tala yina ke na kusalamaka ntangu yayi. Yandi tubaka, “Mu monaka Nzambi,” Michée talaka yawu, “ya kuvwanda na zulu ya Kiti ya kimfumu na Mazulu. Kimvuka ya Yandi vwandaka ya kuvukana pene-pene ya Yandi. Yandi tubaka, ‘Nani beto lenda kuzwa yina lenda kulumuka kuna mpe kuvuna Achab, samu na kusala ti bampova ya Élie kuvwanda ya tsyelika, profete ya Munu yina kimbangi kupesamaka. Mu zonzaka ti yandi zolaka kwiza. Mpe Élie vwandaka na Ndinga ya Munu. Mpe mazulu na ntoto ke luta, kasi Ndinga ya Munu ke kondwa ve. Mu ke kipe ve mutindu bawu ke kuma na mambu ya bilumbu yayi, to mutindu mbote bawu ke kuma, to mutindu bawu ke kuma ya mayele mingi, to mutindu nene bawu kele, Bampova ya Munu ke kondwa ata mbala mosi ve.’

<sup>116</sup> “Mpe mpeve mosi ya luvunu me basika na difelo, me fukama, mpe me tuba, ‘Kana Nge zola kaka kupesa munu muswa, mu lenda pesa bawu kupakulama ya munu, kunata bawu na kusala mutindu nyonso ya kidimbu to ya dyambu ya ngitukulu, samu kaka mu nata bawu ntama na Ndinga. Yandi ke zaba kwandi ve ti Yina kele Ndinga ya Nge. Yandi ke manga Yawu, samu na lukumu.’” Mpangi ya bakala, bantangu me soba ve. Mpangi Neville, ya kele tsyelika. Nge me bambuka moyo, ya kele tsyelika. “‘Mu ke kota na yandi, mu ke nata yandi na kusala bima ya mutindu mosi na yina bawu nyonso ke na kusalaka. Mu ke nata yandi na kusala profesi, mpe kutuba luvunu.’” Wapi mutindu ya zolaka vwanda luvunu? Samu ti ya vwandaka ya kuswaswana na Ndinga.

<sup>117</sup> Beno tala bambotika nyonso yayi ya luvunu, *bima yayi mpe yina* ya luvunu, mu ke kipe ve mutindu tsyelika ya lendaka wakana, ata mutindu bawu ke na kumeka na kulanda, ya kele luvunu kana ya kele ya kuswaswana na Ndinga ya Nzambi ya ngunga yayi. Ya kele tsyelika.

Beno ke tuba, “Mbote, na beto, mbote, beto salaka *yayi*, mpe beto ke salaka *yayi*, mpe dibuundu ya beto kele mutindu *yayi* mpe mutindu *yina*.”

<sup>118</sup> Mu ke kipe ve yina ya kele. Kana ya kele ya kuswaswana na Ndinga ya kusonama ya ngunga yayi, ya kele luvunu. Nzambi ke kuzwa kima mosi ve ya kusala na yawu, ata mutindu ya kele kieleka, mutindu ya kele ya mayele, mutindu ya kele ya mayele mingi, mutindu ya ke wakana kieleka, mutindu ya ke wakana

ya kulunga, kana ya kele ya kuswaswana na Ndinga ya ngunga yayi. Beto ke kota na yawu mwa mingi na baminuti fyoti, kana beto kuzwa ntangu. Kana beto kuzwa ntangu ve, beto ke baka dyaka yawu na nkokila yayi.

<sup>119</sup> Beno tala, yandi vwandaka muntu ya kusungama, muntu ya mbote, kukondwa ntembe. Mpe yandi tubaka . . . Kuna, na mutindu yankaka, Michée tubaka na yandi, yandi zonzilaka yandi yawu na mutindu ya pwelele ve, kasi na mutindu yankaka, “Nge kele ya kupakulama na mpeve ya luvunu.” Yina lenda vwanda dyambu ya kutuba na évêque? Kasi yandi salaka yawu.

<sup>120</sup> Mpe na yawu évêque yayi me belama mpe me tuba, “Nge ke vukana dyaka ata mbala mosi ve na beto,” mpe me pesa yandi mbata na kizizi. Yandi tubaka, “Nge zaba ti mu kele muntu ba siamisaka. Dibuundu ya munu me tula munu mfumu ya yawu, ya kima yayi. Voti ya bantu nyonso ya bantu ya Nzambi me tula munu awa. Organisation ya munu me tula munu awa. Mpe Nzambi pesaka beto yinsi yayi, mpe dibanza ya Yandi kele ti ya vwanda ya beto. Mpe mu kele na MUTINDU ME TUBA MFUMU.” Yandi me pesa yandi mbata, mpe me tuba, “Na wapi nzila Mpeve ya Nzambi me kwenda na yina Yawu me katukila munu?”

<sup>121</sup> Michée me tuba, “Nge ke zaba yawu, mosi ya bilumbu yayi,” ntangu Californie ke kwenda na yisi ya mubu kuna, mpe bima nyonso yayi. Beno me mona? “Nge ke mona na wapi nzila Yawu me kwenda, ntangu nge ke vwanda ya kuvwanda na kati ya boloko na manima.”

<sup>122</sup> Ntangu yayi, Achab, yinki nge ke tuba? “Mu ke kwikila profete ya munu,” yandi tubaka. Yinki kana yandi talaka kaka na Ndinga? Beno me mona, yandi zolaka ve kumona ti ba loka yandi mosi. Beno kuwa munu! Yandi zolaka ve kumona ti ba loka yandi mosi. Muntu ve zola yawu.

<sup>123</sup> Mpe ya munu organisa- . . . mpangi-bakala ya ba-organisation, dyambu na beno kele yina. Beno zola kubanza ti beno kele ya kulunga, na yina, na kati ya ntima ya beno beno zaba ti, ntangu beno ke botikaka na kubakaka nkumbu ya “Tata, Mwana, Mpeve-Santu,” ti beno ke na kuvunaka. Beno zaba ti ntangu beno ke zonz- . . . beno ke tuba bima yango yina beno ke na kusala, mpe kubaka bidimbu ya ntete, mpe bima nyonso ya mutindu yina, beno kele na kifu. Wapi mutindu kimbangi ya ntete lendaka vwanda kuzonza na bandinga ya malu-malu, mpe kuna kuzonza mutindu yankaka na nsilulu ya Nzambi na ngunga yayi? Wapi mutindu ya lendaka vwanda? Beno zola ve nsingulu, beno zola yawu? Kasi *Awa* ya kele ya kusonama, na yawu ya ke vwanda mutindu yina. Yina kele kidimbu ya niama, ke belama mingi ti ya lendaka vuna bantu ya Kusolama kana ya lendaka salama.

<sup>124</sup> Na bidimbu nyonso, na mambu nyonso ya ngitukulu, na bantu nyonso ba me pakula, na baprofesi nyonso, na mutindu nyonso ya bima yina ke na kusalama; na mutindu nyonso ya bidimbu, na mutindu nyonso ya mambu ya ngitukulu, wapi mutindu beno lenda sala luswaswanu? Beno tala mbote na Ndinga ya ngunga yayi. Ya kele mutindu beno. . .

Beno tala mbote Moïse, mutindu yandi lendaka na kutuba na Balaam. Beno tala mbote Michée awa, wapi mutindu beto zabaka ti yandi vwandaka ya kulunga? Ndinga, na ntwala ya yandi, pesaka profesi ya yawu samu na Achab.

<sup>125</sup> Mpe Ndinga, na ntwala ya beto, pesaka profesi ya ba-organisation yayi ya kilumbu yayi, mpe ndoko yayi yina ke vwanda na zulu ya bawu. Mpe bima yina ke salama na nzila ya Dibuundu ya Yandi ya kieleka ya kupakulama, yina ke vwanda na Ndinga, Kento ya makwela ya Ndinga. Beto bawu yayi. Yawu yayi awa, bubu yayi, kaka mutindu ya vwandaka kuna.

<sup>126</sup> Biblia ke tuba, “Na yinwa ya bambangi zole to tatu ti konso dyambu kundimama.” Mu vwandaka me zonzila na Balaam, mu vwandaka me zonzila na Balaam mpe na Moïse. Mpe malu-malu yayi mu vwandaka me zonzila na Michée mpe Sédécias. Ntangu yayi mu ke pesa mosi dyaka. Yina, ya kele na bankama ya bawu, kasi mosi dyaka, samu na kusala bambangi tatu. Mu kele na yawu nyonso ya kutanda ya kusonika awa; kasi samu na kulanda ntangu.

<sup>127</sup> Jérémie vwandaka yina ba pesaka kimbangi, ba mangaka yandi, kasi profete yina Nzambi pesaka kimbangi. Ba yinaka muntu yango. Ba vwandaka losa ya nku- . . . bambuma yina yelaka mingi na zulu ya yandi, mpe nyonso yankaka. Mpe yandi losaka bawu ndoko. Mpe bima yina yandi salaka, mpe na yina yandi kulalaka kuna na balweka ya yandi, mpe bima, mpe yandi pesaka bidimbu ti Israël vwandaka na kifu.

<sup>128</sup> Konso profete, profete ya tsyelika yina telamaka ntete na yinza, losaka ndoko na ba-organisation ya mabuundu ya nkumbu yango ya dibuundu. Wapi mutindu ya lendaka soba, na nzila ya Nzambi yina ke sobaka ve?

<sup>129</sup> Mpeve-Santu kele Profete ya ngunga yayi; Yandi ke siamisa Ndinga ya Yandi, ke monikisa Yawu. Mpeve-Santu vwandaka Profete na ntangu ya ngunga ya Moïse. Mpeve-Santu vwandaka Profete na ntangu ya ngunga ya Michée. Mpeve-Santu, yina sonikaka Ndinga, ke kwisa mpe ke siamisa Ndinga.

Ntangu yayi yinki salamaka na ntangu ya Michée? Ba kufwaka Achab, mpe bayimbwa kunwaka menga ya yandi, landila Ndinga ya Nzambi.

<sup>130</sup> Beno milongisi nyonso ya luvunu, mutindu yayi me tuba Nzambi, ya kele na kilumbu beno ke buka yina beno me kuna, beno bantwadisi ya meso ya kufwa ya bantu ya kufwa meso! Mu kele ya kudasuka ve. Mu ke na kutubaka kaka na beno

Tsyelika. Mpe mu zolaka tuba yayi ve kana na zulu awa, na kati ya kivinga yina, kana Mpeve-Santu tubaka ve, “Tuba yawu mutindu yina.” Mu me tubaka ntete dyambu ya luvunu na beno kana yina Nzambi lakisaka ti ya kele kieleka? Beno vumbuka, bampangi ya munu, ntete ntangu luta!

<sup>131</sup> Kasi beno bika munu kutuba yayi. Wapi mutindu dititi ya dinsende lendaka vumbuka mpe kukuma yinti ya bansende, na yina yawu vwandaka ya kusoola ntete samu na yina? Wapi mutindu bantu ya Kusolama lendaka kondwa na kumona yawu? Samu ti, beno kele ba me soola beno samu na kumona yawu. “Nyonso yina Tata pesaka Munu ke kwiza,” tubaka Yesu, “kasi ata mosi ya bawu lendaka kwiza kana ti Yandi pesaka yawu na Munu ntete mbandukulu ya yinza, ntangu ba vwandaka tula bankumbu ya bawu na Buku ya Luzingu ya Mwana ya dimeme,” na buku ya kusonika ya dibuundu ve, kasi na Buku, Buku ya Luzingu ya Mwana ya dimeme.

Beno tala, Jérémie telamaka, vwandaka ya kusiamisama na ntwala ya bantu, mbala mosi dyaka bawu yinaka yandi.

<sup>132</sup> Mpe na yawu bawu kwendaka mpe salaka kizitu, yandi salaka yawu, mpe yandi tulaka yawu na laka ya yandi, mpe kwendaka na ntwala ya bantu. Bawu tubaka, “Oh, beto kele bantu ya nene ya Nzambi. Beno tala, beto kele Israël. Beto kele ya kusungama mingi na synagogue ya beto! Beto ke kwendaka konso Lumingu, beto, beto ke pesaka minkayulu, mpe beto ke pesaka mbongo ya beto. Wapi mutindu Nebucadnetsar lendaka kanga bima ya mpeve ya Nzambi?” Huh! Masumu ya beno me sala yawu.

<sup>133</sup> Nzambi tubaka, “Kana beno ke kangama na misiku ya Munu, Mu ke sala yayi ve. Kasi, kana beno sala yawu ve, ya ke kwiza na beno.” Ya kele kieleka ya kulunga. Ya kele dyaka mutindu mosi. Beno kangama na misiku ya Yandi, Ndinga ya Yandi ya ngunga, yina Yandi silaka.

<sup>134</sup> Ntangu yayi beno tala. Ntangu yayi, Jérémie, na nzila ya luzolo ya Nzambi, profete yina vwandaka ya kusiamisa, ata ti ba yinaka. . . Mosi na mosi ya bawu vwandaka ya kuyina na bilumbu ya bawu. Bawu vwandaka sala bima mosi ya ngitukulu ya mutindu yankaka na denomination ya kilumbu yina, bawu nyonso vwandaka yina yandi, ata bantinu mpe nyonso yankaka. Na yawu yandi tulaka kizitu na laka ya yandi, mpe tubaka, “MUTINDU ME TUBA MFUMU. Bawu ke vwanda na yisi kuna bamvula makumi sambwadi,” samu ti yandi kuzwaka lubakusu na Ndinga ya Nzambi. “Bamvula makumi sambwadi!”

<sup>135</sup> Na manima Hanania, Hanania, mu banza ti beno ke tangunaka yawu, H-a-n-a-n-i-a. Hanania, profete mosi na kati-kati ya bantu, me belama, me katula kizitu na laka ya Jérémie, mpe me pasula yawu. Mpe yandi tubaka, samu yandi kotalana na kati-kati ya bantu, beno me mona, na yina yandi vwandaka

zonza mutindu yankaka na Ndinga ya Nzambi. Mpe yandi tubaka, “Na bamvula zole bawu ke vutuka. MUTINDU ME TUBA MFUMU.”

Baprofete zole ya kupakulama. Yinki vwandaka luswaswanu na kati ya bawu? Mosi vwandaka na kuzonza Ndinga, mpe yankaka yina ve. Jérémie tubaka, “Amen.”

<sup>136</sup> Na ntuala ya bakuluntu nyonso mpe dibuundu, bantu nyonso ya Israël, beno me mona, yandi vwandaka sosa kulakisa ti yandi lendaka vwanda ya kulutila na Jérémie. “Nge zaba, na mutindu nyonso bawu ke zolaka nge ve. Na yawu mu kele profete, mpe. Mu kele ya kulutila buprofete na yina nge kele, samu ti nge ke na kubikulaka luvunu. Nge ke tuba na muntu ti bantu ya Nzambi kele luta na yisi ya dyambu *yayi mpe yina?*”

<sup>137</sup> Ya kele yina ba ke tubaka bubu yayi, kasi beno ke vwanda kuna kaka mutindu mosi, mutindu dibuundu. Ba ke singa beno na nsingulu. Beno mabuundu, ba-denomination nyonso yina ke na kukangamaka na binkulu ya bawu ya muntu na kisika ya Ndinga ya Nzambi, beno me singaka na Nzambi.

<sup>138</sup> Ntangu yayi beno tala, beno tala yandi ke na kwisa. Hanania me katula na nswalu kizitu yayi na laka ya yandi, kidimbu ya Nzambi, me pasula yawu, mpe me tuba, “MUTINDU ME TUBA MFUMU. Na bamvula zole bawu ke vutuka.” Kaka samu na kutalana, “Mu kele *Kingandi*.” Samu ti yandi bakaka kisika, yandi vwandaka profete ya organisation.

Jérémie vwandaka muntu ya mfinda yina vwandaka zinga na nzila ya yandi mosi. Yandi vwandaka pesa profesu yimbi samu na bawu ntangu nyonso, samu ti bawu vwandaka bantu ya yimbi.

<sup>139</sup> Mpe muntu yayi vwandaka tuba na bawu, “Oh, beno kele ya kulunga ntangu nyonso yina beno ke vwanda bamambele. Ntangu nyonso yina beno kele Israël, kaka yina kele dyambu mfunu. Beno me mona, beno, beto. . . Nzambi ke sala yawu ve. Mu zaba ti ya kele na mwa kima yina me salama awa, kasi beno vwanda na ntima na zulu ve, beno vwanda na boma ve.”

<sup>140</sup> Oh, mpangi ya bakala, bawu ke zingaka dyaka bubu yayi. “Beno tala boma ve, nyonso kele ya kulunga. Nyonso kele na maboko ya beto. Beto kele Dibundu.” Beno ke banza yawu ve. Inga.

<sup>141</sup> Na yawu yandi tubaka, “Nyonso kele ya kulunga. Bawu ke vutuka na bamvula zole. Yina kele mwa dyambu yina salamaka. Ya kele kima ya mona. Beto kele na yawu. Kaka Nebucadnetsar kwisa awa, kasi Nzambi ya beto ke baka nyonso yayi.”

<sup>142</sup> Kasi Ndinga ke tuba ti bawu ke vwanda kuna bamvula makumi sambwadi; tii ntangu mbandu yina ke luta, mpe nsungi yankaka. Mbandu mosi kele bamvula makumi yiya. “Yayi kele na kutala bambandu zole ti beno ke vwanda na nsi kuna.” Mpe Jérémie tubaka yawu landila Ndinga ya Nzambi.

Hanania pasulaka yawu! Jérémie tubaka, “Mbote mingi. Amen. Kasi, Hanania, bika beto kubambuka moyo na yayi, beto nyonso zole kele baprofete. Beto kele milongi.”

<sup>143</sup> Mpe mu ke tuba yayi na nge, mpangi ya munu ya bakala. Beto bambuka moyo ti ya vwandaka na baprofete ntete beto, mpe bawu vwandaka bikula yimbi na bimfumu, mpe bawu vwandaka bikula yimbi na mwa bima mosi. Kasi, beno bambuka moyo ti, ntangu profete ke tubaka dyambu, yandi fwana bikula landila Ndinga. Mutindu Michée, mpe Moïse, mpe nyonso ya bawu yankaka. Ya fwana vwanda landila Ndinga. Kana ya kele ve, kuna beno bambuka moyo na yina salamaka.

<sup>144</sup> Kuna, Hanania, ngolo ya yandi ya kusungama me telama. “Mu kele Hanania” (kukondwa ntembe), “profete ya Mfumu, mpe mu ke tuba, ‘Na bamvula zole.’” Na nzonzolo yankaka, “Mu ke kipe ve yina Ndinga ke tuba.” Kupakulama ya yandi, “Mu ke tuba, ‘Na bamvula zole, bawu ke vutuka.’”

<sup>145</sup> Jérémie me bika yandi kuna, yandi me kwenda, yandi tubaka, “Mfumu, mu ke kipe ve yina yandi me tuba, Mu ke kwikila dyaka mpe mu zaba ti Ndinga yango tubaka mutindu yina. Mu ke vwanda kieleka na Nge. Yandi ke vuna munu ve.”

<sup>146</sup> Nzambi tubaka, “Kwenda tuba na Hanania, ‘Mu ke sala kizitu yina ke kwisa, ya kisengo.’” Samu yandi salaka yawu, ba katulaka yandi na zulu ya ntoto, ba katulaka Hanania, mvula yina kaka mosi.

Beto tala bifwanukusu ya beto, bawu nyonso zole baprofete. Na yawu mingi dyaka beto lendaka tuba mpe kuzonza na ntangu yayi.

<sup>147</sup> Kasi beno tala mbote. Yesu tubaka, ti, na nsuka ya ntangu yayi, dyaka, bampeve nyonso zole ke vwanda kieleka ya kubelama kintwadi dyaka. Ya kele tsyelika? [Dibuundu me tuba, “Amen.”—Mu.] Ntangu yayi beno tala. Ya ke vwanda ya kubelama mingi kulutila yina yawu vwandaka. Yayi kele ntangu ya nsuka. Oh, bana! Nzambi kuvwanda na mawa na beno! Tii, “Ya ke vwanda ya kieleka mingi tii ya ke vuna bantu ya kieleka ya Kusolama kana ya lendaka salama.” Ntangu yayi wapi mutindu beno ke kwenda. . . wapi mutindu bawu vwandaka tubila yawu na bilumbu ya bawu? Wapi mutindu beno ke tuba yawu bubu yayi? Mutindu kaka mosi, beno vwanda na Ndinga, “Yesu Klisto mutindu mosi mazono, bubu yayi, mpe kukonda nsuka.”

<sup>148</sup> Ntangu yayi beno kuwa mbote Nsangu nyonso yayi. Mpe na yina beno ke kuwa bande, ata ti mu banza ti mu ke kwenda kilumbu mosi ntangu Mfumu ke manisa na munu awa na ntoto, beno ke tala na yayi. Beno kuwa ndinga ya munu, na yina mu ke na kutuba na beno. Kana Yandi baka munu ntete Kwizulu ya Yandi, beno bambuka kaka moyo, mu kuzonzaka na beno na Nkumbu ya Mfumu, na nzila ya Ndinga ya Mfumu. Yinga.

149 Beno tala, “Ke vwanda ya kubelama mingi kintwadi ti ya zolaka vuna bantu ya Kusolama kana ya lendaka salama,” ke sala bidimbu mutindu mosi, bimangu mutindu mosi, na nzila ya Mpeve mosi. Ya kele tsyelika? [Dibuundu me tuba, “Amen.”—Mu.] Kaka mutindu baprofete yina beto vwandaka me zonzila, baprofete. Na kutala, ya kele ya kusunama mpe. . .

Beto luta na yawu, na yandi yayi, kana beno zola, ya Zole ya Timothée 3. Beto bika yandi yayi ve. Mpe mu zola ve. . .

150 Mu vwandaka tala monte ya nene yayi na zulu awa, mpe mu—mu zola kubika mingi na lweka, kasi mu banza ve ti beto fwana sala yawu ntangu yayi. Beno me mona? Beno tala. Kaka. . . Kana mu kele ya kutelama awa, ke na kutoka mutindu yayi, beno me mona, kasi mu kele na kyese. Mpe mu zaba ti yayi kele kieleka. Ya Zole ya Timothée 3:8.

151 Paul, muntu yina vwandaka tuba, “Kana Wanzio katuka Mazulu mpe zonga na beno dyambu yankaka na yina mu tubaka, bika ti yandi singama,” Wanzio awa, yina ke kulumuka. Ya kele na ya Zole ya Thessaloniciens. . . Oh, beno lemvokila.

152 Beno tala na ya Zole ya Timothée 3:8. Beno tala mbote Paul kuzonga awa. Beto banda na. . . Beto banda na nzila ya ntete, mpe beno kuwa ntangu yayi mbote-mbote. Beno bayina kele na Biblia ya beno, beno tanga na munu. Beno bayina kele na Biblia ya beno ve, beno kuwa mbote. . . .

*Zaba yayi mpe, ti na bilumbu ya nsuka. . .*

Beno sala nzila na yisi ya yawu, “bilumbu ya nsuka.” Ya kele ntangu yina yawu ke salama.

*. . . bantangu ya mpasi ke vwanda. (Beto kele na kati ya yawu.)*

*Samu ti bantu ke vwanda na munimi, ke zola mbongo, ke sala matalana, ke vwanda na lunangu, ke vwanda bantu ya mafingu, ke manga na kutumama na bibuti ya bawu, ke zimbana mambote ya bampangi, ke zitisa ve bima ya santu,*

153 Beno tala nkonga yayi yina kele na beto bubu yayi, ya kupola. Mpe babakala kuna na bala-bala, bantwenya ya babakala, ke benda bansuki na mbunzu ya bawu, mutindu bansuki yina ke kubwaka na mbunzu mutindu ya bakento. Kubeba! Basodomite!

154 Beno vwandaka me tanga na mvula yayi, *Reader's Digest* ya ngonda yayi? Ba tubaka, “Bantu ya Amerique na kati-kati ya bamvula,” mu banza ti ya vwandaka, “na kati-kati ya bamvula makumi zole mpe makumi zole na tanu, bawu ke kota yimeni na mutindu ya bawu ya mvula ya makumi tanu.” Bawu me suka! Bawu me pola! Mayele ya yinza me tuba ti, bakala ke na bamvula ya yandi ya kati-kati, mpe kento mosi, ntangu bawu kele ntete

na bamvula ya bawu makumi zole. Nzutu ya bawu me pola mingi mpe me pesama na busafu.

Oh, Amerique, bambala yikwa Nzambi me zola kubaka nge na yisi ya mapapu, kasi awa ngunga ya nge me kuma! Nge ke na kutwadisa yinza na busafu.

*. . .ke vwanda bantu ya mafingu, ke manga na kutumama na bibuti ya bawu, ke zimbana bumbote ya bampangi, ke zitisa ve bima ya santu,*

*Kukondwa baluzolo ya kimuntu, . . .*

Ata luzolo ya tsyelika samu na mosi na mosi, bakala samu na kento, kento samu na bakala. “Ata fyoti ya luzolo ya kimuntu.” Busafu, kuvukisa banzutu!

*. . .ke vwanda na kyadi ve, ke zonza yimbi na nzutu ya bampangi, lenda ve na kuyala banzutu ya bawu, ke vwanda na myangu, mpe ke vwanda bambeni ya bantu ya mbote,*

<sup>155</sup> Na nzonzolo yankaka, ya ke tuba, “Beno nkonga ya ba-exalté ya santu.” Muntu mosi yufulaka kilumbu mosi wapi mutindu ya kukwisa awa na dibuundu. Ba tubaka, “Kukwenda kuna ve. Nyonso yina ya kele kele nkonga ya nene ya makelele mpe kisika ya bansaka.”

Beno me mona, “bambeni ya bantu yango.”

*Ke funda bampangi, ke sala ya kulutila, lunangu ke kumisa bawu bampofo, ke zola mukembo ya yinza kulutila Nzambi;*

Beno ke tuba, “Mpangi Branham, yina kele ba-communiste.” Yinki ke na kutuba nzila yina ke kulanda?

*Ke lakisa mutindu ya kinzambi, kasi (yinki?) ke manga ngolo ya yandi: (Ndinga, Yesu Klisto mutindu mosi mazono, bubu yayi, mpe kukondwa nsuka, ke lakisa, nsilulu ya kilumbu) . . .*

Kaka tsyelika mutindu Hanania, kaka tsyelika mutindu Sédécias, kaka tsyelika mutindu Balaam, mpe nyonso yankaka, ya baprofete ya luvunu.

*Ke lakisa mutindu ya kinzambi, (ya kupakulama . . . Beno me mona?)*

*Ke lakisa mutindu, (ya kupakulama, milongi ya kubyeka . . .)*

*Ke lakisa mutindu ya kinzambi, kasi ke manga (ti Yandi kele mutindu mosi mazono, bubu yayi, mpe . . . Ke manga Ndinga ya Yandi!)*

<sup>156</sup> Wapi mutindu bawu mangaka Yesu na kilumbu yina? Nani bawu kumangaka ntangu bawu kumangaka Yesu? Ndinga. Ba vwandaka misambidi. Ba vwandaka baka Biblia ya bawu na kulonga, kasi bawu kumangaka Ndinga ya kilumbu.



157 Yinki ba kele bubu yayi? Kima ya mutindu mosi, ya kupakulama, ke na kulonga Nsangu ya mbote ya pentecote, kasi ke manga nsilulu ya kilumbu ya Ndinga yina kele na kimbangi, “Yesu Klisto mutindu mosi mazono, bubu yayi, mpe ntangu nyonso.” Beno me mona yawu? [Dibuundu me tuba, “Amen.”—Mu.]

*Bayankaka na kati ya bawu ke kwendaka na bayinzo, samu na kuzwa. . . bakento ya bumolo ya disumu mingi, bayina ke sadilaka bansatu na nzila ya mutindu na mutindu,*

158 “Balukutakanu ya beto ya kutunga balele mpe yayi mpe yina ya beto.” Muntu ke kwiza ke meka na kutendula yimbi Ndinga, mpe ke tuba yayi, “Ya kele nyonso ya kulunga, mpangi ya kento, ti nge vwanda na nsuki ya nkufi. Kulanda ve kizoba yina. Beno me mona? To, kana beno—beno lwata yayi; ya kele yina ve, ‘ya kele yina ke basikaka na ntima ya muntu yina ke sumunaka yandi.’” Beno me mona? Mpe beno ke na kubakula ti beno me pakulama na mpeve ya yimbi, ya mvindu, ya busafu? Ata ti, beno lendaka yimba na chorale, na nsuki ya nkufi, kasi beno ke na mpeve ya yimbi. Ya kele ya kuswaswana na Ndinga. Ya kele kieleka. Ya kele yina Biblia ke tuba. Mpe beno ke tuba, “Mbote, mu ke lwataka bakupe. Ya ke fundisaka munu ve.”

“Muntu nyonso, kana kento lwata kinkuti yina kele ya bakala, ya kele yimbi mingi na ntwala ya Nzambi.” Nzambi yina ke sobaka ve tubaka yawu.

159 Oh, bima kele mingi, wapi mutindu beto lenda kaka kuzonzila yawu? Ntangu ya beto ke luta. Kasi beno zaba mingi samu na kuzaba yina kele mbote mpe yina kele yimbi. Mpe wapi mutindu mu lendaka nata bawu kusala yawu? Wapi mutindu mu lendaka sala yawu? Beno ke tuba, “Mbote, samu na yinki nge ke na kuzonzaka na ngolo?” Mu kele mbingi na ntwala ya beno. Kilumbu mosi, na Kilumbu ya Lufundusu, beno ke kuzwa ve nsongi ya kukota.

160 Wapi mutindu Michée zolaka sukisa yawu? Wapi mutindu Moïse lendaka, na kulooka, na kumeka na kusukisa yawu? Mpe Josué na bawu vwandaka kima na kati-kati ya bantu? Mpe Lévi yina basisaka mbele ya yandi, mpe yina kufwaka bawu mpe? Ba landila kaka mutindu mosi.

161 Ba zonzaka yawu ntete ti bawu kusala yawu. Mpe bawu ke sala yawu, samu ya kele MUTINDU ME TUBA MFUMU bawu ke sala yawu. Beno banza ti bansololo ya bawu ke mwangana, ti denomination ya bawu ke vutuka na Ndinga? Ya kele MUTINDU ME TUBA MFUMU, ba lenda ve! Ba ke baka lweka ya mbeni ya Klisto? Tsyelika. Ya kele MUTINDU ME TUBA MFUMU, ba ke sala yawu! “Na yawu yinki beno ke tuba samu na yawu?” Mu fwana vwanda mbingi, mpe mutindu mosi na beno, mikwikidi nyonso. Beno tala mbote.

*. . . bakento ya bumolo ya . . . ya mutindu na mutindu,*

“Mbote, bakento nyonso yankaka ke salaka yawu.” Baprofete ya luvunu! Ntangu yayi beno kuwa. Baprofete ya luvunu, mu ke na kuzonzila. Awa yinki bawu ke sala na kilumbu ya nsuka?

*. . . samu na kuzwa bakento ya bubolo . . . bayina ke sadilaka bansatu ya mutindu na mutindu,*

“Mbote, mu zaba bakento nyonso yankaka . . .” Mbote, kwenda na mantwala.

<sup>162</sup> Yinki mu tubaka kaka ntete dyambu ya nene yayi kusalama awa na Californie? “Beno bantu awa na Los Angeles, konso mvula ntangu mu ke vutukaka awa ya kele na bakento mingi ya kuzenga nsuki mpe babakala mutindu bakento kulutila yina vwandaka mbala ya ntete, milongi mingi ke na kukota na ba-organisation. Beno kele na dyambu ve ya kutuba! Kana bisalu ya nene yina kusalamaka na Sodome mpe na Gomorrhe kusalamaka na kati ya beno, ya zolaka vwanda ya kutelama bubu yayi. Oh, Capernaüm, nge yina kele na nkumbu ya bawanzio, Los Angeles!” Beno me mona yina ke na kusalamaka? Yandi ke na kukwendaka kaka na yisi ya mubu. Na wapi ntangu? Mu zaba ve ntangu yina yawu ke dyama, kasi yawu ke dyama. Beno bantwenya, kana mu mona yawu ve na kilumbu ya munu, beno tala mbote. Yandi me suka!

*Ke longokaka kaka, . . . ke bakulaka ve luzabu ya kieleka.*

Ntangu yayi awa kele yina ke sala mpasi, awa kele kisika yina ke sala mpasi. Beno kuwa yayi.

*Ntangu yayi mutindu Jannès na Jambrès zonzaka yimbi ya Moïse, mutindu mosi mpe bantu yayi ke na kutelemina kieleka: bantu ya mabanza ya kutengama, ke manga yina me tala lukwikilu yina pesamaka mbala mosi na basantu, tsyelika.*

“Yina me tala Lukwikilu.” “Mpe yandi ke vutula Lukwikilu ya batata, to ya bana, kuvutula na batata.”

<sup>163</sup> “Ke manga yina me tala Lukwikilu.” Uh! Beno zaba yinki zola kutuba *kumanga*? Kana beno kele na Biblia ya Scofield, ya kele na *h* kuna. Kaka kuna na zulu, ba me tuba, “kubika.” Kubika, ya kele yina ya kele.

<sup>164</sup> Ntangu yayi, mwa minuti fyoti. Mu zola kutala kima awa. Mu banza ti mu notikaka yawu mbote. Mu banza ve, kasi mu zola kutuba yawu, mpe zola kutala yawu ntete mu—mu kutuba yawu. Ntangu yayi, kaka minuti mosi. [Kisika ya mpamba na bande—Mu.] “Ke manga yina me tala Kieleka, yina me tala Lukwikilu.” “Lukwikilu,” ya kele kaka na Lukwikilu mosi. Ya kele tsyelika. “Yina me tala Lukwikilu, kumanga!”

Ntangu yayi mu zola kutanga Luc 18. Mwa minuti. Beno . . . Beno lenda sonika yawu; beno lenda to ve kutanga yawu.

*Mpe yandi tubaka na bawu na manima, ti bantu fwana kusambila ntangu nyonso, mpe . . . ata kulemba ve;*

*Yandi tubaka—tubaka, Ya vwandaka na kati ya mbanza mosi mufundisi mosi, yina vwandaka na boma ya Nzambi ve, mpe zitisaka ve muntu.*

*Mpe ya vwandaka na mufwidi mosi ya kento na kati ya mbanza yina mosi; mpe yandi kwendaka na yandi, na kutubaka, Nungisa munu na lufundusu na ntuala ya mbeni ya munu.*

*Mpe yandi vwandaka—mpe yandi vwandaka manga katuka ntama: kasi na manima yandi tubaka na yandi, Mu zaba ti mu ke na boma ya Nzambi ve, mpe ke zitisaka muntu ve;*

*Kasi mufwidi ya kento yayi ke na kutungisa munu, mu ke nungisa yandi na dyambu ya yandi, samu . . . yandi kukwisa kutungisa munu ve.*

*Mpe Mfumu me tuba, Beno me kuwa yina me tuba mufundisi ya yimbi.*

*Mpe Nzambi ke nungisa ve bantu ya yandi . . . soolaka, bayina ke bokaka na yandi mpimpa na ntangu na yandi, ti yandi ke vingila na kusadisa bawu?*

*Mu ke na kuzabisa beno ti yandi ke nungisa bawu na nswalu nyonso. Kasi ntangu Mwana ya muntu ke kwiza, yandi ke kuta lukwikilu na zulu ya ntoto?*

<sup>165</sup> Ntangu yayi beno tala kyuvu. Beno tala kisika mu vwandaka zola kukuma: Na kati ya Apocalypse 10 (Beto ke tala yawu na baminuti fyoti, na kubakaka, Masonuku yankaka.) Yandi tubaka, “Na bilumbu ya Nsangu ya wanzio ya sambwadi, dinsweki ya Nzambi *fwana* kumana.” Beno tala kyuvu, ya kele, kana beno landa na nzila yayi ya ngunga yayi, ya *ke* kumana? “Mu ke kuta Lukwikilu?” Malachie 4 ke lungisama na ntangu yayi, “Kuvutula Lukwikilu ya bana, na Lukwikilu ya batata, na ya ntete, Ndinga?” Beno me mona?

<sup>166</sup> “Ke manga, Jambrès na Jannès, mutindu bawu teleminaka.” Ntangu yayi, dyaka, beno kuwa, ya Zole ya Timothée 3:8. “Mutindu Jan- . . . teleminaka Moïse, na bilumbu ya nsuka mpe bakumanga ya mutindu mosi yayi ke kwisa,” ntangu yayi beno mona yinki Yawu me tuba awa, “ke lakisa mutindu ya kinzambi,” bapakulami. Ntangu yayi beto baka kaka . . . Beno vutukila yawu mpe—mpe beno tanga yawu ntangu beno ke kuma na yinzo, na yawu mu lenda na kumanisa yayi, na suka yayi, kana mu lenda. “Ke manga yina me tala . . .” Ke manga ve na—na—na kuzingaka; ba kele bantu ya mbote, bantu yina longokaka.

<sup>167</sup> Ntangu yayi beno tala, ntangu Moïse kulumukaka na Égypte, na nsangu ya MUTINDU ME TUBA MFUMU, mpe yina vwandaka kusiamisama; yandi me bokila Israël, ba vwandaka bantu, dibuundu ve. Israël vwandaka bantu; ata mbala mosi ti bawu vwandaka dibuundu. Samu ti, mpova *dibuundu* zola kutuba “bantu yina ba me bokila na kubasika.” Ba vwandaka bantu ya Nzambi. Na yina ntangu bawu kumaka ya kupakulama na nsi ya Ndinga, mpe ti ba bokilaka bawu na kubasika, ba kumaka dibuundu ya Nzambi. Mpe kuna bawu vutukaka manima, samu bawu vwandaka kwikila ve Ndinga ya Nzambi, mpe vwandaka kuwa profete ya luvunu. Mu banza ti yawu me kota.

<sup>168</sup> Israël, na kuvwandaka bantu ya Nzambi, basikaka na yisi ya diboko ya Nzambi, vwandaka ya kupakulama na Ndinga . . . na Ngolo ya Nzambi, bawu monaka bidimbu mpe mambu ya ngitukulu ya Nzambi. Mpe kuna ntangu Nzambi vwandaka kwenda na ntwala na bawu, profete ya luvunu me kwisa, ya kupakulama, mpe me tuba dyambu ya mutindu yankaka na Ndinga ya ntete ya Nzambi yina bawu kuwaka; mpe mosi na mosi ya bawu kufwaka na ntoto ya kuyuma, kukatula bantu tatu. Ntangu yayi beno simba yawu.

<sup>169</sup> “Mutindu ya vwandaka na bilumbu ya Noé, kisika mioyo nana vulukaka na nzila ya masa, mutindu mosi yawu ke vwanda na nkwezulu ya Mwana ya muntu.” “Mutindu ya vwandaka na bilumbu ya Lot, kisika bantu tatu basikaka na Sodome, mutindu mosi yawu ke vwanda na ntangu Mwana ya muntu ke monana.” Mu ke na kutangunaka kaka Masonuku, Ndinga ya Mfumu, yina kele, “Mazulu na ntoto ke luta . . .” Ya ke vwanda bantu ndambu!

<sup>170</sup> Beno tala awa. Moïse me kwenda na Aaron. Moïse vwandaka Nzambi. Nzambi tubaka na yandi na kuvwanda Nzambi, Yandi tubaka, “Nge vwanda Nzambi, mpe ti Aaron mpangi ya nge ya bakala kuvwanda profete ya nge. Nge tula bampova na yinwa ya yandi kana nge lenda kuzonza mbote ve.” Yandi tubaka, “Kasi nani salaka muntu baba? Nani salaka muntu kuzonza?” Ya kele Mfumu.

<sup>171</sup> Mpe yandi kulumukaka kuna. Yinki yandi salaka? Yandi salaka kimangu ya kulunga mpe ya kieleka yina Nzambi tubaka na yandi na kusala. Nzambi tubaka na yandi, “Kwenda losa nkawa ya nge.” Yandi lokotaka yawu, mpe ya kitukaka nioka. Yandi lokotaka yawu, mpe yawu vutukaka nkawa. Yandi tubaka, “Kwenda sala yawu na ntwala ya Pharaon, mpe tuba, ‘MUTINDU ME TUBA MFUMU.’”

<sup>172</sup> Mpe ntangu Pharaon monaka yayi, beto lenda tuba, “Mbote, tala kima ya kukondwa mpasi ya nganga-nkisi yayi.” Yandi tubaka, “Ya ke na kima ve. Ya kele mabanza ya muntu to kima mosi, beno zaba. Beto kele na bantu na organisation ya beto yina lenda sala kima mutindu mosi. ‘Kwisa awa, Evêque *Kingandi*.”

Mpe, nge, nge basika awa.’ Beto kele na bantu yina lenda sala kima ya mutindu mosi.” Ya vwandaka Satana yina vwandaka zonza na nzila ya Pharaon.

Ya vwandaka Nzambi yina vwandaka zonza na nzila ya Moïse.

<sup>173</sup> Kasi beno tala mbote muntu yayi yina me basika. Jannès na Jambrès me tambula na ntwala ya Moïse, mpe na ntwala ya meso ya bantu, mpe salaka konso kimangu yina Moïse lendaka na kusala. “Bawu ke vuna bantu ya kieleka ya Kusolama kana ya lendaka salama.” Ya kieleka? Bawu salaka kima mutindu mosi na yina Moïse kusalaka. Beno me bakula yawu? Ntangu yayi beno bambuka moyo, ya kele MUTINDU ME TUBA MASONUKU, ti yawu ke vutukila dyaka na bilumbu ya nsuka.

Wapi luswaswanu yina vwandaka na kati-kati ya Moïse na Jambrès?

Moïse tubaka, “Ti menga vwanda na kati ya masa.”

Mpe baprofete yayi ya luvunu tubaka, “Kieleka, beto ke tula menga na kati ya maza, mpe.” Mpe yawu kusalamaka.

Kuna Moïse me tuba, “Ti ya vwanda na bakasa.” Wapi kisika yandi vwandaka kuzwa yawu? Mbala mosi na Nzambi. Beno me mona?

Mpe yinki yandi salaka? Yandi tubaka, “Mbote, kieleka, beto lenda mpe, kubasisa matiti.” Mpe bawu salaka yawu. Konso kimangu yina Moïse lendaka na kusala, ba lendaka mpe, na kusala yawu!

<sup>174</sup> Beno bambuka moyo, beno bumba yawu na dibanza, beto ke tala yawu, na manima ya mwa ntangu. Ba lenda sala nyonso yina bawu nyonso ke na kusala, kasi ba lenda ve kuvwanda na Ndinga. Ba lenda ve kuvwanda na Ndinga.

<sup>175</sup> Ntangu yayi beno tala, ba salaka yawu. Kasi Moïse, profete ya kieleka yina Nzambi tindaka, yina ba pesaka kisalu na Nzambi, ata mbala mosi ti yandi pesaka bawu bimbangi, ti yandi tubaka, “Awa, beno lenda sala yawu ve! Beno lenda ve!” Yandi bikaka kaka bawu, yandi bikaka kaka bawu kulandila. Ba kele baprofete ya ba-organisation, kasi beno kwenda na ntwala.

<sup>176</sup> Moïse landaka kaka na kukwenda na ntwala, vwandaka kuwa Nzambi. Nyonso yina Nzambi vwandaka tuba, “Ntangu yayi nge sala *yayi*,” Moïse vwandaka kwenda mpe vwandaka sala yawu. Yandi vwandaka sala kima ya mona. Ntangu bawu vwandaka sala, mosi na mosi ya bawu vwandaka tala nzutu kuningana to kima, kuna bawu vwandaka kwiza. Ba vwandaka sala yawu, mpe, kaka kieleka mutindu Moïse salaka yawu.

<sup>177</sup> Ntangu yayi beno tala. Bantu yayi kumonanaka . . . Oh, beno bantu, beno kondwa yayi ve! Bantu ya luvunu yayi, bantu yina zola kulanda, kumonanaka na manima ti muntu ya kieleka basikaka ntete. Beno me mona? Bawu me kwiza samu bawu zola

kulanda. Beno me mona, ba fwana sala yawu. Dyabulu lenda yidika kima ve; yandi ke bebisaka kaka kima ya ntete.

Mpe yinki kele disumu? Ya kele kudedama yina ba me bebisa. Yinki kele bizumba? Kima ya mbote yina ba me bebisa. Yinki kele luvunu? Kieleka yina ba me talisa mbote ve. Kubeba!

<sup>178</sup> Beno tala Hanania, kubeba ya Ndinga ya kisina. Beno tala Balaam, kubaluka ya Ndinga ya kisina. Beno tala Sédécias, kubaluka ya Ndinga ya ntete.

Mpe Biblia ke tuba ti bantu yayi vwandaka basika, na manima muntu ya kubeba. . . to samu na kubebisa Ndinga ya kisina yina vwandaka na kimbangi mpe yina lakisaka ti ya kele Kieleka.

<sup>179</sup> “Sala kisalulu mutindu évangéliste,” na ditadi ya lufulu kuna, “sala mbote kisalulu ya nge. Samu ti ntangu ke na kwisa ntangu bawu lenda ve kukanga ntima na Malongi ya santu, kasi na manima ya bansatu ya bawu bawu ke kutika samu na bawu mosi milongisi, yina ke zabisa bawu yina bawu ke zolaka kuwa; kuna bawu ke landila mpe ke sala nyonso yina bawu zola, mpe, ‘Ya kele ya kulunga, beto ke na bidimbu mpe mambu ya ngitukulu mutindu mosi.’ Mpe ba ke nata bawu na kupesa manima na Kieleka, mpe ke benda bawu na binkuma, na binkulu.”

<sup>180</sup> Oh, nkebolo ya Mpeve-Santu, buzitu yina ke bakaka moyo ya muntu ntangu yandi ke sukisaka na kubanza mutindu kieleka mpe pwelele ya kele na ntwala ya beto! Beno timuna ditadi yango ya lufulu awa mpe beno tanga kitini ya mukanda yina ba tulaka na kati kuna, bamvula makumi tatu na tatu. Beno tala yina Yandi tubaka kuna na—na Bala-bala ya Sambwadi, na suka yina ntangu ditadi yayi ya lufulu kutulamaka. Ntangu yayi beno tala yawu mbote. Beno tala mbote awa na mwila, ntangu Wanzio ya Mfumu kulumukaka na kati ya nzutu ya Dikunzi ya Tiya, bankama ya mabuundu, to bantu ya mabuundu, vwandaka pene-pene ya simu; yinki Yandi tubaka, beno mona kana ya salamaka ve. Beno mona yina salamaka.

<sup>181</sup> Ya kele ngolo mingi. Mu zaba ti ya ke talana ngolo, bampangi, na ngaanda kuna. Kasi ya kele. . . Biblia ke tuba, Yesu tubaka Yandi mosi, “Ya ke vuna bantu ya kieleka ya Kusolama kana ya lendaka salama.” Nzila kele dyaka ve. Ata mbala mosi ve ti bawu ke lenda na kumona Yawu. Kana ya lendaka salama, bantu ya kieleka ya Kusolama ke vunama na nzila ya yawu.

<sup>182</sup> Beno tala, bantu yayi kumonanaka na manima ba tindaka mupakulami ya kieleka ya Nzambi; na nzila ya profete ya Yandi ya kieleka, Moïse. Mpe na yina Moïse vwandaka sala kima, ba vwandaka landa yawu.

<sup>183</sup> Ntangu yayi, mpangi ya bakala, mpangi ya kento, mu. . . Yayi kele dibuundu ya munu mosi. Mu ke na muswa ya kulunga yina mu zola, ntangu nyonso yina yawu ke katuka na Ndinga ya Nzambi. Mpe mu ke na kufundisa beno bantu ve, kasi beto

tala kaka yawu landila ntangu mpe ngunga yina beto ke na kuzingaka.

<sup>184</sup> Bambote na Mpangi Ruddell, tii na Junior Jackson, mpe bawu nyonso na ngaanda awa, ya beto mpangi mabuundu. Mu vwandaka me zimbana bawu, mwa ntangu fyoti. Mu banza ti ba ke na kulandaka na alo-alo na suka yayi, mpe, samu ti ya vwandaka ve—ve na bisika na kati ya dibuundu.

<sup>185</sup> Beno banza kaka na yawu ntangu yayi, mwa minuti kaka. Ba salaka bimangu mutindu mosi na yina Moïse salaka. Moïse basisaka bakasa; ba landaka yawu mpe basisaka bakasa. Beno me mona?

Nzambi tubaka, “Kilumbu beno ke kudya yawu, beno ke kufwa kilumbu yina.”

<sup>186</sup> Satana me kwisa mpe me tuba, “Kieleka, beno ke kufwa ve. Beno ke kuma kaka bantu ya ndwenga. Beno ke kuzwa organisation ya kulutila mbote, ya kulutila mbote. . .” Beno zaba. “Beno zaba, nyonso ke vwanda ya kulutila mbote samu na beno, beno ke vwanda na Nsemo ya kulutila.” Beno me mona, kaka muvusu. Yina. . .

<sup>187</sup> Mpe beno bambuka moyo, MUTINDU ME TUBA MFUMU, landila ya Zole ya Timothée 3:18, ti, “Na bilumbu ya nsuka, ti Jambres mpe Jannes ke vwanda na zulu ya ntoto.” Ntangu yayi, mu zola beno kutala ti ya kele na zole, beno me mona, bantu yina zola kulanda.

<sup>188</sup> Ntangu yayi beto ke vutuka na Sodome, na manima ya ntangu fyoti, na bawu tatu, kutala Bawanzio tatu yina kulumukaka, mpe kumona kumekula, mpe nyonso yina, beno me mona, beno me mona, kumona yina kele ya kieleka mpe yina kele luvunu. Beno me mona? Beno me mona?

<sup>189</sup> Beno tala, ba salaka mutindu mosi ya bimangu. Kasi, beno tala, ba landaka na manima Ndinga ya kieleka yina vwandaka ya kupakulama, na nzila ya muntu ya kieleka yina Nzambi tindaka; ba landaka, na zole.

<sup>190</sup> Mu ke na kukiyufula kana beto lendaka banza na yawu mwa minuti. Na kubakaka diboko ya bantu, ntama mingi ve, na kutala bamvula makumi zole me luta, mpe kidimbu vwandaka monana. Bakala, ya vwandaka na bidimbu ya kulutila na zulu ya bima nyonso, mpe bantu nyonso. . . Mosi vwandaka na yawu na diboko ya yandi ya bakala; mosi vwandaka na yawu na diboko ya yandi ya kento; yankaka vwandaka kuwa nsunga ya yawu. Beno me mona, mitindu nyonso ya. . . Mpe mu vwandaka kukiyufula. . . Nzambi ke bika ve ti mu kutuba na beno ntangu yayi yina vwandaka kieleka ya kieleka, kasi kilumbu mosi beno ke bakula yawu. Yina vwandaka kaka samu na kutalisa bulawu ya bawu. Ya vwandaka ve kieleka, na mbandukulu. Mu ke tubila beno, kilumbu mosi, kana Mfumu zola.

<sup>191</sup> Beno tala, ba salaka mutindu mosi ya bimangu, kasi ba salaka ve. . . Beno tala, ba salaka yawu ve tii na manima Ndinga ya ntete kwisaka, ntete. Ya kele mutindu Satana kusalaka na disamba ya Éden. Ya kele mutindu yandi ke salaka ntangu nyonso. Nani pesaka ntete profesi? Moïse. Nani talanaka ntete, Moïse to Balaam? Moïse. Nani talanaka ntete, Jérémie to Hanania? Beno me mona yina mu zola kutuba?

<sup>192</sup> Beno tala, ba landaka na kusala. Bantu ya yinza yina zola kulanda, bantu ya kusungama, na kubanzaka ti bawu ke “na kusalaka kosalu samu na Nzambi,” mutindu salaka David, lumingu me luta, kasi kulanda ya yinza. Mu ke vingila minuti mosi. Mu zola beno kubanza na kati-kati ya bima yayi. Kana mu tuba yawu ve, kieleka Mpeve-Santu ke monikisa yawu, na kulutula na bantu ya Kusolama. Beno me mona?

<sup>193</sup> Denomination ya Pharaon vwandaka tuba, “Beto ke na bantu yina lenda sala kima mutindu mosi,” mpe bawu vwandaka sala yawu. Beno me mona? Samu na yinki Pharaon salaka yayi? Samu na yinki Nzambi pesaka muswa na yawu? Samu na yinki Nzambi ke fidisa profete, ya kieleka ya kupakulama kuna samu na kusala kidimbu na ntwala ya Pharaon, mpe kuna kubika ti kulanda ya denomination kutalana mpe kulanda yawu na ntwala ya bantu? Samu na yinki Yandi ke bika mumekudi mosi kutelama samu na kusala yawu, mpe kusala kima mutindu kaka mosi na yina Mpeve ya kieleka ya Nzambi ke na kusalaka? Beno me mona, Masonuku fwana kulungisama.

<sup>194</sup> Beno tala, Yandi salaka yayi samu ti Yandi kukumisa ngolo ntima ya Pharaon mpe ya bantu ya Égypte, samu na kulakisa ti Moïse vwandaka kaka ve yina vwandaka na Ndinga. Ba zolaka sala nyonso kaka mutindu mosi na yina Moïse lendaka kusala.

<sup>195</sup> Mpe samu na yinki Nzambi me bika kima yayi kusalama na bilumbu ya nsuka? Samu, kima mutindu mosi ya mpeve ya luvunu yina tubaka na Sédécias, “Wapi mutindu beto ke sala ti Achab kukwenda kuna, samu na kulungisa bima yayi?” Wapi mutindu Yandi ke kuzwa bantu yayi, yina ke salaka kivuvu na mabuundu ya bawu, kukwenda awa samu ti kima yayi kusalama, yina Yandi zonzaka ntete? Bawu, na kati ya Nsungu ya Dibundu ya Laodicée yayi, “Samu ti nge me tuba ti nge kele ‘na bimvwama, mpe kele na nsatu ya kima ve. Mu kele ya kuvwanda mutindu ntinu ya kento.’ Nge kele na kima ve! Nge zaba ve ti nge kele na kati ya kiadi, ke na kuzinga na kyadi, mpofo? Mpe mu ke longi nge na kwisa kusumba na Munu,” Yandi tubaka, “mafuta na wolo.” Samu na yinki Yandi me sala yawu?

<sup>196</sup> Samu na yinki Yandi me bika kumekula yayi kutelama na bilumbu ya nsuka yayi, na yina bima yayi ke na kulungisamaka na nzila ya Ndinga ya kieleka ya Nzambi; mpe kubika ti bamekudi kukwisa mpe kusala kima mutindu mosi, mpe kumanga Ndinga ya kieleka ya Nzambi? Yandi salaka yawu



samu na Moïse. Mpe Pharaon salaka yawu samu na kutelemina Moïse; mpe bawu yina, Jannès mpe Jambres, salaka yawu samu na kutelemina Moïse. Mpe Biblia ke tuba ti ya ke salama dyaka na bilumbu ya nsuka. Beto bawu yayi. Ntangu yayi, kana ya kele ve Masonuku yina ke na kusalamaka, yinki ya kele?

<sup>197</sup> Ya kele ti Moïse kupesaka bawu kimbangi mpe tubaka, “Beno tala! Beno tala! Beno lenda ve kusala yawu. Muntu kaka munu ba byekaka na kusala yawu. Beno tala! Beno sukisa yawu, malu-malu yayi”? Yandi bikaka kaka bawu kukwenda na ntwala.

<sup>198</sup> Beno bika bawu kukwenda na ntwala. Beno bambuka moyo, Biblia ke tuba, “Na yina bulawu ya bawu kutalanaka, mutindu mosi bawu yayi na kilumbu ya nsuka ke talana,” ntangu Kento ya makwela ke zanguka mpe ba ke baka yandi na zulu. Beno tala.

Moïse, Ndinga ya kieleka ya kutalana, tubaka ata mbala mosi ve dyambu, yandi bikaka kaka yawu kukwenda na ntwala. Kasi Yandi salaka yawu samu ti Yandi kuka na kukumisa ngolo ntima ya Pharaon, samu na kuvuna Pharaon.

<sup>199</sup> Yandi salaka kima kaka mutindu mosi samu Yandi lenda na kuvuna Achab. Mpe mwa muntu yina ya kutelama kuna na nzila ya yandi mosi, mwa Michée, yina vwandaka tuba na bawu, “MUTINDU ME TUBA MFUMU.” Awa me telama muntu yankaka, ya kupakulama, “MUTINDU ME TUBA MFUMU.” Mpe ya kuswaswana, mosi na yankaka.

<sup>200</sup> Beto me telama bubu yayi na MUTINDU ME TUBA MFUMU, ti mbotika ya maza na bilumbu ya nsuka fwana vwanda na Nkumbu ya Yesu Klisto. Mpe muntu yankaka ke telama mpe ke sala bimangu, mpe, Trinitaire mosi.

<sup>201</sup> Beno lakisa munu mpova *butatu* na kati ya Biblia. Beno lakisa munu kisika ya kele na Banzambi tatu. Beno lakisa munu kisika ya kele na bima mutindu yina. Ya kele na kati ya Ndinga ya Nzambi ve. Ya kele na kima mutindu yina ve ti muntu kuzwaka ntete mbotika na nkumbu ya “Tata, Mwana, Mpeve-Santu,” na kubakaka bisalu yina. Bima nyonso yayi, “Oh, ya kele ya kulunga, bampangi ya kento. Ya kele nyonso ya kulunga, beno vwanda kaka na yinda . . . bansuki ya beno ya nkufi. Ya kele ya kulunga, beno lenda to ve kusala *yayi, yina, to yankaka yina*. Oh, ya kele buzoba, mambu ya biboba.”

<sup>202</sup> Kasi Biblia me tuba yawu! Mpe Yandi silaka, “Na bilumbu ya nsuka, Yandi ke tinda Mpeve ya Élie, mpe ke bokila bantu, bana ya Nzambi, na kuvutuka na Lukwikilu ya ntete mutindu ya vwandaka na mbandukulu, ya Ndinga.” Ndinga yango kupesaka kimbangi, Mwana ya muntu na bilumbu ya nsuka, mutindu mosi ya vwandaka na Sodome; mazono, bubu yayi, mpe kukonda nsuka. Yandi silaka na kusala yawu. Ya kele nsilulu ya Nzambi. Ya kele MUTINDU YAYI ME TUBA MFUMU.

Beno tala, ba salaka kima mutindu mosi, kaka mutindu Moïse salaka, tii ya lutilaka Nzambi.

<sup>203</sup> Ntangu yayi beno bambuka moyo, ya kele MUTINDU ME TUBA MFUMU, ya ke salama na kilumbu yayi. Ntangu yayi, beno sosa yinza nyonso; beno baka konso kinzambi-nzambi, beno baka konso dikanda, beno baka konso muntu, beno baka konso dibuundu! Mu ke tuma beno, na Nkumbu ya Klisto, na kusala yayi, beno balongi. Mu ke pesa beno mufuna ya kutanga bazulunale to kutala bisika nyonso beno zola kukwenda, mpe kumona kana ya kele malu-malu yayi ve na zulu ya ntoto. Beno me mona?

<sup>204</sup> Na yawu, Matthieu 24:24 kele kaka kieleka. “Bapakulami, ya luvunu ke telama na bilumbu ya nsuka, mpe ke vwanda baprofete ya luvunu, mpe ke vuna bantu mingi.” Beno tala yawu mbote na bifwanusu ntangu yayi, na yina yawu ke na kukwisa ntangu yayi, beno me mona, “Ke vuna bantu mingi.” “Baprofete,” ya mingi; “Baklisto,” bapakulami, ya mingi; mingi ya mutindu yankaka, ba-Méthodiste, beno zaba, mpe ba-Baptiste, mpe bantu ya Pentecote, mpe nyonso yankaka yina. Beno me mona?

Kasi ya kele na Mpeve mosi ya kieleka ya Klisto, mpe yina kele Ndinga yina me kuma nzutu mutindu Yandi silaka na kusala yawu.

Ntangu yayi beto ke kwenda mwa ntama mingi dyaka na ntwala, na mwa Masonuku dyaka.

Tii, ya lutilaka Nzambi, kuna ya sukaka. Bulawu ya bawu kutalanaka.

<sup>205</sup> Beno tala. Beno bambuka moyo, mpusu ke monanaka kieleka mutindu mbuma ya blé. Beno me mona? Ntangu yayi, beno lenda ve kutuba ti, kuna na ntangu ya nsungi ya Luther, “yinti vwandaka blé,” na yina ya kele na Luzingu na kati ya yawu. Yinti kele mbote, Luzingu na kati ya yinti vwandaka mbote, kasi, beno bambuka moyo, Luzingu me landa na kukwenda na ntwala; me luta Élie na Élisée. Luzingu ke na kulanda na kukwenda na ntwala. Kasi, beno bambuka moyo, ya me kuma na kitezo yankaka. Ya lenda vwanda kaka na kitezo yina ve. Beto lenda kudya ve nzutu ya kufwa ya niama ya mwa nsungi yankaka. Beto lenda kudya ve nzutu ya niama ya kufwa ya Pentecote ya kubola, ya ba-Methodiste, to ya ba-Baptiste. Beno me mona, ya me kuma nzutu ya kufwa ya niama ya kupola. Beto ke na Madya ya madidi, Ndinga ya ngunga yayi, mpe nyonso yankaka yina.

<sup>206</sup> Beno bambuka moyo, mpusu kele kieleka mutindu mbuma ya blé. Beno lenda ve. . . Ya vwandaka talana mutindu yina ve ntangu ya vwandaka mena, ya vwandaka talana mutindu yina ve ntangu ya vwandaka bafelele ya blé, kasi kieleka ya vwandaka monana na kati ya mpusu. Ya kutalanaka mutindu yina ve na. . . Yesu Klisto mutindu mosi mazono, na kati ya Luther; ya

kutalanaka ve mutindu yina na kati ya Wesley; kasi kieleka ya kusalaka na kati ya Pentecote, “ke vuna bantu ya kieleka ya Kusolama kana ya lendaka salama.” Beno me mona? Beno tala bansungi ya beno.

<sup>207</sup> Kasi beno bambuka moyo, ti dibuundu ya Pantekote, na bilumbu ya nsuka, vwandaka Laodika; mpe ba tulaka Klisto na ngaanda, Mukokolo, Blé, Yawu mosi. Ntangu Yandi mekaka . . . Beno bambuka moyo, ntangu Yandi mekaka na kumonana Yandi mosi na kati ya dibuundu, ba tulaka Yandi na ngaanda. Ya vwandaka ntete dibuundu, ya vwandaka fwanikisa; ya kupakulama.

<sup>208</sup> Kasi *awa* kele Ndinga, Klisto Yandi mosi, ya kele Ndinga ya kupakulama yina ke kwisa samu na bantu yankaka ya Nzutu ya Yandi, Kento ya makwela. Bapakulami, ya maza mutindu mosi na yina nokisaka blé, mutindu beto vwandaka me zonzila yawu, ke nokisaka mpe matiti ya yimbi, bapakulami. Kaka bantu ya Kusolama, to bayina ba zabaka ntete, ke lenda na kumona luswaswanu na kati-kati ya bawu. Ntangu yayi, Éphésiens 5:1 ke tubila beno yawu, mpe mutindu ya vwandaka.

<sup>209</sup> Ba kele bapakulami. Bantu nyonso ke tuba, “Nkembo na Nzambi! Beto kele na kimpwanza awa. Alleluia! Beto . . . Oh, aleluya! Beto ke zonzaka bandinga ya malu-malu, mpe beto ke dumukaka. Beto kele na kimpwanza ya bakento; beno bantu zola kutula bawu na yisi ya nyonso ya mutindu ya bima.” Beno me mona? Beno kwenda na ntwala. Ya kele na kima ve yina beno lenda sala. Beno ke tuba, “Mbote, beto ke zonzaka na bandinga ya malu-malu. Beto ke lookaka. Beto ke binaka na Kimpeve. Beto ke longaka Ndinga.” Kieleka. Dyambu ya kutuba samu na yawu kele ve. Mutindu mosi kusalaka bantu ya ntama yayi awa na kati ya Biblia.

Yesu tubaka, “Ya ke vuna bantu ya kieleka ya Kusolama kana ya lendaka salama, bantu ya kieleka ya Kusolama.”

<sup>210</sup> Ntangu yayi beno tala, mpusu . . . Katuka Mbuma ya ntete, Mbuma yina kotaka na ntoto, Ya vwandaka ata organisation ve. Ya vwandaka Mbuma mosi, na Yawu mosi. Kasi ntangu yawu me mena, ya vwandaka ve Mbuma; ya vwandaka organisation, beno me mona, matiti, blé.

Na manima ya me luta na kitezo yankaka, yina vwandaka felele ya blé. Dyaka ya vwandaka ve mutindu na mbandukulu. Ya vwandaka organisation.

<sup>211</sup> Ya me luta na mpusu, matiti mingi, Pentecote, na kutala ya me baka nzutu ntangu yayi. Beno tala yawu. Ya ke na kubakaka nzutu ntangu nyonso, kieleka na kutala mutindu kaka mosi, kieleka ke talana mutindu Mbuma ya blé ntangu beno ke mona mwa nzutu yayi kuna.

<sup>212</sup> Kasi na nsuka Yawu me talana, mpe ata organisation. Ya kele dyaka ve na minati. Organisation kele kaka munati. Minati kele

dyaka ve; mwinga fwana kufwa, mpusu fwana kufwa, nyonso fwana kufwa, kasi blé ke landila na kuzinga. Yina kele nzutu ya mvumbukulu, yina ke kwisa mbala mosi kuna mpe ke kwisa baka bawu. “Bantu ya nsuka ke vwanda bantu ya ntete, mpe bantu yina vwandaka ya ntete ke vwanda bantu ya nsuka.” Beno me mona, ke kwisa baka bawu mbala mosi na mvumbukulu. Beno ke na kulandaka yayi? [Dibuundu me tuba, “Amen.”—Mu.] Mbote. Beno tala, mbuma kele. . .

<sup>213</sup> Mpusu kieleka ke talana mutindu mbuma. Mpe muntu yina kele na bilanga ya blé, to kima yankaka, lendaka tala mpe ke tuba, “Nkembo na Nzambi, mu me kuzwa bambuma ya blé,” na yina ti yandi me kuzwa ntete ve mbuma mosi ya blé. Hmm? Ya ke talana kaka kieleka mutindu blé, kasi ya kele mpusu.

<sup>214</sup> Ntangu yayi, bampangi, beno vutuka na munu. Kisika reveil ya ntete kwizaka, na manima (lufwa) bilumbu ntangu mbuma ya blé kubwaka na kati ya ntoto, Nzutu, Kento ya makwela ya Klisto? Klisto bongisaka Kento ya Yandi ya makwela, ya kele kieleka, Dibuundu ya Yandi? Ata mbala mosi ti Yandi kubongisaka Yawu; Yandi tulaka kaka bantumwa, mpe baprofete, mpe nyonso yankaka yina, na kati ya Dibuundu, samu na kubika Yawu ya bunkete. Kasi na Nicée, na Rome, bankama tatu na sambanu ya bamvula lutaka, ba bongisaka yawu mpe basisaka na yawu organisation. Ya kele kieleka? Mpe yawu kufwaka. Nyonso yina ndimaka ve na dibuundu yango vwandaka luta na lufwa. Mpe kondwaka kuningana, bamvula nkama, na kati ya poto-poto.

<sup>215</sup> Kasi, na manima ya mwa ntangu, ya me monana na Luther. Mwa mwinga ya ntete ya blé me monana. Ya zole, ya me banda na kumena kuna. Ya landilaka, kuzwaka Zwingli mpe nyonso yankaka yina, mpe ba-organisation yankaka yina mpe nyonso yankaka. Kuna, na manima ya mwa ntangu fyoti, me kwiza ba-Anglican.

<sup>216</sup> Mpe na manima yinki salamaka? Awa me kwiza Wesley na mvumbukulu ya mona, felele ya blé, ya ke talana mutindu kulutula mwa fyoti Blé. Kuna yinki ya kumaka? Ya me bongama, mpe yumaka mpe kufwaka.

<sup>217</sup> Luzingu kwendaka mbala mosi na mpusu, mpe mpusu me basika na kutala ya kulunga mutindu Blé. Kasi, na nsuka, bulawu ya yawu kutalanaka na kati ya nana to kumi ya bamvula, na kulutula bamvula tatu me luta. Ntangu yayi yinki yawu ke na kusalaka? Ke na kwendaka ntama na Blé.

<sup>218</sup> Ntangu yayi samu na yinki ya kele na ata organisation ve yina me banda bamvula makumi zole me luta na reveil ya nene yayi; ya kele baprofete ya kupakulama, milongisi ya kupakulama, nyonso yina, kasi samu na yinki ya kele ve? Ya kele na kima ve na manima ya Mbuma. Beno me mona, Ya me vutuka, kukondwa organisation. Oh, la la, muntu ya kufwa meso lenda

mona yawu. Ya lenda sala organisation ve; Ya me telemina yawu mingi. Ya kele mbuma ya Blé, Yawu mosi. Mwana ya muntu ke zabakana. Mbuma ya Blé ke vutuka dyaka na Yawu mosi, Mwana ya muntu na bilumbu ya nsuka.

<sup>219</sup> “Mpe ya ke kwisa bamekudi ya luvunu ya Yawu, na bilumbu ya nsuka, yina na kutala ke vuna bantu ya Kusolama kana ya lendaka salama.” Beno tala na bampusu ya bawu ya ba-organisation yina ke na kukwendaka ntama ntangu yayi.

<sup>220</sup> Ya ke bika kaka ti Blé kuzabana, na bantu ya Kusolama, bayina kele kitini ya Yawu. Beno tala mutindu kitoko yayi me natama awa ntangu yayi. Kaka . . . Beno tala, bapakulami ke kuka; bantu ya kieleka ya Kusolama, bayina ba zabaka ntete, Éphésiens 5:1, to, 1:5, na kisika ya yawu, ke vwanda ya kukubika, ya kusolama. Ba kele bantu yina kaka ti yawu ke vuna ve.

<sup>221</sup> Beno tala, baprofete ya kupakulama ke vwanda ya luvunu, mpe na kati-kati ya nyonso yina ya ke vwanda na bantu ya kieleka ya kupakulama. Wapi mutindu beno ke sala luswaswanu? Na nzila ya Ndinga. Mutindu, beto vwandaka me tala yawu na kifwanukusu. Beno me mona yawu? Beno tuba, “Amen.” [Dibuundu me tuba, “Amen.”—Mu.] Beno me mona?

<sup>222</sup> Beno tala, bapakulami, kaka Ndinga ke kabula bawu, bidimbu ve. Oh, ve. Ba ke sala mutindu mosi ya bidimbu, kasi Ndinga kele yina ke kabula bawu. Kieleka. Bawu nyonso ke pesa profesi. Bawu nyonso ke salaka *yayi*, *yina*, mpe *yankaka*, kieleka, kaka mutindu mosi. Yesu tubaka ba ke sala kima mutindu mosi. Kasi Ndinga kele yina ke kabula bawu, beno tala, bidimbu ve.

<sup>223</sup> Beno me tala? Yesu ke tuba awa, na Matthieu 24. Yandi tubaka ve, “Bayesu ya luvunu ke telama na bilumbu ya nsuka.” Oh, ve, ata mbala mosi ve ti ba ke pesa nzila na yawu. Ve. Beno kuzwa muntu ya Pentecote yina kele muntu ya kieleka ya Pentecote, yina ke tuba, yandi mosi, yandi kele “Yesu”? Beno me mona? Beno kuzwa Methodiste, to Baptiste, to muntu ya mutindu yina, to muntu mosi ya ba-organisation, yina ke tuba, “Beto kele Yesu”? Ba zaba ya kulutila yina. Ba lenda sala yina ve. Kasi Biblia ke tuba ba ke vwanda “Baklisto ya luvunu,” Bayesu ve, kasi, “Baklisto ya luvunu.” Ba ke ndima ve, na kutuba, “Mu kele Yesu.” Oh, ve.

<sup>224</sup> Kasi ya kele na “Baklisto ya luvunu,” mpe zaba yawu ve, samu ba kele ya kuswaswana na Ndinga. Mpe Nzambi ke pesaka bimbangi mutindu mosi. Awa, mu ke na kunataka kaka yayi na mumekanu ntangu yayi, samu ti beno me mona kima mutindu mosi kusalama na nzila ya bantu yayi yina me salama na kieleka. Mpe Yesu tubaka yawu.

<sup>225</sup> Ntangu yayi, mutindu mu vwandaka me tuba, ntangu yayi samu na beno bantu yina ke na kulandaka, na yinsi ya alo-alo kuna, mu—mu ke na kufundisa beno ve, kasi yayi kele dibuundu

ya munu mpe—mpe nkonga yina Mpeve-Santu me tula munu, mpe mu fwana tuba na bawu Kieleka. Ngunga me luta mingi.

<sup>226</sup> Ntangu yayi, ba ke pesa muswa ve samu na yawu, kasi, “Baklisto ya luvunu,” bapakulami, ya luvunu, na kutala ke vwanda na konso kidimbu mpe konso kisono ya Ndinga. “Ba ke kwikila na mbotika ya Mpeve-Santu?” Kieleka. “Ke kwikila na nyonso *yayi*?” Inga. “Ke kwikila na kuzonza ya bandinga ya malu-malu?” Inga. “Ke kwikila ti bidimbu mpe bimangu ke vwanda, bidimbu ke vwanda na bawu?” Yinga. Yina kele ve ba-Methodiste, yina kele ve ba-Baptiste. Ve, ve. Yina kele bantu ya Pantekote. Beno me mona, yayi kele kilumbu ya nsuka.

<sup>227</sup> Ntangu yayi, dibuundu ya nsungi ya ntete zolaka ata mbala mosi ve kutala yawu. Dibundu ya nsungi ya ba-Methodiste talaka yawu ata mbala mosi ve; dibuundu ya nsungi ya ba-Baptiste, bawu talaka yawu ata mbala mosi ve; Dibundu ya nsungi ya ba-Presbyterien, bawu talaka yawu ata fioti ve. Kasi, Pentecote, ya kubelama mingi mutindu Kima ya kieleka! Ya kele kisika, Blé. . .mpusu na kutala kele mutindu Blé. Ata mbala mosi ve ti ba ke tala yawu. Beno me mona? Ba lenda ve. Kasi ya kele bilumbu ya nsuka, kilumbu yayi. Yinga, tata.

<sup>228</sup> Beno tala, kaka mutindu ya vwandaka na mbandukulu, mutindu mosi ya ke vwanda na nsuka. Mutindu Ève tendulaka yimbi Ndinga mosi, Satana salaka na Ève, mpe kento kwikilaka yawu. Kento, bakala ve; dibuundu, Yandi ve. Beno me mona? Dibundu vwandaka yandi yina kuzwaka ndinga ya luvunu. Beno me mona? Adam ve; Ève. Klisto ve; dibuundu, kento ya makwela, ya kupakulama, yina zolaka vwanda, yandi yina ke bokilaka yandi mosi Kento ya makwela, beno me mona, yandi me kuzwa ndinga ya luvunu.

<sup>229</sup> Beno lenda kumona yawu ve? Beno tala, ya ke na kukangamaka mutindu singa ya dipapa, mutindu bandabu na meso ya beno. Beno tala, nyonso yina beno ke tala, na Biblia, Ya ke vwanda nyonso kaka kintwandi. Ève, Adam ve; Ève kwikilaka yawu, Adam ve. Kento ya makwela bubu yayi, ya kufwanikisa, me kwikila yawu; Klisto ve. Kento ya dikwela ke na mitundu nyonso, kento ya makwela ya kufwanikisa; bidimbu mutindu mosi, bimangu mutindu mosi, nyonso mutindu mosi; kasi Ya kieleka ve. “Ke vuna bantu ya Kusolama kana ya lendaka salama.”

<sup>230</sup> Ntangu yayi na nswalu, kana beto lenda sukisa yayi na baminuti kumi na tanu, beto ke vwanda na ntangu ya mbote. Beno tala kieleka mbote ntangu yayi, samu beno—beno kubakula yawu yimbi ve, samu na beno.

<sup>231</sup> Ntangu yayi, ve, ba ke pesa muswa ve ti ba bokila bawu “Yesu ya luvunu.” Ba ke pesa muswa ve, ti ba bokila bawu, “Yesu.” Kieleka ve. Ya kele ya kulutula pwelele. Muntu nyonso zolaka kuzaba yawu. Bantu nyonso zolaka zaba ti ba vwandaka

ve Yesu. Mu ke kipe ve kana ba ke na mafuta na manima ya bawu, mpe menga na maboko ya bawu mpe bisika nyonso na meso, ba zaba dyaka ti ya kele. . . Muntu nyonso yina kele na sense ya mbote, zabaka ti ya vwandaka Yesu ve. Beno me mona? Ba pesaka muswa na yawu ve. Kasi ba ke kumibokila “bapakulami.” Mpe bawu ke sala bidimbu mpe bimangu, “na kutala samu na kuvuna bantu ya Kusolama.” “Kasi Baklisto ya luvunu, bapakulami, ke telama, mpe ke vuna bantu ya Kusolama kana ya lendaka salama.”

Ntangu yayi beno tala mbote-mbote. Beno kondwa mambu yayi ve, samu ti ya kele mbote na kuwa.

Yandi ke na kutulaka mwa scotch na zulu ya kinzonzolo yayi awa, samu ti yawu kubwa ve. Mu vwandaka me toka; ya vwandaka me kubwa na zulu ya scotch, beno me mona.

Mpe ya ke vwanda kaka mutindu Yina, Biblia, tubaka ya ke vwanda. Beno me mona?

<sup>232</sup> Beno me tala, Bayesu ya luvunu ve. “Baklisto ya luvunu!” Ba ke kwikila ti ba kele ya kupakulama, kasi ba zaba ti ba kele Yesu ve. Beno me mona, ya me lutila pwelele. Kana muntu basika mpe tuba, bubu yayi, “Beno tala bidimbu na maboko ya munu. Beno tala na zulu ya mbunzu ya munu. Mu kele Yesu.” Mbote, ntangu yayi, beto zaba ti ya kele luvunu. Mpe, beno bambuka moyo, Yesu ata mbala mosi ve tubaka ti bantu mutindu yina ke kwisa. Yandi tubaka ti “Baklisto ya luvunu” ke kwiza. “Baklisto,” ya mingi, ba-denomination, mpe nyonso yina, *bapakulami*; bapakulami na mpeve ya denomination, mpe Ndinga ve. Beno ke na kulanda yawu? Yesu ya luvunu ve. “Baklisto ya luvunu,” bapakulami, ya luvunu. Beno me mona? Oh, mutindu pwelele ya kele! Mutindu beto. . . Kieleka beno ke kondwa yawu ve!

<sup>233</sup> Ntangu yayi, beno bambuka moyo, mu ntangu nyonso ke tubaka na beno ti ya kele na mitindu tatu ya bantu. Ya kele na makanda tatu ya bantu: Cham, Sem, mpe Japhet, makanda tatu. Mitindu tatu, mpe mu ke tubaka, ti ya kele na mukwikidi, mukwikidi ya kufwanikisa, mpe muntu ya ntembe. Konso ntangu ya ke vwandaka, konso ntangu ya ke vwanda. Beno me mona? Ya vwandaka na Moïse, mukwikidi; ya vwandaka na Jannès na Jambrière; bantu ya ntembe. Beno me mona? Ya vwandaka na Balaam; Moïse. . . Konso ntangu mitindu tatu yango ya bantu, mitindu tatu; mukwikidi, mukwikidi ya kufwanikisa, mpe muntu ya ntembe.

<sup>234</sup> Ntangu yayi beno bambuka moyo, mumpani, dibuundu ya denomination, ke kwikila na ata nyonso ve ya bidimbu; madidi, ya misiku, ya nkadulu ya ngolo, dibuundu na kati ya yinza, denomination. Kasi mukwikidi ya kufwanikisa kele mpusu yango. Ya kele muntu yina ke kwikilaka na kufwanikisaka. Mpe na manima ya kele na mukwikidi ya kieleka yina kele kieleka ya

kieleka. Ntangu yayi, beno tala bawu mbote mutindu bawu ke kwenda na ntwala ntangu yayi, mwa minuti fyoti.

<sup>235</sup> Mpe beno tala wapi mutindu ya matalana kele na bantu ya ntembe yayi, to mikwikidi yayi ya kati-kati mpe mimpani. Oh, la la! Ba ke na matalana, beno tala, mpe mutindu Satana telamaka kuna na Ntwala ya Ndinga ya kieleka, mpe tubaka, “Ya kele ya kusonama!” Ya kieleka?

<sup>236</sup> Samu na yinki Satana salaka yawu? Ya kele samu ti yandi zabaka ve Ndinga ya . . . Yandi zabaka ti Ndinga vwandaka samu na ngunga yina, kasi yandi salaka ntembe ti mwa Muntu ya kukuluka yayi vwandaka Ndinga. “Kana Nge kele Mwana ya Nzambi. Mu zaba ti Mwana ya Nzambi ke kwiza, samu ti Ya kele ya kutuba ti Yandi ke sala yawu. Mpe ya kele ya kusonama, ‘Yandi ke tumisa Bawanzio ya Yandi samu na Nge.’ Beno me mona? Lakisa munu yawu! Sala kimangu! Ti mu mona Nge kusala yawu.” Beno me mona? Beno me mona?

<sup>237</sup> Beno me mona, mumpani, mukwikidi ya kati-kati, mumekudi. Beno tala Judas kaka na kati-kati ya bawu, ntangu kaka mosi, mukwikidi ya kati-kati! Beno me mona? Beno tala, mpe ya vwandaka na Ndinga ya kieleka.

<sup>238</sup> Wapi mutindu ba kele na matalana! “Ntangu yayi, beno landa ve buzoba yina. Ya kele na kima mosi ve na Yawu. Beno kwenda kuna ve. Ya kele kaka nkonga ya kufuluka na makelele. Ya kele na kima mosi ve na Yawu. Ya kele kaka kuningana ya nzutu. Yina kele na kati ya dibanza ya beno.” Beno me mona, beno me mona yina mu zola kutuba? Kutelama kaka na Ntwala ya Ndinga mpe kutuba yawu.

<sup>239</sup> Satana kwisaka mbala mosi kuna. Mutindu Biblia ke tuba awa na Jude, “Mpe Archange, ntangu yandi vwandaka nwanina na Satana, tubaka, ‘Mfumu kupesa nge kitumbu.’” Na kutelemina Ndinga Yawu mosi!

Mpe beno tala mbeni ya Klisto, mupakulami, yina kele ya kutelama kaka awa na kuteleminaka Ndinga ya kieleka ya kilumbu, Yesu Klisto, mpe tubaka, “Ya kele ya kusonama.”

<sup>240</sup> Beno tala bilumbu ya nsuka. “Ya ke vwanda ya kubelama mingi ti ya ke vuna bantu ya kieleka ya Kusolama kana ya lendaka salama.” Oh, la la! Yina ke sala bantu ya Kusolama kuvunama ve, beno zaba samu na yinki? Ya kele samu ti ba kele Ndinga. Beno me mona? Mutindu kaka Luzingu yina kele na kati ya nsimbulu, mu vwandaka me tuba yawu ntama mingi ve, Ya lenda kuvuna Yawu mosi ve. Beno me mona, Ya kele Ndinga mpe na kati ya nsungi ya Ndinga. Ya kele kieleka.

<sup>241</sup> Mutindu kaka Jérémie, Yandi zabaka. Ata nyonso yina Hanania tubaka, yandi zabaka kisika yandi vwandaka. Ya kele kaka mutindu Moïse kusalaka, mpe—mpe bayankaka ya bawu. Ya kele, yandi zabaka, ata nyonso yina profete ya



luvunu vwandaka tuba, ti ya vwandaka Ndinga ya Nzambi. Ya vwandaka ya kusonama.

Ya lele samu na yina Michée lendaka tuba, “Mbote, beno vingila kaka mpe beno ke mona.”

<sup>242</sup> Achab tubaka, “Mu ke kwikila baprofete ya munu. Organisation ya munu me vuna ve. Ntangu mu ke vutuka na ngemba. . . . Beno tula muntu yayi na boloko kuna. Mu ke tala dyambu ya yandi! Beno pesa yandi dimpa ya mpasi. Beno tula yandi na ngaanda, beno wisana na yandi ata fyoti ve. Ntangu mu ke vutuka na ngemba, beto ke tala dyambu ya muntu yayi.”

<sup>243</sup> Michée tubaka, “Kana nge vutuka, Mfumu me zonza na munu ve.” Yandi zabaka ti yandi vwandaka na MUTINDU ME TUBA MFUMU, mpe vision ya yandi vwandaka kieleka na MUTINDU ME TUBA MFUMU; samu ya nsungi yankaka ve, kasi samu ya nsungi yango. Amen! Alleluia! Nsungi!

Na matalana, ke telama kuna mpe nwaninaka na Wanzio ya ntete! Ba tubaka, ti, “Bilawu ke tambula na mapapa ya bisengo kisika Bawanzio ke na boma ya kutambula.” Ya kieleka.

<sup>244</sup> Kikuma na yina bantu ya Kusolama, Yesu tubaka, ke vunama ve, ya kele samu ti bawu kele Ndinga yango. Ba lenda vwanda kima yankaka ve. Ba lenda kuwa kima yankaka ve. Ba zaba kima yankaka ve. Ya kieleka.

<sup>245</sup> Beno bambuka moyo, Moïse kunatamaka ve na bilanda-landa nyonso ya bawu. Yandi kunatamaka? Moïse tubaka, “Ntangu yayi, vingila fyoti, Pharaon. Nge zaba yinki? Mfumu me tuba na munu na kusala yayi, kasi, nkembo na Nzambi, mu me mona ti bantu ya nge lenda sala kima mutindu mosi. Na yawu, mu ke tuba na nge yinki mu ke sala, mu ke vukana na beno”? Huh! Yina ke wakana mutindu profete ya Nzambi ve. Ve, ata fyoti ve! Yandi telamaka kaka mutindu yandi lendaka telama. Yandi zabaka ti, kieleka, Nzambi ke tala yawu na mutindu nyonso, samu ti Yandi silaka yawu. “Mu ke vwanda na nge. Mu ke bika nge ve.”

<sup>246</sup> Yandi zabaka, na yawu yandi vukanaka ve na bawu. Oh, ve. Yandi vwandaka kaka na bawu. Yandi zolaka ata mosi ve ya ba-denomination ya bawu. Yandi telamaka kaka na Nzambi. Yandi kunatamaka ve na nzila ya bima nyonso yina ba lendaka sala. Ntangu ba vwandaka sala kima. . . . Yandi vwandaka bokila basidi; ba vwandaka bokila basidi. Yandi vwandaka bokila menga; ba vwandaka bokila menga. Yandi bokilaka nyonso; ba vwandaka mekula yandi na mutindu nyonso, ntangu nyonso. Yandi telamaka kaka. Yandi zabaka kaka, yina, Nzambi vwandaka na kati ya kusalu.

<sup>247</sup> Beno me bakula ntangu yayi? [Dibuundu me tuba, “Amen.”—Mu.] Beno baka zole mpe zole, mpe ya ke sala yiya? [“Amen.”] Beno zola ve ti ya kunyenga mingi-mingi. Na yawu, na yawu beno—beno me bakula, beno me mona.

Samu na yinki? Ba ke vunama ve na nzila ya yawu, mukwikidi ya kieleka, yandi kele Nkuna yina ba zabaka ntete na ntwala yina ke telama na kilumbu yango.

248 Kaka, mpe, Yesu tubaka yayi, “Mingi ke kwiza na kilumbu yango, na Nkumbu ya Munu, mpe ke tuba, ‘Mfumumu, mu bingisaka ve bampeve ya yimbi na Nkumbu ya Nge?’” Yesu tubaka, “Na nsuka ya bilumbu, na yina ntangu ke suka nyonso mpe ti mvumbukulu ya nene ke kwisa, ti mingi ke kwiza mpe ke vwanda na Kintinu.” Kintinu ya Nzambi kele na kati ya beno.

249 Mingi, matiti ya yimbi ke kwisa mpe ke vwanda kuna na Blé, ke tuba, “Ntangu yayi, vingila fyoti, Mfumumu! Mu zonzaka na bandinga ya malu-malu. Mu bokaka. Mu binaka na Kimpeve. Mu bingisaka bampeve ya yimbi. Mu zonzaka na bandinga ya malu-malu. Mu salaka bima nyonso yayi.”

Yinki Yandi tubaka? Beno tala. “Beno bantu ke salaka disumu ya nkú, mu zabaka beno ata mbala mosi ve.”

250 Yinki kele *disumu ya nkú*? Beno yufula muntu. Ya kele “kima yina beno zaba ti beno fwana sala, mpe beno ke sala yawu ve.” Ba zaba Ndinga yayi. Ba ke kuwaka Yawu. Beno ke na kuwaka bande yayi. Beno ke na kuwaka Nsangu yayi. Beno ke mona Mfumumu Nzambi kutuba yawu; beno ke mona Yandi kusiamisa yawu, kusala yawu kieleka. Mpe beno zaba ti Yayi kele kaka pwelele mutindu mwini ke na kungenga na ngaanda, kasi beno bayina ke kangama na denomination ya beno, beno kangama na bima ya luvunu yina; beno bantu ya masumu ya nkú!

“Oh, ee, mu me kuzwa bansamununu ya nene. Mu salaka yayi. Mu salaka yina.”

Yandi tubaka, “Katuka na Munu, nge muntu ya disumu ya nkú, Mu zabaka nge ata fioti ve.”

251 “Mbote, Mpeve-Santu me kubwa na zulu ya munu.” Mu me sala ntembe ata fyoti ve. “Mu zonzaka na bandinga ya malu-malu. Mu yimbaka na Kimpeve. Mu salaka . . .” Mu ke na kusala ata fyoti ve ntembe. Ata kyuvu ve samu na yawu. Oh, mpangi-bakala, mpangi-kento, wapi mutindu ya mvwandulu!

Yayi kele ntangu ya kutekita. Wapi kisika beto me kuma? Ndinga yayi ke na kukotaka na Luzingu ntangu yayi. Beno tala.

252 Yinga, Yandi tubaka ti ba ke sala yawu. Beno tala, “Beno bantu ya masumu ya nkú.” Mu ke na Masonuku ya kusunama awa. Mu zaba kaka ve kisika ya vwandaka. Mu vwandaka me baka ntangu mingi. Mu ke tala yawu, minuti fyoti, mpe kumona yinki ya vwandaka. Mu ke—mu ke na Matthieu 7:21. Mu—mu ke na kuzabaka kaka ve kisika. Mu, bambala mingi mu ke notikaka kima na yawu ve, mbote, mu—mu ke longa mutindu yayi, mu—mu me zimbana yina mu vwandaka landa na Masonuku. Matthieu 7:21.

*Bantu nyonso ve yina ke bokilaka munu, Mfumu, Mfumu, ke kota na kimfumu ya mazulu; kasi kaka yandi yina ke salaka luzolo ya Tata ya munu yina kele na mazulu.*

*Mingi ke tuba na munu na kilumbu yina, Mfumu, Mfumu, beto pesaka profesi ve. . .*

253 Baprofete, bapakulami! Ya kieleka? “Beto vwandaka ve baprofete? Beto vwandaka ve ya kupakulama, bapakulami? Mu pesaka profesi ve na Nkumbu ya Nge? Mpe na Nkumbu ya Nge mu basisaka ve bampeve ya yimbi?” Wapi mutindu beno lendaka sala yawu, mpe kumanga na kubaka mbotika na Nkumbu ya Yesu? Beno me mona? Oh, la la! Beno me mona mutindu ya lenda vuna? Ke belama kaka na kisika ya kieleka yina, kuna ke vutuka manima. Ba ke kwenda mbala mosi na Ndinga, kuna ke vutuka manima. Ntangu yayi beno tala mbote yayi. Beto ke basisa yayi, minuti fyoti.

*Mingi ke tuba na munu. . . Mfumu, Mfumu, beto pesaka profesi ve, beto vwandaka baprofete? . . .*

Yinga, mu vwandaka me zonzila yawu na Matthieu 24:24.

*. . . mpe na nkumbu ya nge. . . basisaka bampeve ya yimbi? mpe na nkumbu ya nge beto salaka mambu ya ngi- . . . bimangu mingi?*

*Mpe na yina mu ke zonga na bawu, Mu zaba beno ve: Beno katuka pene-pene ya munu, beno yina ke salaka disumu ya nkú.*

254 “Ntangu Ya tulamaka na ntwala ya beno mpe beno monaka Yawu, mpe beno monaka Yawu kusala, beno monaka ti Ya vwandaka Ndinga; kasi samu na luzolo ya ba-denomination ya beno, beno kangamaka kaka na yawu. Mu zaba beno ata fyoti ve. Mu ke kipe ve lutangu ya bampeve ya yimbi yina beno me basisa, lutangu beno salaka *yayi* mpe *yina*; mu zaba kima mosi ve na beno.”

Balaam ke tuba, “Mu pesaka profesi kieleka, na Nkumbu ya Nge. Ya salamaka.”

“Ya kele kaka kieleka, kasi, ntangu ya ke kuma Ndinga, beno ke manga Yawu.”

255 Oh, mpangi-bakala, beno me mona kisika ya luvunu? “Profete” ve, kieleka; kasi na Ndinga, Ndinga ya kieleka, Ndinga yina ba me singisa me zabakana. “Beno bantu ya masumu ya nkú!”

Kumeka, Satana me meka na bansungi nyonso na kumekula Ndinga ya kieleka. Beto zaba yawu, mutindu yina ve?

256 Beno tala, kukuma na ndilulu mpe kubika. Beno tala awa, yandi tubaka, na Hébreux na kapu ya 6 (awa, beto vwandaka me tanga yawu ntama mingi ve, Mu vwandaka me tuba na beno,

“beto vutuka na kutala yawu,” mpe beto ke sala yawu na kati ya mwa baminuti me bikana.), yandi tubaka:

. . .kasi *matiti ya bansende mpe bayinti ya bansende . . .yina ba me kanga na kulosa; yina nsuka kele kuyokama na tiya.* (Ndilulu!)

. . .beno bayina *mekaka . . .dikabu ya mazulu, . . .*

<sup>257</sup> “Mekaka,” na mutindu yankaka, beno monaka Yawu! Beno lenda [Mpangi Branham me sala makelele na yinwa ya yandi—Mu.] kaka ve kumeka Yawu na yinwa ya beno. Kasi beno monaka Yawu, mpe beno zabaka ti Ya vwandaka Kieleka. Beno zabaka ti Ya vwandaka Kieleka. “Mekaka dikabu ya Mazulu.”

. . .mpe *bayina vwandaka me belama na Mpeve-Santu,* mutindu Ya kubwaka na zulu ya beno,

. . .*mekaka na ndinga ya mbote ya Nzambi, . . .*

“Mekaka,” beno monaka ti Ya vwandaka ya kulunga. “Mpe Mpeve-Santu kubwaka na zulu ya beno,” dititi ya yimbi na kati ya bilanga.

. . .mpe kuna kupesa *manima, . . .*

“Ke manga Klisto ya kieleka yina me santisa beno, mpe yina me bokila beno, mpe yina me tula kupakulama yina na zulu ya beno.”

. . .*ya ke dyaka ve na munkayulu yankaka yina lenda katula* disumu, samu na yawu.

Ba lenda lemvokila yawu ve! “Ba lenda kuma ve na luzabu ya Kieleka.”

*Samu ti ya lendaka salama ve ti bayina vwandaka . . . bayina vwandaka me belama na Mpeve-Santu,*

<sup>258</sup> Me kubwa na zulu ya matiti ya yimbi, beno me mona, “Mu bandaka na Yesu, mpe, ‘Mfumu, mu ke landila na kukwenda,’” kasi ntangu beno ke tuta Ndinga, beno ke baluka. “Bayina vwandaka me belama na Mpeve-Santu, mpe vwandaka me meka, to me mona Ndinga Yawu mosi me monisama.” Mpe kuna kupesa manima na Yawu, “Ba lenda ata mutindu nyonso kumona Yawu to kukwisa na Yawu.”

<sup>259</sup> Ya kele MUTINDU ME TUBA MASONUKU. Ntangu yayi, beno . . . “Mazulu mpe ntoto ke luta, kasi Yawu ve.” Beno me mona yawu? “Na mutindu nyonso ya lenda ve.” Biblia me tuba yawu, mpe Mpeve ke pesa kimbangi ya yawu.

<sup>260</sup> Beno tala, bika mu pesa beno mwa kifwanukusu mosi. Beno tala bantu yina basikaka na yisi ya profesi ya Moïse, bayina basikaka na organisation yina, mpe bayina basikaka na nyonso, na yisi ya profesi, ba monaka bisalu ya nene mpe mambu ya ngitukulu, mpe bima ya mutindu yina, mpe kumaka na ndilulu na kisika ya kukota.

261 Ntangu yayi, Lee, tala “nkumbu ya nge na kati ya Buku.” Nge me mona? Nge me yidika dyambu yimeni. Mpe samu na beno bayina kele awa ve, mpe beno bayina ke na kulandaka na alo-alo, ya kele Docteur Lee Vayle yina kele ya kuvwanda awa. Yandi ke na kuyidikaka bafoti samu na buku ya Bansungi Sambwadi yayi ya Dibuundu landila misiku ya ndinga. Mpe dyambu basikaka, to kyuvu, samu na “nkumbu ya beno yina ba ke katula na Buku ya Luzingu ya Mwana ya dimeme.” Beno me mona, ya tulaka milongi mingi na kati ya bakyuvu. Kasi beno vingila tii beno ke kuzwa buku, beno ke bakula yawu kana beno kele na mwa Nsemo na kati ya beno. Beno me mona?

262 Beno tala, ntangu yayi, beno ke balula yintu ya beno mpe ke tala dyaka na Yawu ve kana beno zola kumona Yawu ve. Mutindu mama ya munu vwanda tubaka, “Beno lenda kuzwa menga ve na kati ya ndunda, samu ti ya kele na menga ve na kati ya yawu.”

263 Beno tala, Nsemo fwana kwisa; ya kele na kati ya mudidi ve. Nsemo ke kwizaka na mpimpa, mpe mpimpa ke monaka Yawu ve. Beno tala ntangu yayi bapakulami na kati ya kilumbu yayi.

264 Mutindu Moïse basisaka bana ya Israël; mpe bawu kuwaka mpe kotaka na kati ya mvwanzi nyonso samu na yinsi ya nene yina kuna. Ntangu yayi, Israël vwandaka dyamba bantu nionso. Yandi vwandaka na yinsi ve, vwandaka na yinzo ve. Yandi vwandaka kwenda na yinzo mosi.

265 Beto ke na ata dibuundu ve. Beto ke . . . Beto ke—beto ke kwendaka na Dibuundu mosi, Dibuundu ya Bana-ya-ntete, Dibuundu yina kele na Nkembo; dibuundu yina kele na zulu ya ntoto ve, na nzila ya muntu. Dibuundu yina kele na Nkembo, bantu yina ba bokilaka na kubasika, bayina ba soolaka ntete samu na Luzingu ya Kukonda nsuka, beno me mona, bayina ke na kwendaka na Yinzo ya bawu.

266 Mpe ntangu ba kumaka na kisika samu na kusabuka, ba salaka ntembe na Ndinga, mpe vutukaka manima. Na manima Josué na Caleb mpe bayankaka kwendaka kuna mpe vutukaka na kifunda ya bambuma ya vinu, samu na kulakisa bawu ti yinsi vwandaka kuna, Ndinga ya Nzambi silaka, “Ya kele yinsi ya mbote, ya miliki mpe ya mafuta ya nyosi.” Mpe vutukaka na yawu, na lweka yayi, samu na kulakisa yawu na bawu. Mpe ba mekaka yawu, mpe tubaka, “Oh, oh, beto lenda ve kusala yawu, ata mutindu yina.”

267 Yinki kusalamaka? Ba kufwaka na ntoto ya kuyuma. Ba kangamaka kaka kuna mpe bongisaka bawu mosi, mpe kufwaka, muntu nyonso ya bawu, kasi bantu yina kwendaka kuna mpe bayina vutukaka na yawu, Josué na Caleb; Moïse ba zangulaka yandi. Kifwanukusu ya kulingila ya Dibuundu; mpe mvumbukulu ya Ngwisani ya Ntama, Ngwisani ya Malu-malu; mpe luzangulu ya Nzutu. Beno me mona bawu tatu kuna? Beno

fwana kubumba bawu tatu na nzila, beno me mona, na yawu, na mukwikidi mpe mumpani. Beno me mona?

268 Beno tala mutindu ya vwandaka “na mutindu nyonso.” Beno bambuka moyo, Nzambi ata mbala mosi ve lemvo kilaka disumu yango. Ntangu yayi wapi mutindu ba ke kwisa kota? Kana ya kele matiti ya yimbi, na kubanda, ya kele matiti ya yimbi na nsuka. Kaka bayina ba soolaka ntete ke mona Yawu.

269 Beno tala mbote ntangu yayi. Kaka mutindu na bilumbu ya Santu Martin, kaka ntete Bansungi ya Mudidi; mwa muntu mosi ya Nzambi. Bantu yikwa me tangaka ntete masonuku ya Santu Martin? Mingi ya beno me tangaka yawu. Ba kwendaka baka masonuku ya Santu Martin; nganga-Nzambi tubaka, “Kasi ba ndimaka yandi ve.” Kieleka, ba ndimaka yandi ve; na nzila ya bawu, kasi yandi vwandaka na nzila ya Nzambi. Mpeve-Santu tubaka na beto na kutula yandi kuna na mbandu ya tatu ya dibuundu yina. Beno me mona?

270 Beno tala mutindu mwa muntu ya santu yayi kuvwandaka; yandi yina ba bokilaka, yina ba kubikaka na ntwala. Bibuti ya yandi, mimpani. Tata ya yandi, soda. Ya lungaka ti yandi kulanda nzila ya yandi, na kuvwanda soda. Mpe, na yina yandi vwandaka sala, mpe ntangu nyonso yandi vwandaka kwikila ti ya vwandaka na Nzambi kisika mosi; muntu ya mfinda, mpe lendaka mona Nzambi. Kilumbu mosi yandi vwandaka luta na mbanza mosi, mpe ya vwandaka na kiboba mosi yina vwandaka na yinzo ve, yina vwanza kufwa, vwandaka lomba muntu. . . Yandi vwandaka tala madidi na nkokila yina. “Oh,” yandi tubaka, “pesa munu kima mosi samu mu fika nzutu; mu ke kufwa na nkokila yayi.”

271 Muntu ve vwandaka zola kusala yawu. Mpe Martin me kwenda na lweka mosi mpe vwandaka tala yandi mbote mwa ntangu fyoti. Muntu ve vwandaka zola kusala yawu. Yandi vwandaka kaka na kazaka mosi. Yandi ke kangama na madidi, yandi mosi, yandi vwandaka sala, kana yandi—yandi pesa yandi kazaka yango. Na yawu yandi banzaka, “Beto nyonso zole ke zinga kana mu pasula yawu mpe kukabula yawu na yandi.” Na yawu yandi bakaka kazaka ya yandi, mpe pasulaka yawu na bitini zole na lutebo ya yandi, mpe fikaka yawu kiboba yayi ya kukondwa yinzo. Yandi fukaka yandi na kazaka ya yandi.

Bantu nyonso vwandaka tuba, “Beno tala mukengi yayi ya ngitukulu. Beno tala soda yayi ya ngitukulu, yina me kufika kitini ya kazaka!”

272 Mpimpa yina vwandaka landa, na yina yandi zolaka kwenda ve na kisalu mpe yandi vwandaka ya kulala na mbeto ya yandi, yandi vwandaka ya kuvumbuka. Yandi talaka, mpe vwandaka ya kutelama kuna na kati ya kivinga, Yesu Klisto ya kutelama ya kufuka na kitini ya lele ya ntama yina yandi fikaka yandi. Kaka kuna yandi bakulaka, “Yina beno ke sala na bana ya Munu, ya

kele na Munu beno me sala yawu, na mupakulami ya Munu,” ya kulala kuna.

<sup>273</sup> Yandi vwandaka kisadi ya nene ya Nzambi. Dibuundu sekaka yandi, talisaka yandi mpasi, losaka yandi na ngaanda, mpe nyonso yankaka yina, kasi yandi vwandaka profete ya Nzambi. Yina yandi tubaka kusalamaka. Ya vwandaka na bantu mingi mpe, yina kwikilaka na yandi na nsungi yango.

<sup>274</sup> Mu zola lakisa beno mutindu dyabulu kele na luvunu. Kilumbu mosi yandi vwandaka tanga. Mbala mosi me basika wanzio mosi ya ngolo, na yimpu ya mfumu na zulu ya yintu ya yandi, ya kulwata mapapa ya wolo, nsinga ya kutunga na bilele ya yandi ya wolo, mpe yandi tubaka, “Martin, nge zaba munu?” Yandi tubaka, “Mu kele Mfumu mpe Mvulusi ya nge. Mu kele Yina vuukisaka nge. Bondila munu, Martin.” Kasi profete yayi, kuzabaka ti ya vwandaka na mwa kima ya mbote ve kuna, yandi landilaka na kutala yandi. Yandi tubaka, “Martin, mu kele Mvulusi ya nge, Yesu Klisto. Bondila munu! Nge zaba munu ve, Martin?”

<sup>275</sup> Martin me landila na kutala yandi, Masonuku vwandaka tambula na kati ya dibanza ya yandi. Yandi tubaka, “Satana, katuka na munu.” Yandi tubaka, “Nge ke na yimpu ya mfumu na zulu ya yintu ya nge. Kasi Ndinga ya Nzambi ke tuba ti ‘basantu ya Yandi ke byadisa Yandi’ na nsuka ya nsungi.”

Ya zolaka vwanda ve ndiiku samu na bantu ya Pentecote? Beno tala mbote Ndinga, mpangi-bakala. Ya kele kisika yina ya ke na kunata.

<sup>276</sup> Kilumbu mosi, mbala mosi dyaka, na monastère, ba vwandaka na kiboba mosi ya santu kuna, mpe nkonga ya bantwenya ya ba-moine. Ya vwandaka na mosi ya bawu yina vwandaka mwa ya kudasuka. Beno tala mbote yayi, yayi kele kingana ya mbote—ya mbote bubu yayi. Yandi vwandaka zola kuvwanda kima ya kulutila bayankaka nyonso. Yandi vwandaka zola kulakisa yandi mosi, kiyeka, kima ya kulutila nene, kima ya mbote mingi, ya kitezo nyonso, beno zaba, mpe kima ya nene mingi. Yandi zolaka vwanda muntu ya kitezo. Konso ntangu vwandaka zola bampangi yankaka ve... Beno zaba, yandi vwandaka zola kuvwanda muntu ya mutindu yankaka. Beno me mona? Yandi, ata nyonso yina ya vwandaka, yandi vwandaka na matalana. Yandi vwandaka kaka yandi yina ba vwandaka talaka. Ya vwandaka ve na muntu yina lendaka simba yandi. Ntangu yayi beno tala mbote yinki kusalamaka. Yandi zolaka vwanda na kima mosi ya nene. Yandi zolaka fwanikisa na bimvuka ya nene. Beno ke na kulanda munu? Beno me mona? Na yawu, yandi tubaka, yandi pesaka profesi. Yandi tubaka, “Mfumu me sala munu profete, mpe. Mu kele profete.”

Ntangu yayi, ya vwandaka na profete mosi yina zabakanaka na yinsi, mpe ya vwandaka Santu Martin; yandi butamaka

profete.

<sup>277</sup> Kasi mwana yayi tubaka, ntwenya yayi tubaka, ntwenya ya moine yayi ya bamvula makumi tanu, yandi tubaka, “Mfumu me sala munu profete, mpe mu ke lakisa beno yawu.” Yandi tubaka, “Na nkokila yayi Mfumu ke kwiza pesa munu mvwela ya kitoko, ya nene, ke tula yawu na zulu ya munu, mvwela ya mpembe, mpe mu ke vwanda na kati-kati ya beno. Kuna beno nyonso ke kwiza na munu, beno me mona, mpe beno ke kuzwa balutumu katuka na munu.”

Ntangu yayi beno fwanikisa yawu bubu yayi, beno me mona, “Mu ke vwanda mfumu ya organisation. Mu ke kipe beno, beno ba-moine nyonso yankaka.”

<sup>278</sup> Mpe kieleka, “Mpimpa yina, bansemo kupelaka na yinzo,” landila kutuba ya masonuku ya Santu Martin. Beno tanga yawu. Mpe ya kele kieleka. Ya ke disolo. Mpe bansemo me pela, mpe bayankaka nyonso vwandaka tala yawu mbote, mpe awa me kwisa... Yandi vwandaka ya kulwata mvwela, me telama na kati-kati ya bawu. Yandi tubaka, “Beno me mona yina mu vwandaka tuba na beno?” Kasi ya kele ya kuswaswana na Ndinga.

<sup>279</sup> Mpe ntangu yandi kwendaka mpe bakaka kuluntu ya kiboba ya yinzo, yandi me tambula bisika nyonso mwa fyoti, yandi me tuba, “Mwana, ya ke na kuwakana ve ti ya kele ya mbote.” Yandi me tuba, “Ya kele kaka na mutindu mosi.” Yawu yayi! “Ya kele kaka na mutindu mosi samu beto kuzaba. Ya ke na kutalana ya kimpeve.” Bakala, bantu ya Pentecote zolaka baka yawu, musisa, disasi, singa, ndoba, mpe nyonso yankaka yina! Yandi tubaka, “Kimangu lendaka monana nyonso ya kulunga, kasi ya ke na kumonana ya kulunga ve na Ndinga. Ntangu yayi, beto ke na muntu mosi, profete ya kupakulama, yina nkumbu kele Martin. Kwisa, kwenda na ntuala ya yandi.”

Muntu yango tubaka, “Ve, ve! Martin ke na kima ve ya kusala na yayi.”

Mpe yandi tubaka, “Nge ke kwenda, na mutindu nyonso.” Mpe ba bakaka yandi na diboko, samu na kunata yandi na ntuala ya Martin, mpe dizwela me katukila yandi.

Beno me mona, “Ke vuna bantu ya Kusolama kana ya lendaka salama.” Beno me mona, ba zaba bawu. Yesu tubaka, “Mameme ya Munu kuzaba Ndinga ya Munu.”

“Oh,” beno ke tuba, “beno kuwa *Ndinga* ya Munu.”

<sup>280</sup> Ya kele Ndinga ya Yandi. “Muntu ke zinga na nzila ya dimpa kaka ve, kasi na nzila ya konso Ndinga.” Beno me mona? Bayina ba soolaka ntete zaba yayi. “mpova ya yanza, to ndinga ya nzenza, bawu ke landa yawu ve.”

<sup>281</sup> Ya kele mutindu mosi na bantu yina kuna; bawu ke landa ve. Ba zabaka ti Martin vwandaka kuna, profete ya nsungi yina, ya



me talisama na Nzambi na nzila ya Ndinga, zabaka Ndinga. Mpe muntu yina zolaka telama ve na ntwala ya Yawu.

<sup>282</sup> Yandi tubaka mpe, “Kisika Mvumbi kele,” to Ndinga, “kuna, na nsungi, bangononi ke vukana.” Ntangu yayi ya kele Matt- . . . Beno zola kusonika yawu, ya kele Matthieu 24:28. Kaka ntete mwa fyoti, Matthieu 24:24; banzila yiya na yisi ya yawu, beno me mona, kana beno zola kutanga yawu. “Kisika kele Mvumbi,” Mani kele, Ndinga kele, “kuna bangononi ke vukana.”

<sup>283</sup> Ntangu yayi mu fwana sala mbangu. Mu me tala na zulu kuna mpe me mona ngunga yina . . . Ya me—ya me kuma baminuti sambwadi to baminuti nana ya midi. Mu ke sala nswalu-nswalu, to beto ke manisa yawu na nkokila yayi, mutindu beno zola. Na suka yayi to na nkokila yayi? Huh? Bantu yikwa ke kwenda na yinzo na manima ya lukutakanu, beno lakisa diboko, beno me mona. Oh, la la, ya ke vwanda mbote ti beto kulanda!

<sup>284</sup> Mu ke na kiadi samu na kusimba bantu yayi yina kele na allo-allo na ngaanda kuna mutindu yina, kasi mu ke sala mbangu. Ya me lutila luvalu na mbongo ya beno. Mu banza ya kele, samu na munu, beno me mona. Mbongo ya beno ke beba. Yayi ve; Ya kele Ndinga. Beno me mona?

<sup>285</sup> “Kisika Mvumbi kele, kuna bangononi ke vukana.” Kisika Mvumbi, kisika kufwa kele, kuna bangononi ke vukana. Kisika Musuni ya malu-malu kele, Ndinga ya nsungi, kuna bambemba ke vukana.

<sup>286</sup> Kasi na manima yawu me pola, kuna bakoko-mbele ke vukana mingi. Yinga. Beno me mona yina mu zola tuba? Ntangu kufwa me salama, awa ke kwisa bangononi; kasi na manima yawu me lala kuna, mpe me bola, kuna awa ke kwiza bakoko-mbele. Ngononi kele na kima mosi ve ya kusala na yawu. Beno me mona?

<sup>287</sup> Yesu tubaka, “Kisika kele Mvumbi,” kisika Mani ke kubwa, na mpimpa Mani ya madidi ke kubwaka, “kuna bangononi ke vukana samu na Yawu.” Yina kele Mani samu na kilumbu. Beno me mona? Beno tala.

<sup>288</sup> Kasi na manima ti yawu me bola, misyete me kuma na yawu, kuna awa ke kwisa bakoko-mbele. Ba lenda ve kuwa nsunga ya yawu tii ya ke pola. Ya kele ngitukulu ve ti Yesu telamaka kuna mpe tubaka, “Jérusalem, nge yina losaka matadi na konso profete!” Beno tala kiyingilu kimuntu yayi, beno me mona, “Jérusalem, Jérusalem, bambala yikwa Mu. . .” Nani Yandi vwandaka? “Bambala yikwa mu me zola kuvukisa nge mutindu nsusu ke vukisaka bana ya yandi, nge yina losaka matadi na konso profete yina Mu fidisaka samu na nge,” dibuundu ya nene yayi, Jérusalem.

<sup>289</sup> Jérusalem yina kele awa na zulu ya ntoto ve, “kasi beto kele Jérusalem ya Zulu,” kisika Ndinga me katuka, na luzabu

ya mantwala, beno me mona. Ya kele ve Jérusalem ya ntama yina ke beba; Jérusalem ya Malu-malu yina ke beba ve. Ya kele ve Jérusalem ya ntama, yina muntu tungaka; kasi Jérusalem ya Mona yina Nzambi me tunga, beno me mona, Ndinga na zulu kuna ntangu yayi kele na kotalanaka. “Na yinzo ya Tata ya Munu ya kele na bisika mingi. Mu ke kwenda kubika yawu samu na beno,” Kiyidiki ke na kusala babala-bala ya wolo, mpe nyonso yankaka yina. Ya kele Yina yina ke beba ve.

<sup>290</sup> “Jérusalem, Jérusalem, bambala yikwa Mu me zola,” kubanda mbandukulu ya ntangu; Muntu ya tatu ve, muntu yankaka, kasi, “Mu zolaka tula nge na nsi ya mapapu mutindu nsusu ke fikaka bana ya yandi, kasi nge me zola yawu ve. Kasi ntangu yayi ngunga ya nge me kwiza.” Beno me mona?

“Kisika kele Mvumbi, bangononi ke vukana.” Kasi na manima mvumbi me bola, kuna bakoko-mbele ke vukana. Beno me mona?

<sup>291</sup> Beno tala. Moïse, yandi pesaka ata mbala mosi ve bana ya Nzambi. . . Moïse vwandaka ngononi, mpe yandi pesaka ata mbala mosi ve bana ya Nzambi yina bikanaka ya Noé. Beno me mona? Yandi vwandaka na Ndinga ya madidi ya Nzambi. “Mfumu Nzambi me bwabana na munu na ntoto ya kuyuma, mpe me singisa Ndinga ya Yandi, mpe me fidisa munu awa samu na kubokila beno na kubasika.” Na manima me kwiza bamekudi kuna, bawu me mekula yawu. Beno me mona? Kasi yandi vwandaka na Ndinga ya ngunga.

<sup>292</sup> Samu ti, Nzambi tubaka na Abraham, yandi yina kuzwaka nsilulu, “Nkuna ya nge ke zinga na yinsi ya nzenza, bankama yiya ya bamvula, kasi Mu ke kwenda tala bawu mpe ke basisa bawu na diboko ya ngolo.”

Moïse tubaka, “Ntangu yayi, Mfumu Nzambi ke zonza na munu mpe ke lakisa munu, mpe me tuba na munu yinki ya kusala, mpe mu ke tubila beno yawu.” Yandi tubaka, “MU KELE’ me tinda munu.”

<sup>293</sup> “MU KELE!” Ve “Mu vwandaka, to yina ke vwanda.” “MU KELE,” na ntangu yayi, Ndinga ya ntangu yayi. Ve Ndinga yina vwandaka, Ndinga yina ke kwiza; Ndinga yina kele ntangu yayi. Beno me mona? Beno me tala yawu? “MU KELE!” “MU KELE” kele Ndinga. “Na mbandukulu vwandaka Ndinga, mpe Ndinga vwandaka na Nzambi.” Ya kele kieleka? “MU KELE.” “Nzambi me tinda munu mutindu profete ya Yandi, samu na kusiamisa ti yayi kele kieleka. Mu kele mvutu ya Ndinga yayi, Yandi me tuba na munu na kwiza awa mpe kusala yayi.”

Mpe ntangu yandi salaka yawu, Pharaon tubaka, “Mbote, beto ke na mingi ya bana ya babakala na kati ya kimvuka ya beto yina lenda sala yawu, mpe,” bamekudi.

<sup>294</sup> Yesu tubaka, “Ntangu yayi, ya ke salama dyaka na bilumbu ya nsuka,” beno me mona, ke sosa kusala kima mutindu mosi.

Beno tala mbote nani kwisaka ntete. Beno tala mbote nani vwandaka na Ndinga. Yimeni. Ya kele mutindu yina yawu ke zabakanaka.

<sup>295</sup> Na yawu, beno me mona, beto me tala, Moïse pesaka bawu ata mbala mosi ve yina vwandaka ya ntangu ya Noé, “Beto ke tunga nzasa ntangu yayi, samu ti ya kele Ndinga, beno zaba. Noé tungaka nzasa kilumbu mosi.” Ve, bakoko-mbele vwanda kudya na yawu. Ve. Ve.

Yayi kele Ndinga ya nsilulu. Beno tala, samu ti nsangu ya yandi yandi kuzwaka yawu na Nzambi, yandi vwandaka na Ndinga ya Nzambi ya kieleka yina ba kubikaka ntete samu na ngunga yina.

<sup>296</sup> Mutindu mosi mpe Yesu sadilaka bawu ve yina bikanaka ya Moïse. Moïse vwandaka na Ndinga ya ngunga yina, kasi Moïse vwandaka profete. Awa kele Nzambi Yandi mosi, beno me mona, Yandi sadilaka bawu ata mbala mosi ve yina bikanaka ya Moïse—ya Moïse.

Kasi beno tala kaka na bakoko-mbele kuna na organisation yina, kudya yawu ya kulutila. “Beto zaba! Beto ke na Moïse! Beto ke na nsatu ya Nge ve.”

Yandi tubaka, “Kana beno zabaka Moïse, beno zolaka zaba Munu, samu ti Moïse zonzilaka samu na Munu.” Beno me mona?

<sup>297</sup> “Kisika Mvumbi kele, bangononi ke vukana.” Bangononi! Musuni ya malu-malu yina ba me kufwa na kati ya Ndinga, Ndinga yina me basika mpe yina me kuzwa mafuta, mpe yina me monisama mpe me pesama mutindu Madya samu na bana.

Ntangu yayi, mvumbi ya ntama yina me lala kuna bankama ya bamvula, kuna ya ke vwanda.

<sup>298</sup> Mutindu mosi ntangu yayi! Luther kuzwaka nsangu ya kubalula bantima; kasi, beno nkonga ya bakoko-mbele ya ba-Lutherien! Ba-Baptiste kuzwaka nsangu; kasi, beno nkonga ya bakoko-mbele ya ba-Baptiste! Beno me mona? Ba-Pentecotiste kuzwaka nsangu; mu ke na kubelamaka na kikuma ntangu yayi, ba-Pentecotiste ya bakoko-mbele!

“Kasi kisika kele Mvumbi, kuna bangononi ke vukana.”

Beno bambuka moyo, beno zolaka lenda ve kudisa muntu ya Luther, na bilumbu yina (beno lenda ntangu yayi), na niama ya kufwa ya kubola ya Catholique. Ve, tata. Yandi vwandaka na musuni ya malu-malu. Ya vwandaka nsungi ya dibuundu yina.

<sup>299</sup> Beno zolaka lenda ve kudisa Methodiste, na nsangu ya Luther. Oh, ve, yandi ke zola ve niama ya kufwa ya kupola yina. Ya kele ya kupola. Beno me mona, Luzingu basikaka yimeni na yawu mpe me kwenda kota na kima yankaka. Ya kele mwinga ya ntama yina kele ya kufwa, kuna. Luzingu ke na kulandila na kukwendaka na ntuala.

Mutindu mosi beno lenda ve kudisa Kento ya makwela ya Yesu Klisto na Pentecotisme. Ve, ata fyoti ve! Ba-organisation ya kufuluka na misyete; kima ya kusala kele ve! Ve, ve!

<sup>300</sup> Samu ti nsilulu kele, “Mpe ntete kilumbu yango ya nene mpe ya mpasi kukwisa, Mu ke tinda beno Élie profete. Yandi ke vutula bantima ya bana na Lukwikilu ya batata dyaka.” “Bansilulu nyonso yayi kutulamaka na kati ya Biblia, Mu ke sala yawu, mpe kuna bangononi ke vukana.” “Nyonso yina Tata me pesa Munu ke kwisa na Munu.” Beno me mona?

<sup>301</sup> Yesu mekaka yawu ata mbala mosi ve. Kasi ntangu Yesu kwisaka, Yandi talaka bawu ya kufuluka na bakoko-mbele, “Beto kele na Moïse mpe misiku.” Beno me mona? Mbote, yina vwandaka mbote na kudya na ntangu ya ntama kuna ntangu ba kufwaka yawu mpe ba pesaka bawu. Beno me mona, yina vwandaka mbote na ntangu yina.

<sup>302</sup> Kasi yayi kele yina ba zonzilaka na ntete na Moïse, na yandi mosi, yandi yina kufwaka munkayulu, ba tubaka, “Mfumu Nzambi ya nge ke telemisa na kati-kati ya nge, na kati ya bampangi ya nge mosi, Profete. Ya ke salama, ti muntu nyonso yina ke kangama ve na Profete yango mpe na yina Yandi ke tuba, ba ke katula yandi na kati-kati ya bantu.” Mpe ya salamaka.

<sup>303</sup> Beno tala mutindu keba ve bankama sambanu ya baprofesi ya mutindu yankaka kusalamaka ya kieleka kuna, ya Ngwisani ya Ntama, samu na Yesu Klisto. “Ba me tobula maboko ya Munu mpe makulu ya Munu.” Keba ve, mu me zimbana lutangu ya yina kusalamaka na kati ya bangunga sambwadi to nana ya nsuka ya luzingu ya Yandi, baprofete ya bawu nyonso tubaka, na mutindu ya kulunga.

<sup>304</sup> Kana mu bikula bubu ti kima mosi ke salama na kati ya mvula mosi, mu banza kuzwa—kuzwa na zulu ya nkama makumi zole ya bweso samu ti ya kusalama, ata ti ya kele kieleka to luvunu. Mpe kana mu zonzila yawu ntete ti ya ke salama, mpe kutuba ve na wapi ntangu, mu ke kaka na bweso fyoti na zulu ya nkama. Kana mu zonzila na ntete ntangu yawu ke kusalama, ya ke pesa munu ndandu ya fyoti. Kana mu zonzila na ntete kisika yina yawu ke kusalama, ya ke pesa munu dyaka ndandu ya fyoti. Kana mu zonzila na ntete . . . na nani ya ke kumina, kuna mu kele dyaka keba ve na nkama mosi ya mafunda ya ndandu kana ti ya kusalama, kana ya kele kieleka.

<sup>305</sup> Mpe konso Ndinga, alleluia, yina ba sonikaka samu na Mesiya yango, kusalamaka mpova na mpova. Mpe tii kilumbu mosi, na kutangaka Masonuku, Yandi kusikamaka na kati-kati ya flaze, mpe tubaka, “Mpeve ya Nzambi kele na zulu ya Munu samu na kulonga Nsangu ya mbote, mpe samu na kukuula . . .” Mpe kusikamaka kuna na kati-kati ya flaze, samu ti yankaka ya yina kele na Nkwizulu ya Yandi ya zole. Amen! “Mazulu mpe ntoto ke luta; Ndinga ya Munu ke luta ve.” Beno me mona?

306 Yandi vwandaka Ndinga na ntangu yina, yina vwandaka disa bawu na ntangu yina. Moise tubaka na bawu Kieleka; kasi, beno me mona, ba ke kumisaka yawu ntangu nyonso denomination, samu na bakoko-mbele na . . .

307 Ya kele na ndambu ya Yawu yina me bikana na manima bambemba me manisa na kudy a mpe me kwenda na yinzo. Kuna ba ke na kuingilaka na kumona kima yankaka. “Ndinga,” ba ke tuba, “awa mu banza Yawu ke kwisa. Mazono beto kudyaka caribou; mbasi beto ke kudy a dimeme.” Beno me mona yina mu zola kutuba? “Ya kele na mvumbi ya caribou ya ntama na yisi kuna, bawu ke sepela, kasi beto ke kudy a dimeme yina ke na kwiza bubu yayi. Wapi kisika ya kele?” Beno me mona yina mu zola kutuba? Madya ya Bawanzio! Bantu yina kudyaka mani kilumbu mosi, kana ba mekaka na kubumba yawu samu na kilumbu yina vwandaka landa, ya vwandaka fuluka na mikolobo. Beno ke mona ve bifwanusu nyonso, mutindu ya kele ya kulunga? Mutindu mosi ntangu yayi!

308 Beno tala, bakoko-mbele ya kilumbu Yesu vwandaka bingisa mpe mpeve ya yimbi; bapakulami yina vwandaka kudy a na mvumbi ya ntama. Ya kieleka? Ba vwandaka bingisa bampeve ya yimbi. Yesu tubaka yawu.

309 Mpe beno bambuka moyo, ba vwandaka na baprofete na bilumbu yango. Caïphe, nganga-Nzambi ya mbuta, pesaka profesu. Bantu yikwa zaba yawu? Caïphe kubikulaka. Beno tala kisika kele dititi ya yimbi na kati ya bilanga; ya ke kuzwaka maza na nzila ya kupakulama mosi. Samu na yinki Biblia ke tuba ti yandi kubikulaka? “Samu ti yandi vwandaka nganga-Nzambi ya mbuta ya mvula yina.” Niama ya mvindu yina ke kudyaka baniamu ya kufwa, dititi ya yimbi mpe yinti ya bansende, ya kuvwanda na kati-kati ya Blé; kasi Mpeve vwandaka na zulu ya yandi, Mpeve-Santu ya Nzambi ya kieleka. Mpeve-Santu ya Nzambi vwandaka na zulu ya yandi, samu na kulonga, na kupesa profesu, mpe na kuzonza na ntete yina zolaka salama; mpe ke manga mpe ke koma na kulunsi Ndinga ya kieleka ya ngunga yina ba me siamisa.

310 Oh, kyadi, mpangi-bakala! Bambala yikwa beto fwana tuba bima yayi, beno me mona, bambala yikwa na nzila ya Masonuku? Mu ke sala mbangu. Mu ke na kutala kele na ba-page kumi awa, ya Masonuku, samu na kumonikisa bima nyonso. “Mwini na zulu ya muntu ya mbote mpe na zulu ya muntu ya yimbi ve, kima mosi.”

311 Yesu tubaka, samu na kulakisa yayi. “Kana Mu ke basisaka bampeve ya yimbi na nzila ya musapi ya Nzambi, na nzila ya nani bana ya beno ke basisaka bawu?” Awa, ba vwanda basisaka bampeve ya yimbi. Ba vwandaka pesa profesu. Ya kieleka? Kasi ba zabaka Yandi ve na kuvwandaka Ndinga ya ngunga, (samu na yinki?) samu ti Yandi vwandaka kimvuka mosi ve na bawu.

<sup>312</sup> Ntangu yayi beno baka Matthieu 24:24, “Baklisto ya luvunu,” bapakulami, “ke telama, mpe ya ke vwanda na baprofete ya luvunu yina ke bikula yawu,” beno me mona, “mpe ke vuna bantu ya kieleka ya Kusolama kana ya lendaka salama.” Beno me kuzwa yawu ntangu yayi?

<sup>313</sup> Beno tala bana. “Na nzila ya nani bana . . . Kana Mu ke bingisaka bampeve ya yimbi na nzila ya Ndinga ya Nzambi,” na yina, Yandi vwandaka Ndinga ya Nzambi, “na nzila ya nani bana ya beno ya ba denomination ke basisa bawu?” Ntangu yayi, mpe Nzambi kaka lenda basisa mpeve ya yimbi, beto zaba yawu, Nzambi kaka. Samu ti, muntu ya ngolo fwana kulutila ngolo na muntu yina ke na kati ya yinzo ya yandi. Ba ke na ngolo ya kusala yawu.

<sup>314</sup> Beno zaba, kuna na Apocalypse, ya me tuba yandi . . . mbeni ya Klisto yina telamaka na bilumbu ya nsuka, “Salaka bidimbu mpe mambu ya ngitukulu, yina vunaka mpe bayina vwandaka zinga na zulu ya ntoto, mpe vunaka bawu nyonso, Baklisto mpe nyonso, bayina bankumbu vwandaka ya kusonama ve na kati ya Buku ya Luzingu ya Mwana ya dimeme,” mvutu ya Matthieu 24:24, “bayina bankumbu vwandaka ya kusonama ve na kati ya Buku ya Luzingu ya Mwana-dimeme katuka mbandukulu ya yinza.”

<sup>315</sup> Luzingu yango yina vwandaka na kati ya musisa ya—ya yinti ya dilala ya kieleka, yina me luta na nzila ya yinti ya bambuma nyonso yina mpe nyonso yankaka, mpe me landa na kumata samu na kutula mbuma na zulu ya yinti, na zulu ya kunamika ba denomination nyonso mpe mavala. Beno me tala yawu? Mu ke sala mbangu. Muntu ya ngolo . . .

Beno bambuka moyo na David ntangu yayi, yandi vwandaka muntu ya kusungama, muntu ya kieleka, yina vwanda meka na kusala kisalu samu na Nzambi, mpe yina ba tulaka ve samu na kusala yawu.

<sup>316</sup> “Bawu,” bapakulami; kasi Yesu tubaka, “Ba ke na kulongaka tendulu ya Malongi (ya Masonuku) ya muntu,” beno me mona, Ndinga ya Nzambi, Ndinga ya Yandi yina ba me siamisa ve; ke na kulongaka Klisto ya ntama, beno me mona, kima yina vwandaka.

Mpe Biblia ke tuba, “Yandi kele.” “MU KELE,” ve “Mu vwandaka to ke vwanda.” “MU KELE, ntangu yayi.” Yandi kele Ndinga yango yina ke na kuzinga na nzila awa.

Yandi vwandaka, na mbandukulu, Yandi vwandaka na—Yandi vwandaka na kati binamina; Yandi vwandaka na kati ya felele ya blé; Yandi vwandaka na kati ya mpusu; kasi ntangu yayi Yandi kele na kati ya Mbuma.

<sup>317</sup> Ntangu yayi, beno ke vtuka mpe ke meka na kuzinga dyaka? Yinki kana Luzingu yango kuvutuka na nsi, beno banza ti (yina me bikana) Luzingu ke zonga dyaka, ke vtuka na manima ti mpusu ya ntama me kawuka, ti kuvutuka mpe kuzinga dyaka

na kati ya yawu? Ya ke salaka yawu ata mbala mosi ve. “Samu ti ya lendaka salama ve ti bayina vwandaka mbala mosi na yisi ya nsemo,” mpe me kwenda na ntwala ve na Ndinga na mutindu Yawu ke na kusalamaka, “ba kele ya kufwa, me suka; mpe matiti ya bansende mpe bayinti ya bansende yina me belama samu ba losa, nsuka ya yawu kele ya kutula na tiya.” Ya kieleka?

Ntangu yayi mu ke na kusalaka mbangu na mutindu nyonso mu lenda sala.

<sup>318</sup> Beno tala Masonuku ntangu yayi. Bawu ke longa Nzambi ya masolo, beno me mona, kaka mutindu ba vwanda meka na kuzinga na ntangu ya ntama, mutindu, “Mbote, Wesley tubaka yayi na yina.” To, “Yayi na yina tubaka yayi na yina.” Beno ke na kumangaka Ndinga ya nsilulu ya kilumbu, Mana ya kilumbu yina me zabakana pwelele. Ba ke na kumeka na kutula na kati ya bambungu ya beto ya malu-malu bavinu ya bawu ya ntama ya Luther, Baptiste, Pentecote. Ya ke simba ve. Mpe Vinu ya beto ya mona, na kati ya bambungu ya bawu ya ntama, ya ke simba ve. Kana ba meka na kutula Vinu yayi ya mona na kati ya denomination, bulawu ya bawu ke talana. Ba lenda ve kusala yawu. Ya ke pasula yawu.

“Ntangu yayi, mpangi ya bakala, mu me mona Ndinga ya Nzambi, ya kulunga na nzila ya Ndinga!”

<sup>319</sup> “Ntangu yayi, tala awa, mulongisi, kana . . . Beto—beto lenda ve kubaka Yina.” Ned, mu banza ti nge kuzwaka kimbangi kilumbu yankaka yina. “Beto, beto lenda kaka ve kubaka Yina awa ntangu yayi. Mu—mu ke zola na kisika ti mu banza ti nge kwenda kaka na ntwala.” Beno zaba. Beno me mona, ya ke simba ve. Ya ke pasuka.

<sup>320</sup> “Ba ke tulaka ve kitini ya lele ya mona na kilele ya ntama, samu ti kupasuka ke vwanda na nyonso.” Beno me mona? Yesu tubaka yawu ve? Beno lenda ve kutula Vinu ya mona na kati ya bambungu ya ntama. Ya ke pasula yawu. Vinu ya mona kele na kati ya yawu Luzingu. Mbote.

<sup>321</sup> Beno tala awa kima mosi, na nswalu-nswalu ntangu yayi, na yina beto ke na kumanisa . . . disolo ya beto. Beno tala Apocalypse 16:13 na 14, kana beno zola kusunika yawu. Mu banza ti mu ke kuzwa ntangu ve samu na kukota na yawu. Mu zola beno kuvwanda kieleka mpe kumona yawu. Ntangu yayi beno tala, yayi kele muningu na kati-kati ya Mbungu ya Sambanu mpe ya Sambwadi.

Ntangu yayi beto kele . . . beto ke manisa na mwa minuti, kana beno lenda vingila mwa baminuti fyoti dyaka. Beto ke na kumanisa ntangu yayi.

<sup>322</sup> Beno tala Apocalypse 16:13 na 14, na kati-kati ya Mbungu ya Sambanu mpe ya Sambwadi, “Bampeve tatu ya yimbi mutindu bisyoto” (beno me mona yawu?) “ya basikaka na yinwa ya muntu.” Ntangu yayi beno tala, na nswalu. Beno me yilama?

Beno tuba, “Amen.” [Dibuundu me tuba, “Amen.”—Mu.] Butatu ya bampeve!

<sup>323</sup> Ntangu yayi mpangi-bakala ya denomination, vwanda swi minuti fyoti. Beno telama ve mpe beno basika na kisika ve, beno kuna na ladio, beno bayina ke na kulanda na alo-alo. Beno kufwa ba-magnetophone ya beno ve. Beno vwanda swi mwa minuti fyoti, mpe beno kuwa. Kana beno me butuka na Nzambi, beno ke kuwa.

<sup>324</sup> Butatu ya bisyoto! Kisyoto kele kibulu mosi yina ke talaka konso ntangu na manima. Yandi ke talaka ata mbala mosi ve kisika yina yandi ke na kukwendaka; yandi ke talaka kisika yina yandi me katuka. Beno me mona? Beno ke na kumona ve? Wapi kisika malongi ya butatu kubutukaka? Beno bambuka moyo, “bampeve tatu ya yimbi,” bampeve ya kukabwana. Beno me tala yawu? [Dibuundu me tuba, “Amen.”—Mu.]

<sup>325</sup> Beno tala, ba ke tala na manima na Lukutakanu ya Nice kisika malongi ya butatu kubutukaka, na kati ya Biblia ve. Ya kele na kima ya mutindu yina ve. Ba ke tala na manima na Lukutakanu ya Nice na Nice, na Rome, kisika butatu kubutamaka.

<sup>326</sup> Beno tala kisika ya me katuka. Beno tala. Mpe butatu ya bakiula me basika na butatu ya ntama, ya me buta butatu ya malu-malu, mama ya bawu. Samu na yinki ya me basika? Butatu, “dragon,” beno me mona, “kibulu,” mpe “profete ya luvunu.” Butatu, ya mona. Na yina na wapi ntangu bakiula yango kubasikaka? Na wapi ntangu? Beno tala, ba vwandaka kuna ntangu nyonso, kasi ya vwandaka talana ve tii kati-kati ya Mbungu ya Sambanu mpe ya Sambwadi, kaka ntete Bidimbu kuzibuka (Hmm?) samu na kumonikisa yawu.

<sup>327</sup> “Samu ti na Nsangu ya wanzio ya sambwadi, mansweki ya Nzambi ke zabana,” bima nyonso ya butatu yayi, mpe bambotika ya luvunu, mpe nyonso zolaka monisama. Nzambi sadisa beto na kumona yina kele Kieleka! Mpe beno banza ve ti ya kele muntu yina ke na kumeka na kutuba kima ya . . .

<sup>328</sup> Mu ke na kutala na nzutu mpeve yango kuzola Yawu ve, beno me mona. Mu ke na kuzonzila na munu ve, mpangi-bakala. Mu ke na kuzonzila na Wanzio ya Mfumu yina kele na kati ya camp. Ya kieleka.

<sup>329</sup> Beno tala, butatu! “Dalango,” bantu yikwa zaba yina dalango vwandaka? Ya vwandaka Rome. “Mpe dalango kutelamaka na ntwala ya kento samu na kudya mwana ya kento yina ntangu mwana ke butuka.” Ya kieleka? Yinki zola kutuba “niama” na kati ya Biblia? Ngolo. Mbote. “Profete ya luvunu, profete mosi ya luvunu,” mupakulami, ya luvunu. Beno me mona?

<sup>330</sup> Ya bandaka wapi kisika? Yayi kele “profete ya luvunu,” mosi. “Profete ya luvunu,” pape ya ntete; mpe katuka kuna me basika



“kento ya ndumba, mpe mama ya bakento ya kindumba,” kima nyonso.

<sup>331</sup> Butatu ya luvunu vwandaka telama; na bilumbu ya ntete ve, ya zolaka talana ve na bilumbu ya ntete, ya landaka na kukwenda kaka na ntwala na yawu. Kasi ntangu Bidimbu Sambwadi ke kwisa, mpe ke fungula mansweki yango mpe ke monikisa yawu, yina kele ntangu “bisoyoto, bampeve tatu ya yimbi mutindu bisoyoto, ke basika samu na kutalana bawu mosi,” malongi ya butatu samu na kutelemina Kieleka. Beno me mona? Huh!

Beno me mona kisika ya katukaka? Beno me mona kisika yina ya ke na kuvutukaka? Lukutakanu ya Mabuundu. Ba kele bawu nyonso bampangi ya babakala, na mutindu nyonso; bampeve mutindu mosi, kima mutindu mosi.

<sup>332</sup> Mpe beno tala mbote. Na luvunu mingi, na kusalaka bimangu! Mpe yayi kele bampeve ya yimbi yina ke kwendaka na banzambi nyonso ya ntoto, na kusalaka bimangu, samu na kuvuna bawu na kilumbu ya nsuka, mpe ke nunga na kusalaka yawu. Yinki Nzambi tubaka na yina me tala mpeve ya yimbi yina?

Yandi tubaka, “Mu ke kulumuka mpe ke kota na yinwa ya baprofete yango mpe ke sala ti bawu kupesa profesu ya luvunu, samu na kusala ti Achab kubasika kuna samu ba kufwa yandi.”

<sup>333</sup> Nzambi tubaka, “Kwenda. Nge ke nunga. Nge ke nata bawu na kukwikila na yawu. Ba kele na Ndinga yango ve, na kubanda.” Beno me mona? “Kwenda, samu nge ndimisa yandi. Nge ke vwanda yandi yina ke sala yawu, ntangu nge ke kota na kati ya baprofete yango ya luvunu, samu ti yandi ke talaka kaka na bawu. Mpe yandi zaba ata kima mosi ve na yina me tala Ndinga, mpe yandi zola kumeka ve na kulongoka Yawu. Yandi lenda kusala yawu ve, samu ti yandi kele yinti ya bansende, na kubanda.” Beno me mona? Beno me mona? “Nge ke nunga.”

Beno tala awa na bisoyoto ya luvunu yayi, yina ke na kutala na manima, “Mbote, beno zaba yina ba tubaka kuna na Nice?”

<sup>334</sup> Mu ke kipe ve yina ba tubaka samu na yawu, kuna na Nice. Mu ke na kutuba yina ba tubaka na zulu awa na Kiti ya kimfumu ya Nzambi; yina ke vwanda, yina vwandaka ve; yina ke vwanda, samu ti Yandi kele “MU KELE.” Beno me mona?

“Luvunu.” Beno tala yawu. Huh! Beno tala kisika ya me katuka.

<sup>335</sup> Ntangu yayi (Beni kuwa mbote-mbote.) beto ke mona pwelele, na manima Bidimbu Sambwadi me zibuka. Ya kele samu na kumonikisa mansweki yango: Yinki kele butatu yango? Beno me mona? Wapi kisika ntete ba bokilaka yawu butatu? Beno me mona? Wapi kisika na kati ya Biblia ti Yawu me zonzila mpova yayi butatu? Wapi mutindu beto lenda vwanda na

Banzambi tatu, ti beto kukembila Banzambi tatu mpe kuvwanda ve mimpani?

<sup>336</sup> Wapi mutindu ba lendaka vwanda ya kukabuka, na yina Yandi tubaka, “Munu na Tata ya Munu kele muntu Mosi?” “Kana ti beno kukwikila ti Mu kele Yandi, beno ke kufwa na disumu ya beno, beno me mona, na ntembe ya beno.” Disumu kele kukondwa lukwikilu. “Beno ke kufwa na kukondwa lukwikilu ya beno.”

Oh, nani beno ke tuba ti Mu kele, wapi kisika  
beno ke tuba ti Mu me katuka,  
Oh, beno zaba Tata ya Munu, to beno lenda  
tuba Nkumbu ya Yandi?  
MU KELE Rose ya Saron, Mbwetete yina ke  
Ngengaka na Suka.

Beno lenda tuba na munu Nani Yandi kele?

MU KELE yina zonzaka na Moïse na mulaka  
ya Tiya,  
MU KELE Nzambi ya Abraham, Mbwetete  
yina ke Ngengaka ya Suka.  
MU KELE Rose ya Saron, oh, wapi kisika beno  
ke tuba ti Mu me katuka;  
Oh, beno zaba Tata ya Munu, to beno lenda  
tuba Nkumbu ya Yandi? (Amen!)  
MU KELE Alfa, Omega, Mbandukulu mpe  
Nsuka;  
MU KELE kivangu nyonso, mpe Yesu kele  
Nkumbu ya Yandi.

Ya kele kieleka. Butatu ve! Ve, tata. Ya kele kima ya luvunu.

<sup>337</sup> Bidimbu Sambwadi, ke na kuzibulaka mansweki yango yina “fwana kusalama,” ke pesa kimbangi. Kidimbu ya kufunguka; ke lakisa, ke pesa kimbangi, ke kumisa pwelele Bakieleka yina vwandaka ya kubumbama yina Bidimbu kubumbaka bamvula nyonso yayi, na nzila ya mabuundu nyonso yango mpe denomination.

“Kento ya nene ya ndumba,” ya Apocalypse kumi na samb- . . . Yandi vwandaka nani? Kasi yandi kele “MAMA YA BAKENTO YA KINDUMBA,” mpe. Beno me mona?

“Ntangu yayi, nge ke bokila bawu ‘bakoko-mbele,’” beno ke tuba, “Mpangi Branham.” Ya ke kieleka.

<sup>338</sup> Kasi, beno bambuka moyo, koko-mbele kele ndeke. Yandi kele mpe, ya kupakulama samu na kupumbuka. “Bampeve nyonso zole, ke vwanda ya kubelama mingi samu na kuvuna bantu ya Kusolama. . .” Koko-mbele kele mutindu mosi na ngononi. Yandi lenda pumbuka mutindu ngononi yango; mpe kele ya kupakulama samu na kupumbuka, to samu na kulonga, to samu na kupesa profesi, beno tala, mutindu mosi ngononi.

Kasi yandi lenda ve kulanda ngononi na zulu mingi. Ve, ve. Kana yandi meka na kulanda ngononi, bulawu ya yandi ke monisama. Yinga, tata. Yandi lenda ve kulanda ngononi.

<sup>339</sup> Oh, yandi lenda tuba, “Mu ke kwikila na Yesu Klisto Mwana ya Nzambi. Mu ke kwikila na Nzambi Tata, Tata ya ngolo nyonso, Kiyidi ya mazulu mpe ntoto; Yesu Klisto Mwana ya Yandi,” mpe nyonso yankaka yina. Oh, kieleka, ba lenda sala yawu. Kasi wapi dyambu na yina me tala Yandi na kuvwanda mutindu mosi mazono, bubu yayi, mpe kukonda nsuka? Beno me mona?

<sup>340</sup> Ngononi kele ndeke mosi yina ba salaka mutindu yankaka. Ya kele na kima ve mutindu yandi, na zulu ya ntoto. Beno me mona? Yandi—yandi . . . Kana koko-mbele kumeka na kulanda yandi, to ndeke nyonso yankaka, yandi ke pasuka na bitini-bitini. Bulawu ya yandi ke talana, ya kieleka. Yandi ke pasuka ntangu yandi ke meka na kutula Vinu ya mona na kati ya mbwata ya ntama. Beno me mona, yandi ke pasuka. Yandi ke pasuka na bitini-bitini. Ba salaka yandi ve, yandi ve . . . Ba salaka yandi ve na ntungulu yina ke simba yandi kuna na zulu. Ntangu yandi ke kota na bisika ya nene ya zulu kuna, kana ba salaka yandi ve, ba tumisaka yandi ve, ba soolaka yandi ntete ve, butukaka ngononi ve, yandi ke zengana bitini-bitini. Beno me mona? Masala ke katuka na mapapu ya yandi, mpe yandi ke kubwa na ntoto. Kieleka. Yandi lenda ve kulanda ngononi, na zulu mingi. Kana yandi kumeka, bulawu ya yandi ke talana. Ya kele kieleka. Beno lenda ve.

<sup>341</sup> Samu na yinki? Yandi lenda ve kumona mutindu ngononi. Wapi mbote ya ke sala na kumeka na kudumuka na zulu mingi, mpe kulenda kumona ve kisika nge kele ntangu nge kele na zulu kuna? Mpe kana yandi zola kumeka, kana kaka kumeka na kulanda ngononi yayi, na mazulu mingi, yandi ke kuma mpofu ya kulutilla ti yandi ke zaba ve samu na yinki yandi kele na nsayi. Ya kieleka. Yandi ke boka mpe ke zonza na ngolo, mpe ke landila mutindu yina; kasi zonzila yandi kaka Ndinga, bakala, kuna bulawu ya yandi ke zabana.

<sup>342</sup> Zonza na yandi na yina me tala mbotika na Nkumbu ya Yesu Klisto, to, Yandi kele mutindu mosi mazono, bubu yayi, mpe kukonda nsuka, nyonso—nyonso mutindu yina, mpe tuba na yandi. “Mbote, oh, ntangu yayi vingila kaka fyoti!” Beno me mona? Oh, inga, kuna masala ya yandi ke na kubwa. Beno me mona, yandi ke dumuka mutindu nyonso, mpe ke pesa profesi, mpe ke basisa bampeve ya yimbi, mpe ke zonza na bandinga ya malu-malu, mpe ke boka, mpe ke landila mutindu yina, ke kima bisika nyonso na ntoto. Kasi kumeka na kulanda na zulu Kuna ve; samu na yinki, kieleka yandi ke zabana.

<sup>343</sup> Na kutala, ba tumisaka yandi. Yandi kele ya kupakulama. Yandi lenda pumbuka. Yandi lenda kangama kisika mosi yandi mosi, kumata kuna, kasi ve . . . kaka ntama ve. Beno me mona,

yandi lenda kudya kibulu ya kufwa ya kubola, kasi yandi lenda ve kudya Musuni ya madidi yina me katuka na Kiti ya kimfumu.

<sup>344</sup> Yandi kele mpofo. Yandi kele nyonso na nsayi, kasi yandi zaba ve samu na yinki yandi kele na nsayi. Benome mona, Mpeve mosi yina kubwaka na zulu ya yandi, mutindu mvula, samu na kukumisa yandi blé; na kubanda yandi kele ve blé. Yandi ke pasuka. “Oh, mu lenda baka ve. . . Oh, ve, tata! Mu zaba Docteur Jones tubaka. . .” Mbote, kwenda na ntwala. Benome mona? Kwenda na ntwala, kana nge zola.

<sup>345</sup> Ve, beno tala, ba butaka yandi ve, to ba tungaka yandi ve, to ba kubikaka yandi ntete ve, samu na kuvwanda mutindu ya ndeke yina. Yandi lenda. . . Yandi kele. . . lenda vwanda dilala ya ngayi yina ke na kuyelaka na zulu ya yinti ya malala, kasi yandi me katuka ata mbala mosi ve na nsimbulu. Yandi kele kima yina ba me yika. Mpe ntangu ba ke kumaka mingi na zulu na ba denomination ya bawu ti ba lenda mona ve Ndinga ya Nzambi ya kusiamisa yina ba soolaka ntete, kuna bulawu ya bawu ke zabana. “Oh, kima yina, Halo na zulu ya yintu, mpe nyonso, oh, Ya zola tuba kima ve.” Benome mona? Ya me zabana.

<sup>346</sup> Ba salaka yandi ve samu na kumona ntama mingi. Yandi lenda kumona ntama kaka mutindu maneti ya ba denomination ya yandi lenda lakisa yandi. Kasi, na manima ya yawu, yandi kele mpofo mutindu ngembo. Ya kele kuna bulawu ya yandi ke zabana. Benome mona? Ya kele kisika ngononi ya kieleka ke vwandaka na kudya. Yinga, tata. Ya kele kisika bangononi ya kieleka, ya kusolama ke mona yinki yandi kele. Ntangu yandi ke lenda ve na kubaka Ndinga yango, mbala mosi ba ke zaba ti yandi kele koko-mbele ya ba denomination.

<sup>347</sup> Samu na yinki, samu na yinki yandi lenda ve kupumbuka? Samu, beno tala yina yandi vwanda kudya. Yandi vwanda kudya niama ya kufwa ya kupola ya ba denomination. Yina ke—yina ke sala nkadulu ya kimpeve ve na nzutu ya yandi, ke tula yandi ve na mavimpi ya kimpeve, na kuzonza ya mutindu yankaka, samu na kunata yandi na zulu ya baluswaswanu ya ba denomination. Benome mona? Benome mona, yandi ke kudya kaka kima ya kupola; nzutu ya yandi kele ya kusala na yawu. Yandi lenda ve kumata kuna kisika Musuni ya malu-malu yango ke nataka ngononi yina. Yandi lenda kaka kusala yawu ve. Benome mona?

<sup>348</sup> Yina ke lungisa Matthieu 24:24. Yandi ke pumbuka, ke dumuka na zulu, ke bula mapapu ya yandi, kasi yandi lenda kaka ve kumata mingi na zulu. Benome mona? Ya kele kieleka. Benome mona, yandi lenda ve kukwenda, yandi lenda ve kumata mingi na zulu samu na kuzwa Mana ya malu-malu. Yandi lenda kudya mani ya ntama yina kele awa na yisi ya ntoto, bakalumbu ya ntama ya kufwa yina ba dyataka ya me luta sabala mosi, mpe yina me luta ngonda mosi, to yina me luta bamvula makumi yiya, me beba. Yandi lenda kudya yina, mpe kudya yawu mingi, mpe

ke sala makelele mpe ke boka, mpe ke landila mutindu yina, ke dumuka mpe ke pumbuka mutindu ngononi yankaka. Yandi kele ya kupakulama, mutindu ndeke yankaka.

<sup>349</sup> Mpe koko-mbele kele, yandi kele mutindu mosi ya mbemba. Beto zaba yawu. Kieleka yawu yina yandi kele, kasi yandi lenda ve kulanda ngononi yina ya kieleka. Beno me mona? Yandi lenda kaka kusala yawu. Ve, tata. Ba salaka ve nzutu ya yandi; yandi vwanda kudya baniamama ya kufwa ya kupola ya mitindu na mitindu, beno me mona, mpe ya lenda vwanda ve. . . ya lenda ve—ya lenda ve kuvwanda Musuni ya malu-malu, Mana ya malu-malu. Ya vwandaka kima yina Luther tubaka, Wesley tubaka, to Mulongisi *Kingandi* tubaka. Ya ke vwanda ve yina Yesu tubaka samu na ngunga yayi.

<sup>350</sup> Beto kwenda ntangu yayi, na kumanisa. Bapakulami, “Baklisto,” na bilumbu ya nsuka, kasi “milongisi mpe profete ya luvunu.” Beno tala mutindu ya kele pwelele! Ntangu yayi, mu zola beno kufwanikisa yayi; beto ke na ntangu ve ya kutanga yawu, Matthieu 24:24 na ya Zole ya Timothée 3:8.

<sup>351</sup> Matthieu 24:24 ke tuba, na bilumbu ya nsuka, beno me mona, “Baklisto ya luvunu ke kwiza,” bapakulami, ya luvunu, “baprofete ya luvunu, mpe ke sala bidimbu mpe mambu ya ngitukulu,” kieleka mutindu Yandi yina ya kieleka, Yandi yina ya kieleka, “mpe ke—mpe ke na kutala ke vuna bantu ya kieleka ya Kusolama.” Ntangu yayi beno tala, ya vwandaka Yesu vwandaka zonga.

<sup>352</sup> Awa me kwiza Paul, kaka na manima ya Yandi, mpe tubaka, “Ntangu yayi, na bilumbu ya nsuka, misambidi ke kwisa, beno me mona, ke lakisa mutindu ya kinzambi. Mpe ke kuzwa na mitambu bakento ya bubolo, yina kele na mitindu ya bansatu ya yinza.”

na yina ba ke kukiyufula, ke tuba, “Samu na yinki nge ke zonzaka na ngolo na bakento?” Oh, samu na bumbote. . . Ba ke mona kaka Yawu ve.

“Ke kuzwa na mitambu bakento ya bubolo, yina kele na mitindu na mitindu ya bansatu,” ntama na bima mutindu. . . ya. . . Beno me mona, “Mpe mutindu Jannès na Jambres. . .”

Matthieu 24:24, “Baklisto ya luvunu,” bapakulami, ya luvunu, yina ke na kusala bidimbu mpe mambu ya ngitukulu samu na kuvuna bantu ya Kusolama.

“Ntangu yayi mutindu Jannès na Jambres kuteleminaka Moïse, mutindu mosi ke sala bantu yayi ya kukondwa bumuntu; ya dibanza ya kufundisa landila Lukwikilu.” Lukwikilu “mosi” ve. “Lukwikilu!”

<sup>353</sup> “Lukwikilu mosi, Mfumu mosi, mboti-. . .” Beno lenda kuzwa ve “Lukwikilu mosi” kukondwa kukwikila na “Mfumu mosi.” Beno lenda ve kuzwa bambotokolo nyonso zole; mosi ve

samu na Tata, mpe Mwana, Mpeve-Santu. “Mbotika mosi,” Yesu Klisto. Ya kieleka. Beno me mona, mbotika ya luvunu!

<sup>354</sup> Beno tala, beno fwanikisa yawu kintwadi kuna ntangu beno ke kuma na yinzo. Beno tala Matthieu 24:24, Yesu vwandaka tuba; Paul, na ya Zole ya Timothée 3:8; mingi dyaka. Mpe ntangu yayi beno fwanikisa yawu.

Mpe na manima beno tula Masonuku yankaka, Luc 17:30, Malachie 4.

“Mutindu Jannès na Jambrière kuteleminaka Moïse,” Ndinga ya kupakulama ya ngunga, “mutindu mosi ke sala bantu yayi,” muntu ve, “bantu,” bapakulami, “ke telemina Kieleka.”

<sup>355</sup> “Na kilumbu yina kaka Mwana ya muntu ke monana.” Apocalypse 10:1 na 7, beno tanga yawu ntangu beno ke kuma na yinzo, “Nsangu ya wanzio ya sambwadi, ke na kuzibulaka Bidimbu.” Yinki ya kele? Ya kele ve ti wanzio kele Mwana ya muntu; kasi munati-nsangu ke na kumonikisa Mwana ya muntu. Beno lenda mona luswaswanu ntangu yayi? Ya kele kisika yina ya ke monanaka mpasi mingi samu na beno, beno me mona. Ya kele ve Mwana ya muntu, Yandi mosi; kasi wanzio ya sambwadi, munati-nsangu ya sambwadi, ke na kumonikisa na bantu Mwana ya muntu, samu ti Yawu me bika mpusu. Yandi lenda ve kusala na Yawu organisation. Yawu kele Mbuma, Yawu mosi, dyaka.

<sup>356</sup> “Mpe na kilumbu yina, Jannès na Jambrière ke telemina,” bapakulami (mikwikidi ya kati-kati mpe mimpani, dibuundu ya mambu ya nganda mpe ya Pentecote) ke telemina Mbuma ya kieleka, “kasi beno bika bawu; bulawu ya bawu ke monana, mutindu vwandaka ya bawu.” Beno me mona? Beno me bakula ntangu yayi? [Dibuundu me tuba, “Amen.”—Mu.]

<sup>357</sup> Apocalypse 10, ke tuba, “Na bilumbu ya ndinga ya wanzio ya sambwadi.” Ntangu yayi beno bambuka moyo, ya sambwadi, Nsungi ya Dibuundu ya Laodicée. “Ndinga ya wanzio yango,” ntangu nsungi ya dibuundu yango me kota desia na denomination mpe me kuma nsungi ya dibuundu, ntangu yawu ke manisa na kati ya organisation ya yawu ya Pentecote; ntangu munati-nsangu na yina. . .

<sup>358</sup> Yinki vwandaka konso munati-nsangu? Yinki vwandaka Martin Luther? Kusemba samu na Catholique. Yinki vwandaka Wesley? Kusemba samu na bantu ya Luther. Yinki vwandaka Pentecote? Kusemba samu na bayankaka. Wapi kisika Luzingu me kwenda ntangu yayi? Ntama na organisation. Mpusu dyaka ve; ya kele Mbuma. Yinki ya kele? Kusemba samu na Pentecote, beno me mona, samu na kulungisa Masonuku ya ngunga yayi. Beno me mona?

<sup>359</sup> Beno tala, kilumbu kaka ntangu muzabisi yayi. . . Ve ntangu yandi ke banda, kasi ntangu yandi ke banda na kupesa Nsangu ya yandi. Beno me mona? Kubenda ya Ntete, kubeluka ya nzutu;

Kubenda ya Zole, kupesa profesi; Kubenda ya Tatu, kuzibuka ya Ndinga, mansweki me monisama. Ya kele dyaka ve na kisalu yina me lutila na kumonikisa Ndinga, kuluta bapofete, ya kele ve. Kasi nzila kaka yina ba lendaka siamisa profete ya kele na nzila ya Ndinga. Mpe, beno bambuka moyo, Kubenda ya Tatu vwandaka kuzibuka ya Bidimbu Sambwadi yango, samu na kumonikisa Kieleka ya kubumbama yina vwandaka ya kukangama na kati ya Ndinga. Beno me mona yawu? [Dibuundu me tuba, "Amen."—Mu.]

<sup>360</sup> Ya kele kuna, na kilumbu yango ntangu dyambu yayi ke salama, ti Jannès na Jambrès, bamekudi, ke monana dyaka. Kaka mutindu ba salaka ntangu Moïse kutalanaka na Ndinga ya ntete, samu na kutuba Yawu, ba basikaka samu na kulanda Yawu. Nyonso kele kaka kieleka. Ntangu yayi beno me mona yinki kele Matthieu 24:24? Beno me mona, bapukulami!

<sup>361</sup> Ntangu yayi ya kele na bima tatu beto ke tuba ntete beto manisa. Yawu yayi. Mu zola beno kuwa mbote-mbote ntangu yayi na yina beto ke na kumanisa. Bima tatu, beno bambuka moyo, bima tatu me lungisama. Bima tatu me natama na ntwala ya beno na ntangu yayi.

<sup>362</sup> Ya ntete. Yinza kele na kati ya mutindu ya Sodome. Yesu tubaka ti ya ke salama. Beno tala kubeba; bakento ya beto zola kusala mutindu babakala; babakala ya beto zola kusala mutindu bakento, bakala-kento; ya kupola, ya kubeba, ya kuvwenza, ya kuyala na bampeve ya yimbi, mpe zaba yawu ve. Biblia ke tuba ti ya ke salama, mpe ya kele kisika yina yawu kele.

Ya zole. Ya kele na kati ya ngunga yango, landila Masonuku awa, ti Jannès na Jambrès ke talana. Ya zole.

Ya tatu. Ya kele na kati ya ngunga mosi yango ti Mwana ya muntu ke monana.

<sup>363</sup> Yawu yina mukwikidi ya beno, mukwikidi ya beno ya kati-kati, mpe mumpani ya beno. Ya kele na Ndinga ya kieleka yina ke na kuswasikisa, yina ba me siamisa; ya kele na mukwikidi ya kati-kati yina ke na kumeka Yawu; mpe ya kele na muntu ya ntembe yina ke na kumangaka kima nyonso.

Kasi ya ke vwanda na Nsemo na ntangu ya  
nkokila,  
Kieleka nge ke mona nzila na Nkembo; (Ya  
kieleka?)

Bayinsi ke na kukabwana, Israël ke na  
kuvumbuka,  
Bidimbu yina Biblia tubaka;  
Bilumbu ya Bantu ya makanda ke na  
kutangama (Sodome), ba me fuluka na  
boma;  
"Benovutuka, O beno bayina mwanganaka, na  
ya beno."

Kilumbu ya mpulusu me belama,  
 Bantima ya bantu ke na kubwa, na boma yayi;  
 Beno vwanda ya kufuluka na Mpeve ya  
 Nzambi, minda ya beno ya kukubika mpe ke  
 ngenga, (Samu beno lenda kumona Ndinga  
 ya ngunga.)  
 Beno tala na zulu! Mpulusu ya beno me  
 belama.

Baprofete ya luvunu ke na kuvunaka, (Ba me  
 tuba ti ba ke vwanda awa; bapakulami.), Ba  
 ke manga Kieleka ya Nzambi,  
 Ti Yesu Klisto kele Nzambi ya beto;

Yina, ba ke kwikila Yawu ve. Biblia ke tuba ti ya ke vwanda  
 na kima yango awa. Yawu yayi!

Kasi beto ke landa bitambi ya bantumwa.

Nsemo mosi! “Mpe ke vtutula Lukwikilu ya batata na bana.”

Kilumbu ya mpulusu me belama, (Me belama  
 mingi.)  
 Bantima ya bantu ke na kubwa na boma;  
 (Ntoto ke na kuningana.)  
 Oh, beno vwanda ya kufuluka na Mpeve ya  
 Nzambi, minda ya beno ya kubelama mpe ke  
 ngenga.  
 Beno tala na zulu! Mpulusu ya beno me  
 belama.

Beno ke kwikila yawu? [Dibuundu me tuba, “Amen.”—Mu.]  
 Beto kulumusa bayintu ya beto ntangu yayi.

<sup>364</sup> Kuna na bayinsi yina kisika Nsangu yayi ke kwenda, katuka  
 Côte- Est tii na Weste, katuka Californie na New York, ntama  
 kuna na Sude, tii na Nord, kuna na bintumwa, mpe bisika nyonso  
 Yawu ke kwenda, mpe na kati ya tabernacle yayi. Beto kele  
 bamputu. Beto kele na bima ya mingi ve, ya nene, yina ke ngenga  
 ve, mpe ba-emission na television ve. Beto ke na kumeka na  
 kusala yina beto lenda sala. “Kasi bayina nyonso Tata me pesa  
 Munu ke kwisa.”

<sup>365</sup> Ntangu yayi, mu zola ti beno kuzaba yayi kele kieleka, mpe  
 beno bayina ke kuwa bande yayi. Beno lendaka banza bubu yayi  
 ti mu vwandaka meka na kutuba yina samu na munu, mutindu  
 ti mu vwandaka yina vwandaka me nata Nsangu yayi. Mu ke  
 na kima dyaka ve ya kusala na Yawu kana kima ve, mu kele  
 kaka ndinga kima yankaka ve. Mpe, ndinga ya munu, kukondwa  
 luzolo ya munu mosi; mu vwanda zola kuvwanda kikubudi. Kasi  
 ya kele luzolo ya Tata ya Munu yina mu me zola kusala, mpe mu  
 me kana na kusala.

<sup>366</sup> Mu vwandaka ve Yandi yina talanaka kuna na mwila; mu  
 vwanda kaka ya kutelama kuna ntangu Yandi kutalanaka. Mu



kele ve Yandi yina ke salaka bima yayi mpe yina ke zabisaka na ntwala bima yayi yina ke salamaka na mutindu ya yawu ya kulunga; Mu kele kaka muntu yina kele pene-pene ntangu Yandi ke salaka yawu. Mu me vwanda kaka ndinga yina Yandi vwandaka me sadila, samu na kutuba Yawu. Ya vwandaka ve yina mu zabaka; ya kele kaka ti mu me kukipesa munu mosi, samu ti Yandi kuzonza na nzila ya munu. Ya kele munu ve, ya vwandaka ve wanzio ya sambwadi, oh, ve; ya vwandaka kumonisama ya Mwana ya muntu. Ya vwandaka wanzio ve, nsangu ya yandi; ya vwandaka mansweki yina Nzambi me monisama. Ya ke muntu ve; ya kele Nzambi. Wanzio vwandaka ve Mwana ya muntu; yandi vwandaka munati-nsangu ya Mwana ya muntu. Mwana ya muntu kele Klisto; Yandi kele Yandi yina beno ke na kudyaka. Beno ke na kuya muntu ve; muntu, mambu ya yandi ke kondwa. Kasi beno ke na kudyaka Nzutu-Ndinga yina ke kondwaka ve ya Mwana ya muntu.

<sup>367</sup> Kana beno me kuya ya kufuluka ve konso Ndinga, samu ti beno kuzwa ngolo beno mosi samu na kupumbuka na zulu ya ba denomination nyonso yayi mpe bima ya yinza, beno zola kusala yawu ntangu yayi, na yina beto ke sambila?

<sup>368</sup> Tata ya luzolo, yayi kele kima ya mpasi mingi. Ya kele mpasi na muntu na kusala yawu. Nge zaba mambu nyonso. Mpe mu ke lomba Nge, Nzambi ya luzolo, ti ba bakula yawu yimbi ve. Kasi, na kati ya Nsemo ya Ndinga ya Nge, ti bantu kutambula.

<sup>369</sup> Mpe, Tata Nzambi, mu zaba ve nani kele muntu ya Kusolama; Nge zaba. Mu zaba ve ntangu Kwizulu ya Nge ke vwanda. Kasi mu zaba kaka ti Nge tubaka ntangu yayi ke salama, bapakulama, ya luvunu yayi; kaka ve ntangu bawu ke banda.

<sup>370</sup> Moïse bikaka kaka bawu, samu ti yandi zolaka sala kima dyaka ve samu na yawu. Yandi zolaka tuba kaka yina Nge vwanda tuba. Nge tubaka na yandi na kubokila makasa; na manima bawu me bokila. Nge tubaka na yandi na kubalula maza na menga; na manima bawu me sala yawu. Moïse landaka kaka, Ndinga na Ndinga, mutindu Nge tubaka, kasi na manima Nge vwandaka Yandi Yina talisaka bulawu ya bawu.

<sup>371</sup> Ntangu yayi, Tata, Nge kele dyaka, Nzambi. Ndinga mosi yina tubaka ti yayi ke salama na bilumbu ya nsuka. Bantu mingi ya kusungama, mutindu beto vwandaka tuba Lumingu me luta, tulaka maboko na Nzaza yina, na zulu ya kipusu ya malu-malu, kasi na mapeka ya ba-Levite ve, bawu kufwaka, “kufwaka na disumu mpe bayimbi ya bawu,” ke telemina konsiansi ya bawu mosi.

<sup>372</sup> Balongi mingi na kati ya kutanga ya bawu, ke tanga Ndinga yango, kasi ke balula na nswalu page; samu na kumanga makelele, samu ti yandi zaba ti yandi ke wombisa kisika ya yandi na kati ya bantu, na kati ya dibuundu ya yandi mpe na kati ya

denomination ya yandi. Nzambi sadisa beto na kusala yawu ata mbala mosi ve!

<sup>373</sup> Vedisa ntima ya beto, Mfumu, na nyonso ya kubeba ya yinza. Mfumu, mu me kubama samu na kuvedila. Mu me kubama, na dibuundu yayi mpe na bawu nyonso yina ke na kuwa, mpe na muntu nyonso yina ke kuwa bande yayi. Mu me telama, Mfumu, mpe ke lomba na kuvedila. Mfumu, nata munu na yinzo ya Muwumbi mpe pasula munu, yidika munu samu na kusala munu kisadi yina Nge zola.

<sup>374</sup> Samu ti, Mfumu Yesu, “Mu kele muntu ya bikoba ya mvindu,” mutindu Ésaïe kudilaka, “yina ke vwandaka na kati ya bantu yina bikoba kele mvindu; mpe kyadi na munu, samu ti mu me mona luzayikisu ya Nzambi kumonisama,” mutindu Ésaïe kumonaka Bawanzio na Tempelo. Mu me mona nsuka ya ntangu, Mfumu, mpe kyadi na munu mpe dikanda ya munu; kyadi na munu mpe bantu ya munu. O Nzambi ya Seko, wila beto mawa. Mu ke lomba lemvo samu na munu mosi mpe samu na bantu. Ti beto kufwa ve na bawu nyonso yina ke kwikilaka ve, kasi ti beto kuzinga na mikwikidi.

<sup>375</sup> Konso denomination, Mfumu, konso bakala to kento . . . Mu lenda lomba Nge ve na kusakumuna denomination, na yina mu zaba ti Nge ke zolaka yawu ve. Kasi mu lenda kaka tuba, Mfumu, kana Nge kele na mameme ya Nge kuna na kati-kati ya bawu, bika ti bawu kuwa bande yayi. Ti bawu kukuwa Yawu, Mfumu, mpe ti ba tendula Yawu na lubakusu yina Nge ke pesa bawu, mpe ti bawu kubasika mpe kuyamba Nge. Ti ba vunama ve na nzila ya bumpofo mpe kinkulu ya kilumbu yayi. Ti bawu kumeka na kudya ve kima yina vwandaka mvumbi na kilumbu yankaka. Ti bawu kubaka Ndinga.

<sup>376</sup> Ya kele mutindu yina ba-Pharisien kukomaka Nge na kulunsi, Mfumu. Ba vwandaka baka mvumbi ya kilumbu ya Moïse, mpe vwandaka meka na kudya yawu ya kulutila; na manima ti Nge me pesa kifwanusu, na mfinda, ya mani ya madidi ya konso mpimpa, yina zola tuba konso mbandu. Ya kele kisika yina bawu ke na kukondwa. Ya me bebisa bawu. Ya me kufwa bawu, samu na kudya madya yina me beba.

Mpe, na kimpeve, ya ke na kusala kima mutindu mosi bubu yayi; ke na kufwa bawu, na kimpeve, na denomination.

Sadisa beto, Nzambi ya luzolo. Ya kele ntangu yayi na maboko ya Nge. Na Nkumbu ya Yesu Klisto.

Na bayintu ya beto ya kukulumusa, beto ke yimba yawu na yina beno ke baka lukanu ya beno. Beno ke tambula tii na nsuka?

Mu lenda kuwa Mvulusi ya munu . . . (Mpe  
Yandi kele Ndinga.) ke bokila,  
Mu lenda kuwa . . .

“Oh, mu me yenga-yenga ntangu ya yinda, kasi, kieleka, kaka na ntangu yayi Mu ke kuwa Yandi, ‘Beno kwiza na Munu, beno nyonso yina ke na kutitiba.’”

. . . beno kuwa . . .

377 “Beno baka kulunsi ya beno, beno landa Munu konso kilumbu.’ ‘Yinga, ata ti mu tambula na dibengi ya kivudi ya lufwa, mu ke vwanda na boma ya dyabulu ve; kuna na mupepe ya matiti ya masa, mpe na maza ya lembami.’”

Mpe kisika yina Yandi ke twadisa munu mu . . .

378 “Mfumu, mu ke mona bulawu ya butatu yango. Mu ke mona yinza ya movimba kukuna yawu; matiti ya yimbi ke na kuyela bisika nyonso. Kasi kisika Nge ke twadisa munu ntangu yayi, Mfumu, munu ke vwanda mutindu bawu yina na Actes 19. ‘Ntangu ba kuwaka Yayi, ba vutukilaka mbotika na Nkumbu ya Yesu Klisto.’”

. . . kulanda,

“Mu me tambula kitini ya nzila, Mfumu, ya me lunga samu na kuyamba Nge.”

Ntangu yayi mu ke tambula na Yandi bisika nyonso.

379 Nzambi ya luzolo, mu ke na kivuvu ti ya me katuka na ntima ya munu. Mu ke na kivuvu ti ya me katuka na ntima ya muntu nyonso yina ke na kuyimba na ntangu yayi, mu ke banza na bantu mingi yina ke kuwa bande yayi, bayina kele awa ve to bayina ke na kuwa yawu na ntangu yayi ve. Ti beto kubelama na kusala yawu, Mfumu, ata lutangu ya lendaka vwanda. Yandi tubaka, “Mutindu muntu yina ke na kwenda bwabana basoda yankaka, soda, ntinu; ntete yandi ke vwanda mpe ke tanga, kana yandi ke lenda na kusala yawu, yandi lenda bika bima ya yinza? Beno lenda bika, kuvukana na basoda ya Ndinga ya Nzambi ya kusonama, kutambula na basoda ya Yandi, kupumbuka na bangononi ya Yandi?” Pesa yawu, Mfumu, na Nkumbu ya Yesu.

380 Beno me kwikila? Beno me ndima Yandi? Mbote. Beto ke mona beno awa dyaka, na nkokila yayi, kana Mfumu zola. Beno ke kwikila ti ya kele Kieleka? [Dibuundu me tuba, “Amen.”—Mu.] Ya kele kieleka pwelele? [“Amen.”]

Na yina beno baka Nkumbu ya Yesu na beno,  
Nge mwana ya mawa mpe ya kyadi;  
Ya ke pesa nge kyese mpe mbote,  
Beno baka yawu konso kisika . . .

Ntangu yayi, beno pesa mbote na muntu yina kele pene-pene na beno ntangu yayi.

Nkumbu ya ntalu, O Nkumbu ya mbote!  
Kivuvu ya ntoto, (Kivuvu ya ntoto!) kyese ya  
Mazulu;

Nkumbu ya ntalu, O Nkumbu ya mbote!  
Kivuvu ya ntoto mpe kyese ya Mazulu.

Na Nkumbu ya Yesu beto ke fukama,  
Beto ke fukama na makulu ya Yandi,  
Ntinu ya bantinu na Mazulu beto ke  
byadisa. . . (Yandi kele Nzambi, na yina.)  
Na nsuka ya nzyetelo.

Nkumbu ya ntalu, (Nkumbu ya ntalu, Oh  
Nkumbu ya mbote!) O Nkumbu ya mbote! (O  
Nkumbu ya kitoko!)  
Kivuvu ya ntoto mpe kyese ya Mazulu;  
Nkumbu ya ntalu, O Nkumbu ya mbote!  
Kivuvu ya ntoto mpe kyese ya Mazulu.

Mu banza ti ba me tanguna milongi nyonso na suka yayi, ti mu me pesa mbote.

<sup>381</sup> Ntangu muntu me vwanda na kusambila lumingu nyonso, me yindula, ke mona Masonuku yayi, pwelele na ntwala ya nge. “Mpe kyadi samu na munu,” me tuba Paul, “kana mu longa Nsangu ya mbote ve.” Na nsuka ya nzila ya yandi, yandi tubaka, “Mu me zonzila beno Conseil nyonso ya Nzambi mutindu Ya kupesamaka na munu.”

Mu ke zimbanaka bambala mingi na kusala bima, na kumonisa, kusakumuna bana ya fyoti.

Billy vwanda tuba, kilumbu yankaka yina, ti muntu mosi kwizaka, yandi tubaka, “Ya me kuma bamvula zole yina mu ke na kukwiza, samu ba sakumuna mwana ya munu ya fyoti.”

<sup>382</sup> Billy tubaka, “Kubanza yimbi samu na yawu ve. Mu ke na mwana ya fyoti ya mvula mosi; nabunu ntete, ntete ba sakumuna yandi. Na yawu mu ke na kovingilaka tii yandi ke kula samu yandi mosi kutambula kuna, mu banza.”

Na yawu beto ke tala, mpangi-bakala, mpangi-kento, ya kele ve—ya kele ve, beno me mona, mu. . . Kima mosi, beto fwana sakumuna bana ya beto.

<sup>383</sup> Beto fwana botika muntu nyonso. Ya kele na kizinga ya masa; masa yawu yayi. Kana nabunu ntete beno kusala yawu, yinki ke kanga nge? Masa yawu yayi. Beno kwisa ntangu yayi. Beno vingila ve tii na nkokila yayi; beno kwisa ntangu yayi. Ya kele na muntu awa yina ke botika muntu nyonso yina me fungula masumu mpe yina me zonza yimbi ya yandi. Kana ba me botikaka nge bambala kumi na zole, ba ke botika nge na Nkumbu ya Yesu Klisto samu na lemvo ya masumu. Beno me mona? Beto kele yawu.

<sup>384</sup> Kasi, beno me mona, Nsangu kele na ntima ya munu. Mu fwana basisa Yawu. Yina kele lukanu ya munu mosi, kukondwa yina kento ya munu ke tuba, yina bana ya munu ke tuba, yina

pasteur ya munu ke tuba, yina nani ke tuba. Ya kele Mfumu ya munu. Mu fwana basisa Yawu. Yina kele lukanu ya munu mosi.

<sup>385</sup> Mpe ntangu yayi, bambala mingi, mu ke zimbanaka na kupesa mbote na balongi. Mu banza keba ve...mpangi ya beto ya bakala, Mpangi ya bakala Neville, bakala ya mbote. Bampangi yankaka yayi awa, beto kele na nsayi na kuzwa beno.


<sup>386</sup> Ya kele ve samu ti beto kele dibanza mosi ve na beno, mpangi-bakala, samu na kuvwanda mutindu yankaka. Mingi ya beno awa lendaka vwanda milongi ya butatu. Beto zola ve kudasuka na beno. Beto zola beno. Kana beto vwandaka zola beno ve, kana mu kwikilaka yawu ve, mu zolaka basika na dibuundu yayi ata mbala mosi ve tii mu fukamaka kuna mpe tubaka, "Nzambi, kumisa munu muntu ya mbote."

<sup>387</sup> Mu zola ve ti mpeve ya lulendo, ya munimi kuvukana na ya munu. Mu zola mpeve ya munu kuvwanda ya kuvedila mpe ya bunkete, na luzolo ya bampangi, ya santu na Mpeve-Santu. Ntangu yayi, kana muntu kusala munu yimbi, ya ke sala kima ve. Mpe ata ti mu kele na muswa ya kuvutula bawu yimbi, mu zola yina ve na luzingu ya munu. Ve, mu—mu zola kuvwanda na luzolo. Mu zola kuyilama mpe kusemba na luzolo, na luzolo yina ke pesa mvutu kuna samu na yawu.

<sup>388</sup> Ya zola tuba ve ti mu kele mutindu yankaka. Methodiste, Baptiste, Catholique, Presbyterien, nyonso yina beno kele, mu ke tuba bima yayi ve samu na kuvwanda mutindu yankaka, kuvwanda na matalana na beno. Kana mu me sala yawu, mu kele muntu ya luvunu mpe zolaka vwanda awa na yisi ya autel yayi, kusambila tii Nzambi ke pesa mvutu.

<sup>389</sup> Kasi mu ke tuba yayi, ya kele samu na luzolo, mpe mu ke mona kisika yina beno ke na kukwenda. Ntangu yayi, mu ke tuba yayi ve na munu mosi, mpe samu na kutuba ti mu me banza. Mu ke na kupesa beno MUTINDU ME TUBA MFUMU. Ya Kieleka. Mpe mu zola beno samu na bima yango. Nzambi kusakumuna beno.

<sup>390</sup> Ntangu yayi na yina beto ke yimba nzila yankaka ya nkunga yayi, ti, ntete beto kukwenda. Beto zola beno kuvwanda awa na nkokila, kana beno lenda. Kana beno lenda ve, Nzambi kuvwanda na beno tii beto ke kutana. Beto ke sambila kaka ti Nzambi ke—ke sakumuna beno mpe kupesa beno yinsi ya Yandi ya kulutula, beno me mona.

Baka Nkumbu ya . . . 

65-0725M Bapukulami Na Ntangu Ya Nsuka  
Branham Tabernacle  
Jeffersonville, Indiana U.S.A.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kiasadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)